

इजकिएलया सफू म्हसीका

ई.पू. ५८६ लय् यरूशलेम नाश जुइ न्हापा व लिपाया इलय् इजकिएल अगमवक्ता बेबिलोनय् कैदी जुया: च्वनाच्चंगु खः। वयात बेबिलोनया जुजुं ज्वना: बेबिलोनय् यंकूगु खः। कैदी जुया: बेबिलोनय् च्वनाच्चंपिं व यरूशलेमय् च्वनाच्चंपिनिगु निंति वं थ्व बुखँ ब्यूगु खः।

थ्व सफुलिइ खुगू मू खँत दु –

१. इजकिएलयात अगमवक्ता जुइत परमेश्वरं सःतूगु
२. परमेश्वरया सजॉय व लिपा वइगु यरूशलेमया पतन अले विनाशया बारे यहदीतयत ख्याच्चः
३. थः प्रजायात अत्याचार याइपिं व मखुगु लँय् यंकूपिं थीथी कथंयापि अन्यजातितयत परमप्रभुया सजॉयया सुचं।
४. यरूशलेम नाश जुइ धुंका: इस्राएलयात सान्त्वनाया वचन व वइतिनिगु इलय् बांलाइगु खँया निंति बाचा
५. गोगया विरोधय् अगमवाणी
६. हाकनं देगः व देश थापं यायेगु बारे इजकिएलयात क्यंगु किपा।

इजकिएल तसकं विश्वास दुम्ह व दर्शन खनीम्ह मनू खः। दर्शनय् वं यक्व दुग्यांत नं काःगु खः। अले यक्व खँत बांलाक सिइदयक व चिंकथं काःगु दु। मनूतयगु आत्मा व नुगलय् दुने शुद्ध व थःगु पापया निंति फुक्क मनूतयसं थःम्हं हे जिम्मा कायेमा धका: इजकिएलं थ्व सफुलिइ बःबियातःगु दु। मनूतयत शुद्ध यायेगु बारे नं वं थःत आशा दुगु खँ नं थुकी च्वयातःगु दु। थः पुजाहारी व अगमवक्ता जूगु कारणं हे देगः व मनूतयत पवित्रता मदयकं मगाःगु खँ खः धका: च्वयातःगु दु।

धलः पौ

इजकिएलयात परमेश्वरं सःतादीगु १:१-३:२७

यरूशलेमया नाश जुइगु अगमवाणी ४:१-२४:२७

जाति जातितयत सजॉय २५:१-३२:३२

थः प्रजायात परमप्रभुया बाचा ३३:१-३७:२८

गोगया विरोधय् अगमवाणी ३८:१-३९:२९

लिपायागु देगः व देशया दर्शन ४०:१-४८:३५

इजकिएल

इजकिएलं दर्शनय् प्राणीत खंगु

1 स्विगू दँया प्यंगू लाया न्यान्ह दुखुन्ह* जि यहदां ज्वनाहःपिनापं कबार खुसिया सिथय् दुबलय् स्वर्ग चाल अले जिं परमेश्वरया दर्शनत खना।☆

2 लाया न्यान्ह दुखुन्ह, थ्व यहोयाकीन जुजुयात ज्वनाः बेबिलोनय् हःगु न्यागूगु दँ खः,☆

3 बेबिलोन देशया कबार खुसिया† सिथय् परमप्रभुया वचन बूजीया काय् इजकिएल पुजाहारीयाथाय् वल। अन परमप्रभुयागु शक्ति वयाके खनेदत।

4 जिं स्वया, जिं उत्तरपाखें वाफय् वयाच्चंगु खना। छगू तःधंगु सुपाँचय् मि प्वालाक प्वालाक्क च्यानाच्चंगु दु। उकिया प्यखें तसकं थीगु जः दु, अले मिया दथुइ ज्वाल्लच्चंगु धातु थें छुं दु।

5 सुपाँय्या दथुं प्यम्ह म्वाःपि प्राणीत थें च्वंपि छुं पिहां वल। इपिं मनू थें खने दु,☆

6 तर इपिं फुक्कसिके प्यपा प्यपा ख्वाः व प्यपु प्यपु पपू दु।

7 इमिगु तुति तप्यं, इमिगु तुतिपालि साचायागु तुतिपालि थें च्वं। उपिं ज्वाल्ल थीकातःगु कैय् थें हे ज्वाल्ल थीगु।

8 इमिगु पपूया क्वय् प्यखें मनूयागु थें ल्हाः दु। अले उपिं प्यम्हं प्राणीतय्के ख्वाः व पपू दु,

9 इमिगु पपू छगुलि मेगुयात थीगु दु। गनं वनीबलय् इपिं फुक्क तप्यंक न्ह्यज्याइगु, इमिसं थुखे उखे फहिली मखु।

10 इमिगु ख्वाः थथे च्वं— उपिं प्यम्हं प्राणीतय्गु छपा ख्वाः मनूयागु थें च्वं। इमिगु जव पाखेया ख्वाः धाःसा सिंहयागु थें, खव पाखेयागु ख्वाः द्वहंयागु थें व ल्युने पाखेयागु ख्वाः इमायागु थें च्वं।☆

* 1:1 १:१-२ ३१ जुलाई ५९३ बी.सी. ☆ 1:1 १:१ प्रे ७:५६; प्रका १९:११ ☆ 1:2 १:२ २ राज २४:१०-१६; २ इति ३६:१-१० † 1:3 १:३ कबार खुसिया थ्व मनूतय्सं दयकूगु नहर खः ☆ 1:5 १:५ प्रका ४:६ ☆ 1:10 १:१० इज १०:१४; प्रका ४:७

11 इमिगु ख्वाः थथे हे च्वं। इमिगु पपू च्वयपाखे चक्कंगु दु। छम्ह छम्हय्सिगु निपा पपुति छम्हय्सिगु पपुति मेम्हय्सिगु पपूयात थ्यूगु दु। मेगु निपा पपुति थथःगु म्ह त्वपुयातःगु दु।

12 इपिं तप्यंक वनीगु। आत्मा गन गन वन इपिं नं अन हे वनीगु। इपिं थुखे उखे मस्वसें वनीगु।

13 उपि म्वाःपिं प्राणीतयगु रूप च्यानाच्चंगु हेंग्वाः वा मिप्वाः थें च्वं। मि उपि प्राणीतयगु दथुइ गुलि थुखें उखे व उखें थुखे वनाच्चंगु खने दु; मि ज्वाल्ल थी, व प्वालाक्क प्वालाक्क च्याइगु।☆

14 उपि प्राणीत हाबलासा त्वःगु थें थुखें उखे व उखें थुखे हथासं वनाच्चंगु दु।

घःचाःत

15 जिं उपि म्वाःपिं प्राणीतयत् स्वयाच्चनाबलय् हे उपि प्यपा ख्वाः दुपिं छम्ह छम्ह प्राणीया लिक्क जमिनय् छचाः छचाः घःचाः खना।☆

16 उपि घःचाःत प्वालप्वाल थियाच्चंगु पुखराज थें खनेदय्कः दय्कातःगु दु — उपि फुक्कं उथें च्वं। उपि घःचाः छगूया दुने मेगु दु थें खने दु।

17 उकि यानाः उपि घःचाःत फःमह्यस्य प्यखेरं वने फु। उपि प्राणीत वनीबलय् उपि घःचाःत थुखे उखे हिली मखु।

18 प्यचाः हे घःचाःया घेरा तःधं व ग्यानापुस्से च्वं, अले उमिगु प्यंगू हे घेराय् प्यखें मिखाया मिखा दु।☆

19 उपि प्राणीत थुखे उखे सनीबलय् उपि घःचाःत नं नापनापं वनीगु। उपि म्वाःपिं प्राणीत जमिनं च्वय् थाहां वनीबलय् घःचाःत नं थाहां वनीगु।

20 आत्मा गन वन इपिं नं अन हे वनीगु, उपि घःचाःत नं इपिनापं हे दनीगु, छायाधाःसा उपि म्वाःपिं प्राणीतयगु आत्मा व हे घःचालय् दु।

21 इपिं सनीबलय् थुपिं नं सनीगु, इपिं इवातां दनीबलय् थुपिं नं इवातां दनीगु, इपिं जमिनं च्वय् थाहां वनीबलय् घःचाःत नं च्वय् थाहां वनीगु। छायाधाःसा उपि प्राणीतयगु आत्मा घःचालय् दु।

आकाश

22 उपि म्वाःपिं प्राणीतयगु छ्यंया च्वय् गुम्बज थें छुं दु, च्वापु थें थीगु व ग्यानापुगु।☆

23 व गुम्बजया क्वय् इमिगु पपू, छम्हयसिगु पपुति मेम्हयसिगु पपूयात थीक तप्यंक न्यनावंगु दु। इपिं प्यम्हं प्राणीतयगु निपा निपा पपुतिं थथःगु म्ह त्वपुयातःगु दु।

24 इपिं वंबलय् इमिगु पपूया सः यक्व लःया सः, दकलय् तःधंम्हयसिगु सः, सेनाया हलचलयागु सः थें जिं ताया। इपिं इवातां दनीबलय् इमिसं थथःगु पपू क्वय् क्वकाइगु।☆

25 थःगु पपू क्वकयाः इपिं दनाच्चंबलय् इमिगु छयंया च्वय्यागु गुम्बजं छगू सः पिहां वल।

सिंहासन

26 इमिगु छयं च्वय्यागु गुम्बजया दकलय् च्वय् छगू सिंहासन थें दु। स्वयंबलय् व नीलम थें खने दु, अले सिंहासनय् च्वंम्हयसिगु रूप मनूयागु थें च्वं।☆

27 वयागु जंनिसें च्वय् वयागु ख्वाः ज्वाल्लच्वंगु धातु थें जिं खना, प्यखेरं मिं जाःगु थें। जंनिसें क्वय् नं वयागु ख्वाः मि थें खनेदत, अले वयागु छचाःखेरं थीगु जः दु।☆

28 वा वइबलय् आकाशय् इन्द्रेणी खनेदुगु थें वयागु छचाःखेरं दुगु जः नं अथे हे खने दु।

परमप्रभुया महिमाया रूप थथे हे च्वं। व खनाः जिं छयं क्वछुकाः। जिं सुं न्वंवानाच्चंगु सः ताल।

2

इजकिएलयात परमेश्वरं सःतादीगु

1 वय्कलं जितः धयादिल, “अय् सीमानिम्ह मनू, दौं! जिं छलिसैं खँ ल्हाये।”

2 वय्कलं जितः थथे धायेवं वय्कःया आत्मा जिथाय् वयाः जितः थनादिल। वय्कलं जिलिसैं खँ ल्हानादीगु जिं ताया।

3 वय्कलं जितः थथे धयादिल, “अय् सीमानिम्ह मनू, जिं छन्त इस्राएली जातियाथाय् छवयाच्चनागु दु, जिगु विरोधय् विद्रोही जूपिं जातियाथाय्। इपिं व इमि पुरखात थौं तक नं जिगु विरोधय् विद्रोही जूगु दु।

4 जिं छन्त जिद्दी व नुगः छाःपिं मनूतय्थाय् छवयाच्चनागु दु। छं इमित थथे धा, ‘परमप्रभु परमेश्वरं थथे धयादी,’

☆ 1:24 १:२४-२८ प्रका १:१४-१५; १९:६

☆ 1:26 १:२६ इज १०:१; प्रका ४:२-३

☆ 1:27 १:२७

5 इमिसं न्यनेमा वा मन्यनेमा (छाय्धाःसा इपिं विद्रोही घराना खः), इमिसं थःगु दथुइ छम्ह अगमवक्ता दु धकाः ला सी।

6 “अय् सीमानिम्ह मनु, इपिं खनाः ग्याये मते अले इमिगु खँ न्यनाः ग्याये मते! छंगु प्यखें कंमा व कं दुसां वा बिच्छितयगु दथुइ च्वनेमाःसां छ ग्याये मते! इमिसं न्ह्यागु धाःसां छ ग्याये मते! खः ला, इपिं विद्रोही सन्तान खः।

7 छं इमित जिगु वचन धा, इमिसं चाहे न्यनेमा वा मन्यनेमा छाय्धाःसा इपिं विद्रोही खः।

8 तर छं धाःसा, अय् सीमानिम्ह मनु, जिं छन्त छु धाये, व खँ बांलाक न्यौ! व विद्रोही घराना थें छ विद्रोही जुइ मते, छंगु म्हतु चायकि, जिं छु बी व न!”

9 अले जिं स्वया, जिं छपु ल्हाः जिपाखे न्ह्यज्याकाच्चंगु खना। उकी थूतलातःगु भ्वं छथू दु।

10 वय्कलं उकियात जिगु न्ह्यःने फ्यनादिल। उकियागु न्ह्यःने व ल्युने निखेंपाखे शोक, बिलाप व विपत्तिया खँ च्वयातःगु दु।

3

1 अले वय्कलं जितः धयादिल, “अय् सीमानिम्ह मनु, छंगु न्ह्यःने दुगु थ्व भ्वंथू न! अले वनाः इस्राएलया घरानायात धा।”

2 उकिं जिं थःगु म्हतु चायका, अले वय्कलं जितः भ्वंथू नयेत बियादिल।

3 अनंलि वय्कलं जितः धयादिल, “अय् सीमानिम्ह मनु, जिं छन्त बियागु थ्व भ्वंथू न, थुकिं छंगु प्वाः जायकी!” उकिं जिं व भ्वंथू नया, व जिगु म्हतुइ कस्ति थें चाकुसे च्वन।

4 अले वय्कलं जितः धयादिल, “अय् सीमानिम्ह मनु, इस्राएलया घरानायाथाय् हूँ अले इमित जिगु खँ न्यकि!

5 जिं छन्त अजू चाइपुगु व थाकुगु भाय् ल्हाइपिं मनूतयथाय् छवये मखु तर इस्राएलीतयथाय् छवयाच्चनागु दु।

6 छं मथूगु अजू चाइपुगु व थाकुगु भाय् ल्हाइपिं मनूतयथाय् मखु। जिं छन्त अज्याःपिन्थाय् छवयागु जूसा इमिसं धात्थें हे छंगु खँ न्यनीगु।

7 तर इस्राएलया घरानायात छंगु खँ न्यने मास्ति मवः, इमित जिगु खँ न्यने मंमदु। छाय्धाःसा इस्राएलया फुक्क घराना हे जिद्दी व नुगः छाःपि खः।

8 तर जिं छन्त इपिं थें हे जिद्दी व नुगः छाःपि यानाबी।

9 जिं छंगु कपाःयात च्वल्वहं स्वयाः छाःगु ल्वहं थें छाकाबी। उपिं विद्रोही घराना जूसां इपिं खनाः ग्याये मते! इमिगु ख्वाः खनाः नं ग्याये मते!”

10 अले वय्कलं जितः थथे धयादिल, “अय् सीमानिम्ह मनु, जिं छन्त धयागु फुक्क खँ बांलाक न्यँ, अले नुगलय् ति!

11 आः उपिं यह्दां ज्वनाहःपिं छिमि मनूतय्थाय् हुँ! इमिसं ध्यान बियाः न्येनेमा वा मन्येनेमा, इमित धा, ‘परमप्रभु परमेश्वरं थथे धयादी।’ ”

12 अले आत्मां जितः च्वय् थकयादिल। जिं थःगु ल्युने छगू घुनुनु मिगु सः ताल, “स्वर्गय् परमप्रभु परमेश्वरया महिमा प्रशंसा जुइमा!”☆

13 व सः उपिं प्राणीतय्गु पपुतिं छम्हयसिनं मेम्हयसित थ्यूबलय् पिहां वःगु व इमिगु लिक्क दुगु उपिं घःचाःया सः खः, भुखाय् ब्वइबलय् वइगु घुनुनु मिगु सः थें।

14 अले आत्मां जितः ल्हनाः यंकादिल। म्हाइपुसे च्वंकाः तंमय् जि वना। परमप्रभुया शक्ति जिके दुगु जुल।

15 अले जि कबार खुसिया लिक्क तेल-अबीबय् च्वपिं यह्दां ज्वनाहःपिं मनूतय्थाय् वया। अन जि न्हयन्हु तक नुगः मछिंकाः च्वना।

इस्त्राएलया पिवाः

16 न्हयन्हु लिपा परमप्रभुया वचन जिथाय् वल,☆

17 “अय् सीमानिम्ह मनु, जिं छन्त इस्त्राएलया घरानाया पिवाः यानागु दु। उकिं जिं आः धयाच्चनागु खँ न्यँ, अले इमित जिगुपाखें ख्याच्चः ब्यु!

18 जिं छम्ह मभिंम्ह मनूयात ‘छ धात्थें हे सी’ धकाः धायेबलय् तर वयागु ज्यान बचय् यायेत छं ख्याच्चः मबिल, वा वयागु मभिंगु पहःचहःया लागि वयागु विरोधय् सल्लाह मबिल धाःसा व मनु पापया कारणं सी, अले वयागु हियागु ल्याःचाः जिं छंके काये।

19 तर छं व मभिंम्ह मनूयात ख्याच्चः बिल अले व थःगु मभिंगु ज्यापाखें वा थःगु मभिंगु पहःपाखें लिहां मवल धाःसा व थःगु अधर्मय् हे सी, छं धाःसा थःम्हं थःत बचय् याइ।

20 “हाकनं सुं धर्मी मनु थःगु धार्मिकतां लिहां वयाः मभिंगु ज्या यात, धाःसा जिं वयागु न्ह्यःने लुफि हाइगु ल्वहं तये अले इपिं सी। छं वयात ख्याच्चः मब्यूगुलि इपिं थःगु हे पापया कारणं सी। इमिसं याःगु धर्मया ज्यायात लुमंकीगु जुइ मखु। इमिगु हियागु ल्याःचाः जिं छंके काये।

21 तर उम्ह धर्मी मनूयात पाप याये मते धका: छं ख्याच्च: बिल अले वं पाप मयात धा:सा धात्थें व म्वाइ, छाया:सा वं ख्याच्च: नालाकाल, अले छं थ:म्हं थ:त बचय् याइ।”

22 परमप्रभुया शक्ति अन जिके दु, अले वय्कलं जित: धयादिल, “दैं, मैदानय् हूँ, अन जिं छलिसें खँ ल्हाये।”

23 उकिं जि दना: मैदानय् वना। कबार खुसिया सिथय् जिं खनागु परमप्रभुया महिमा अन नं खने दु। अले जि बैय् भवसुला।☆

24 उबलय् परमप्रभुया आत्मा जिके दुबित अले जित: तुति थनादिल। वय्कलं जिलिसें खँ ल्हानादिल, जित: थथे धयादिल, “हूँ, थ:गु छैय् खापा तिना: च्वँ।

25 अय् सीमानिम्ह मनू, इमिसं छन्त खिपतं ची, छ मनूतयगु दथुइ वने फइ मखु।

26 जिं छंगु मेयात छंगु थक्वय् प्यपुंकाबी। उकिं याना: छ नवाये फइ मखु अले छं इमित हक्के फइ मखु। ख: ला इपिं विद्रोही घरानायापि ख:।

27 तर जिं छलिसें खँ ल्हायेबलय् जिं छंगु म्हुतु चाय्काबी अले छं इमित धा, ‘परमप्रभु परमेश्वरं थथे धयादी,’ न्यने मास्ति व:पिन्सं बांलाक न्यनेमा न्यने मास्ति मव:पिन्सं मन्यनेमा, छाया:सा इपिं विद्रोही घराना ख:।”

4

यस्शलेमयात घेरय् या:गुया चिं

1 “आ: अय् सीमानिम्ह मनू, छपा अप्पा कया: उकियात थ:गु न्ह्य:ने ति, अले उकी यस्शलेम शहरयागु नक्सा च्व।

2 अनलि उकियात घेरय् या! उकिया प्यखेरं चा व ल्वहं ट्रुंकिंका: ट्रुम्ब:चा दय्कि! उकियागु न्ह्य:ने छाउनी दय्कि! प:खा: तछ्याइगु ततग्व:गु धलित ति!

3 अनलि छपा नैपाता कया: उकियात छ व शहरया दथुइ छगू नैयागु प:खा: थें तयाब्यु! अले थ:गु ख्वा: शहरपाखे स्वय्कि! व घेराय् ला:गु दु, छं उकियात घेरय् याना: का। इस्राएलया घरानायात थ्व छगू चिं जुइ।

4 “अनं लिपा छ खव स्वया: ग्वतु, अले इस्राएलया घरानाया पाप थ:के का! ग्वन्हु तक छ थुकथं ग्वारातुलाच्चनी खुन्हु तक छं इमिगु पाप भोगे याइ।

5 छाया:सा जिं छंगु लागि इमिगु पापया दैं ति हे दिं क्व:छिनागु दु। उकिं स्वस: व गुइन्हु (३९०) तक छं इस्राएलया घरानायागु पाप भोगे याइ।

6 “उपि सजाँयया दि पूरा जुइ धुंका: हाकनं छ जव स्वया: ग्वतु! अले छं यहदाया घरानाया पाप भोगे या! जिं छगू दँया लागि छन्हु याना: पिइन्हु क्व:छिनागु दु।

7 छं थ:गु ख्वा: यस्शलेमया घेरापाखे स्वयकि, अले छं खालिगु लप्पा तया: वयागु विरोधय् अगमवाणी लहा।

8 छन्त जिं खिपतं ची, अले छंगु घेराया दित सिमध:तले छं थुखे उखे स्वये फइ मखु।

9 “अनंलि छव व तछव, कय्गू व मुसू, दुसि व फापर कया: छग: थलय् ति अले उकि छंगु लागि मरि छु! व छं थ: स्वस: व गुइन्हु (३९०) तक ग्वारातुलाच्चंगु इलय् न।

10 उकि छं न्हि निइगू शेकेल* लना: लिका:, छं व न्हि छक: छगू हे इलय् नयेमा।

11 छन्त छन्हुया छगू हीनया खुब्बय् छब्ब† ल: दइ। व छं इलय् ब्यलय् त्वँ।

12 तछवया ग्वारामरि थें दय्का: छं न, उकियात छं इमिसं खंक हे सिँया पलेसा मनुतयगु खि च्याका: छु!”

13 परमप्रभुं धयादिल, “थुकथं हे इस्राएलयापि मनुतयसं जिं इमित लिनाछवयेगु मेगु जातितयगु दथुइ अशुद्ध नसा नइ।”

14 अले जिं धया, “हे परमप्रभु परमेश्वर थथे मजुइमा, जिं थ:त गुबलें अशुद्ध यानागु मदु। जिं ल्याय्महबलयनिसें थौं तक गुबलें थ: हे सीम्ह वा पशुतयसं स्या:म्ह पशुया ला नयागु मदु। जिगु म्हुतुया दुने छं नं अशुद्ध ला दुहां वंगु नं मदुनि।”☆

15 वयकलं जित: धयादिल, “स्व, जिं छन्त मनुया खिया पलेसा साया सौनं मरि छुइके बी। उकि हे छं थ:गु मरि छु।”

16 अनंलि वयकलं जित: धयादिल, “अय् सीमानिम्ह मनु, जिं यस्शलेमय् अन्न वयेगु बन्द यानाबी। आ: लना लना: धन्दा कया: इमिसं मरि नइ, अले दाना दाना: ग्याग्यां इमिसं ल: त्वनी।

17 छायाधा:सा इमित नयेत मरि व त्वनेत ल: गाइ मखु। छम्हयसिनं मेम्हयसित खनीबलय् इपि थारान्हुइ, अले थ:गु हे पापं याना: इपि गंसि जुजुवनी।”

* 4:10 ४:१० निइगू शेकेल थथे धयागु २३० ग्राम ति ख: † 4:11 ४:११ छगू हीनया खुब्बय् छब्ब थथे धयागु ध्व निखल्ला त्वनेगु ल: ख: ☆ 4:14 ४:१४ लेवी ११:१-४७; १७:१५; प्रे १०:१४

5

वइगु न्यायया चिं

1 “आः, अय् सीमानिम्ह मनु, छपु ज्वःगु तरवार का, उकियात नौयागु ख्वःचा थें छ्यलाः उकि थःगु सँ व दाह्नी खा! अले लनेगु तराजु कयाः सँयात ब्वथ!

2 शहरयात घेरय् याःगु दि सिधइबलय् सँयागु स्वब्वय् छब्वयात शहरया दुने मिइ छवय्काब्यु! मेगु स्वब्वय् छब्व सँयात शहरया प्यखेरं तरवारं कुचा कुचा यानाब्यु, ल्यं दुगु स्वब्वय् छब्वयात धाःसा फसय् ब्वय्काब्यु। छायाःसा उमित जिं तरवार ज्वनाः लिनाछवये।

3 तर छं भचा सँ कयाः थःगु वसतय् प्वःचिनाः ति!

4 हाकनं उकिं नं भचा सँ कयाः मिइ तयाः छवय्काब्यु। अनं मि पिहां वयाः फुक्क इस्राएलयात छवयेकाबी।”

परमेश्वरं यरूशलेमयात सजॉय बी धकाः धयादीगु

5 “जि, परमप्रभु परमेश्वरं थथे धाये – यरूशलेम थ्व हे खः, थुकियात जिं जातितयगु दथुइ तयागु दु, थुकियागु छचाःखेरं देशत दु।

6 तर थ्वं जिगु नियमया विरोधय् ज्या यानाः मेगु जातितयसं स्वयाः अप्वः मभिंगु ज्या यात। अले जिगु विधिया विरोधय् ज्या यानाः प्यखेरं च्वंगु जातितयसं स्वयाः अप्वः बांमलाःगु ज्या यात। धात्थें इमिसं जिगु नियमयात हेला यात। धात्थें इमिसं जिगु नियम पालन याःगु मदु।

7 “उकिं जि, परमप्रभु परमेश्वरं थथे धाये – छिपिं थःगु प्यखेरं दुपिं जातित स्वयाः अप्वः जिगु नियम पालन मयाइपिं जूगु दु, छिमिसं जिगु विधि व नियम पालन याःगु मदु। छिपिं जःखः दुपिं जातितयगु तह तक नं थ्यंगु मदु।

8 “उकिं जि, परमप्रभु परमेश्वरं थथे धाये – हे यरूशलेम, जि हे छंगु विरोधय् दु, अले मेगु जातितयगु न्ह्यःने हे जि थःम्हं छन्त सजॉय बी।

9 अले छंगु फुक्क घच्चाइपुगु ज्याया कारणं जिं छन्त थथे याये, गथे जिं आः तक गुबलें यानागु मदु, अले लिपा गुबलें याये नं मखु।

10 उकिं छंगु दथुइ मांभौनं थः मस्तयत्त व मस्तयसं थः मां बौयात नइ। छायाःसा जिं छन्त सजॉय बी, अले छिमि म्वानाच्च्वपिन्त फसय् छ्यालब्याल यानाबी।✧

✧ 5:10 ५:१० लेवी २६:२६; व्य २८:५३; २ राज ६:२८-२९; यर ११:१; विलाप २:२०; ४:१०; जक ११:९

11 “गथे जि धात्थें म्वाःम्ह खः, जि, परमप्रभु परमेश्वरं धाये, छंगु फुक्क घच्चाइपुग मूर्ति व छं याःगु घच्चाइपुग व्यवहारपाखें जिगु पवित्र थाय्यात छं अशुद्ध याःगुलि जिं धात्थें हे छिमित नाश याये, जिं छिमित मायां स्वये मखु अले जिं छन्त दया नं याये मखु।

12 छिमि स्वब्वय् छब्व मनूत महामारी वा अनिकालं सी, अले स्वब्वय् छब्व छंगु पःखाःया पिने तरवारं सी, अले स्वब्वय् छब्वयात जिं प्यखेरं छ्यालब्याल यानाबी। अले नांगा तरवार ज्वनाः जिं इमित ली।

13 “थुकथं जिगु तं क्वलाइ, अले इमिगु विरोधय् दुगु जिगु तं शान्त जुइ। जिं थुकथं बदला काये। जिगु तं इमिके प्वके धुंकाः इमिसं जि परमप्रभुं हे थःगु जोशय् थ्व खँ धाःगु खः धकाः सी।

14 “उकिं, जिं छन्त तहसनहस यानाबी। छंगु प्यखेंपाखेंयापिं जातियापिं मध्ये सुं अनं जुयाः वनीबलय् वं छिमित हेस्याइ।☆

15 जिगु तं व इवैकं छंके लाइबलय् अले जिं छन्त सजाँय बीबलय् छिमि प्यखेरं च्वपिं जातित गयाइ। इमिसं छन्त बेक्वः मिखां स्वइ, अले छन्त हेस्याइ। जि परमप्रभुं हे थ्व धयागु खः।

16 जिं छन्त अनिकालया जिगु च्वामुगु व नाश याइगु वाणं कय्कीबलय् छन्त नाश यानाः हे त्वःते, अले जिं छन्थाय् झन अप्वः अनिकाल हये। अले छिमिगु अन्न वइगु दिकाबी।

17 जिं छिमिगु दथुइ अनिकालनापं गुँपशुत छवयाहये, इमिसं छपाखें छिमि मस्त लाका काइ। छिमिगु दथुइ महामारी व हि बाः वइगु ज्या जुया हे च्वनी। जिं छन्त तरवारं पाले। जि परमप्रभुं हे थ्व धयागु खः।”☆

6

इस्त्राएलया पर्वतया विरोधय् न्याय

1 परमप्रभुयागु थ्व वचन जिथाय् वल,

2 “अय् सीमानिम्ह मनु, इस्त्राएलया पर्वततपाखे स्वयाः इमिगु विरोधय् अगमवाणी ल्हा!

3 अले धा, ‘हे इस्त्राएलया पर्वतत, परमप्रभु परमेश्वरयागु थ्व वचन न्यौ! पर्वतत व डोंडात, खुसिचा व बैसीतय्त परमप्रभु परमेश्वरं थथे धयादी – स्व, जिं थःम्हं हे छिमिथाय् लडाइँ हयेत्यनागु दु, अले जिं छिमि पुजा याइगु थाय्यात नाश याये।

4 छिमिगु वेदीत तहसनहस जुइ अले छिमिसं धुपाँय् च्याकीगु वेदीत चुंचुं यानाबीगु जुइ, अले जिं छिमि मन्तयत्त छिमिगु मूर्तितयगु न्ह्यःने हे स्यानाबी।

5 जिं इस्राएलीतयगु सीम्हत इमिगु मूर्तितयगु न्ह्यःने तयाबी। जिं छिमिगु क्वँय् छिमिगु हे वेदीया प्यखें हलाबी।

6 छिपि न्ह्याथाय् च्वंसां छिमिगु शहरतयत्त तहसनहस यानाबीगु जुइ। अले छिमिगु पुजा यायेगु थायत्त थुनाबीगु जुइ। छिमिगु वेदीत तहसनहस जुइ अले भज्यंक स्यनी। छिमिगु मूर्तित चुंचुं यानाबीगु जुइ, छिमिगु धुपाँय् च्याकीगु वेदीत कुचा कुचा याइगु जुइ। अले छिमिगु ज्या न्हंका छवइगु जुइ।

7 छिमि मन्तयत्त स्याइगु जुइ, इपि छिमिगु हे दथुइ ग्वतुली अले छिमिसं जि हे परमप्रभु खः धकाः सी।

8 “ ‘अयनं जिं छिपि मध्ये गुलिसित बचय् यानाः तये। उकिं छिपि देश देशय् छ्यालब्याल जुइबलय् जाति जातिया दथुइ छिमि छुं मन्त तरवारं बचय् जुइ।

9 अबलय् छिपि मध्ये म्वानाच्चपिन्सं जाति जातितय् दथुइ, गन इमित ज्वना यंकूगु खः, अन जितः लुमंकी। छायेधाःसा जिपाखें तापानावंगु इमिगु व्यभिचारी नुगःपाखें व इमिगु मूर्तितय् ल्युवनीगु लोभी मिखातपाखें जि दुःखी जुयागु दु। इमिसं याःगु मभिंगु ज्या व इमिगु फुक्क घच्चाइपुगु ज्याया निति इमिसं थःपिन्त हे घृणा याइ।

10 अले इमिसं जि हे परमप्रभु खः धकाः सी। जिं इमिके विपत्ति हये धकाः अथें धयागु मखु।

11 “ ‘परमप्रभु परमेश्वरं थथे धयादी, ल्हातं ल्हातय् दा— इस्राएलया घरानाया फुक्क मभिंगु व घच्चाइपुगु ज्याया कारणं तुति बैय् बस्वानाः तसकं हालाः धा— “हाय!” छायेधाःसा इपि तरवार, अनिकाल व महामारी नाश जुइ।

12 तापाक दुपि महामारी सी। सतिक दुपि तरवारं सी अले ल्यनाच्चपिं व घेराय् लाःपि धाःसा नये मखना सी। थुकथं जिं थःगु तं इमिके प्वंके।

13 पुजा याइगु फुक्क ततःजाःगु थासय्, फुक्क पर्वतया च्वका च्वकाय्, फुक्क वाउँगु सिमाया क्वय् व इमिसं थःगु मूर्तितयगु निति नस्वाःगु धुपाँय् च्याकूगु यक्व हः दुगु फुक्क स्वसिमाया क्वय् इमि स्याःपि मन्तयगु सीम्ह इमिगु मूर्तितयगु दथुइ वेदीया प्यखें छ्यालब्याल जुयाच्चनीबलय् इमिसं जि हे परमप्रभु खः धकाः सी।

14 उकिं जिं इमिगु विरोधय् थःगु ल्हाः ल्हने। दच्छिनय् च्वंगु मस्भूमिनिसें उत्तरय् च्वंगु दिब्ला तक हे इपि च्वनाच्चंगु फुक्क थाय् अर्थात इमिगु देशयात तहसनहस व सुनसान यानाबी। अले इमिसं जि हे परमप्रभु खः धकाः सी।’ ”

7

अन्त वःगु दु

1 परमप्रभुया वचन जिथाय् वल,

2 “अय् सीमानिम्ह मनु, इस्राएल देशयात परमप्रभु परमेश्वरं थथे धयादी –

“ ‘अन्त! देशया प्यखें कुन्चाय्
अन्त वःगु दु।

3 आः छंगु अन्त वये धुंकल,

अले जिं थःगु तं छन्त प्वंके।

छंगु पहःचहःकथं जिं न्याय याये।

छंगु घच्चाइपुगु ज्याया नितिं छन्त लिच्चः बी।

4 जिं माया यानाः छन्त स्वये मखु,

जिं छन्त भचा नं माया याये मखु,

जिं धातथें छंगु पहःचहः व छंगु दथुइ दुगु घच्चाइपुगु पापया नितिं

छिमित सजौय बी।

“ ‘अले जि हे परमप्रभु खः धकाः छिमिसं सी।’

5 “जि, परमप्रभु परमेश्वरं थथे धाये,

“ ‘विपत्ति, खः,

तःधंगु विपत्ति वयाच्चंगु दु।

6 अन्त वःगु दु!

अन्त वये नं धुंकल!

व छिमिगु विरोधय् दंगु दु।

स्व, व वये धुंकल।

7 अय् देशय् च्वंम्ह मनु,

छंगु नाश वये धुंकल।

ई थ्यंकः वल, व दि वये धुंकल,

पर्वत पर्वतय् हलचल जूगु दु, लसता मखु।

8 जिं थःगु तं छन्त प्वंके त्यनागु दु।

छंगु विरोधय् जिगु तं त्वःता हये।

छंगु पहःचहःकथं जिं न्याय याये।

छंगु फुक्क घच्चाइपुगु ज्याया नितिं छन्त लिच्चः बी।

9 जिं माया याना: छन्त स्वये मखु,

जिं छन्त भचा नं माया याये मखु।

छंगु पहःचहःकथं व छंगु दथुइ दुगु घच्चाइपुगु ज्याया निति

जिं छन्त सजाँयु बी।

“ ‘अले छन्त सजाँय बीम्ह परमप्रभु जि हे खः धका: छं सी।

10 “ ‘व दिं थ्व हे खः।

व वःगु दु।

छंगु नाश पिहां वये धुंकल,

मनूतयगु मभिंगु ज्या व

घमण्डया स्वां ह्यावःगु दु।

11 ल्वायेलीगु ज्या अप्वया: दुष्टतायात सजाँय बीगु कथि जूगु दु,

इमि मनूत मध्ये छम्ह नं ल्यनाच्चनी मखु।

इमिगु धन-सम्पत्ति अले मुवंगु

छुं नं ल्यनाच्चनी मखु।

12 ई वःगु दु,

दिं लिक्क वये धुंकल।

न्याइम्ह लय्मतायेमा।

मीम्ह दुःखी मजुइमा।

छाय्धाःसा तं इमि फुक्क भीडयाके लाःगु दु।

13 छाय्धाःसा इपिं निम्ह म्वानाच्चंतले

मीम्हयसित थःम्हं म्यगु जमिन हाकनं गुबलें दइ मखु।

छाय्धाःसा फुक्क भीडया बारे थ्व दर्शन हिली मखु,

इमिगु पापं याना: इपिं मध्ये

छम्हयसिनं नं थःगु ज्यान बचय् याये फइ मखु।

इस्राएल झिजांमिजां दंगु

14 “ ‘इमिसं थःगु तुरही पुया:

फुक्क तयारी याये धुंकूसां

सुं नं लडाइँलय् वनी मखु,

छाय्धाःसा जिगु तं फुक्क भीडयाके लाःगु दु।

15 पिने तरवार दु,

दुने महामारी व अनिकाल दु,

गामय् दुपि तरवारपाखें सी,

अले शहर दुने दुपिन्त अनिकाल व तरवारं नइ।

16 मनूत बचय् जूसां पर्वतय् बैसीयापि बखुंचात थें उंउं हाली।

इपि सकसिनं थथःगु अधर्मया लागि बिलाप याइ।

17 फुक्क ल्हाः याग्लाप्याग्ला जुइ,

फुक्क पुलि लः थें याग्लाप्याग्ला जुइ।

18 इमिसं भांग्रा हिनी

अले इमित आतंकं त्वपुइ।

इमिगु ख्वाः लज्यां त्वपूगु जुइ

अले इपि सकसिगु सँ खाइगु जुइ।

19 “ इमिसं थःगु वहः लैय् वांछवयाबी

अले इमिगु लुँ अशुद्ध चिज थें जुइ।

परमप्रभुया तंया दिनय्

इमिगु वहः व लुँ इमित बचय् याये फइ मखु।

इमिसं उकिं थःगु पित्याः लंके फइ मखु

वा प्वाः जाय्के फइ मखु,

छाय्धाःसा उकिं हे इमित पापया निति धेधेचुइकूगु खः।

20 इपि थःगु बाबांलाःगु तिसाय् तःधं छुल

अले उकिं इमिसं घच्चाइपुगु मूर्तित व क्वह्यंगु इवातात दयकल।

अथे जुयाः जिं थुपिं चिजयात

इमिगु निति घच्चाइपुगु यानाबी।

21 जिं थ्व फुक्क विदेशीतय्त लुतय् याकेबी,

जिं पृथ्वीयापि मभिपि मनुतय्त व फुक्क लुटया माल थें बी।

अले इमिसं उकियात अशुद्ध याइ।

22 जिं थःगु ख्वाः इमिगुपाखें फस्वय्के।

इमिसं जिगु मू वंगु थाययात अशुद्ध याइ।

दाखुंतय्सं अन दुहां वनाः उकियात अशुद्ध याइ।

23 “ सिखःत तयार या,

छाय्धाःसा देश हि बाः वय्क जूगु अपराधं जाःगु दु

- अले शहर अत्याचारं जा:गु दु।
 24 उकिं जिं इमिगु छैंत अधिकार यायेत
 मेगु जातियापिं तसकं मभिंपिं मनुत हये।
 जिं बल्ला:पिनिगु घमण्ड नं खतम यानाबी
 अले इमिगु पवित्र थायत् अशुद्ध याइगु जुइ।
 25 आतंक वइबलय इमिसं शान्ति माली,
 तर शान्ति गनं दइ मखु।
 26 छगू विपत्तिया ल्यू मेगु विपत्ति वइ
 अले छगू बांमला:गु खबरया ल्यू मेगु बांमला:गु खबर वइ।
 इमिसं अगमवत्तातपाखें दर्शन कायेत स्वइ।
 पुजाहारीतपाखें व्यवस्थाया शिक्षा
 व धर्म गुस्तपाखें सल्लाह तनावनी।
 27 जुजुं बिलाप याइ,
 शासकत निराश जुइ,
 थ्व देशयापिं मनुतयगु ल्हा: ग्याना: खाइ।
 जिं इपिलिसें इमिगु हे पह:चह:कथं व्यवहार याये,
 इमिसं या:गु न्यायकथं
 जिं इमिगु न्याय याये।
 “ ‘अले इमिसं जि हे परमप्रभु ख: धका: सी।’ ”

8

देगलय जूगु मूर्ति पुजा

- 1 खुगूगु दँया खुगूगु लाया न्यान्ह दुखुन्ह* जि थ:गु छैंय् च्वंच्वनाबलय अले
 यहदायापिं धर्मगुस्त जिगु न्ह्य:ने च्वनाच्वंबलय आकाझाकां परमप्रभु परमेश्वरया
 शक्ति जिके वल।
 2 जिं स्वया, मनु थें च्वंगु छगू आकार जिं खना। वयागु जँया क्वय् व मि थें च्वं,
 जँया च्वय् धा:सा प्वालप्वाल थीकात:गु धातु थें थी।☆
 3 वं ल्हा: थें च्वंगु आकार न्ह्यज्याका: जिगु छ्यंया सँ ज्वना: जित: थन। अनलि
 दर्शनय् आत्मां जित: पृथ्वी व आकाशया दथुइ ल्हना: यस्शलेमय् देग:या दुने

* 8:1 ८:१ १७ सेप्टेम्बर ५९२ बी.सी. ☆ 8:2 ८:२-४ इज १:२६-२८

चुकय् दुहां वनीगु उत्तर पाखेया मू लुखाया लिक्क यंकादिल। अन परमेश्वरयात तंचायकीगु छगू तःधंगु मूर्ति दु।

4 अन जिगु न्ह्यःने जिं मैदानय् दर्शनय् खनागु थें हे इस्राएलया परमेश्वरया महिमा दु।

5 अले वयकलं जितः धयादिल, “अय् सीमानिम्ह मनू, उत्तरपाखे स्व!” उकिं जिं उत्तरपाखे स्वया, वेदी दुगु चक्कंगु थाय्या उत्तरपाखे दुगु लुखाय् व परमेश्वरयात तंचायकीगु मूर्ति जिं खना।

6 वयकलं जितः धयादिल, “अय् सीमानिम्ह मनू, इमिसं छु यानाच्वंगु छं खं ला? इस्राएलया घरानां जितः जिगु पवित्र थासं तापाक तयेत थन घच्चाइपुगु ज्या यानाच्वंगु दु। तर छं व स्वयाः झन अप्वः घच्चाइपुगु ज्या खनी।”

7 अले वयकलं जितः चुकया लुखाय् यंकादिल। जिं स्वया, अंगलय् जिं छप्वाः प्वाः खना।

8 वयकलं जितः धयादिल, “अय् सीमानिम्ह मनू, थ्व अंगलय् ह्वेखँ।” अले जिं अंगलय् ह्वेखना, अन छगू लुखा जिं खना।

9 अले वयकलं जितः धयादिल, “दुने दुहां वनाः इमिसं थन यानाच्वंगु तसकं बांमलाःगु व घच्चाइपुगु ज्या स्व!”

10 उकिं जिं दुने वनाः स्वया। अन अंगःया प्येखें कियातःगु फुक्क कथंयापि घिसय् जुया जुइपिं प्राणीत व घच्चाइपुपिं पशुत अले इस्राएलया घरानाया फुक्क मूर्तितय्गु किपा खना।

11 अन मूर्तितय्गु न्ह्यःने इस्राएलयापि न्हयेम्ह धर्मगुस्त दनाच्वंगु दु। शापानया काय् याजन्याह नं इमिगु दथुइ दनाच्वंगु दु। थुपि सकलें धर्म गुस्तय्गु ल्हातय् छगः छगः गुँगू मकः दु। गुँगूया मकलं गुँगूया नस्वाःगु कुँत्याः च्वय् थाहां वयाच्वंगु दु।

12 वयकलं जितः धयादिल, “अय् सीमानिम्ह मनू, इस्राएलया घरानायापि सकलें धर्म गुस्तयसं खिउँगुलिइ थथःगु मूर्तिया पुजा क्वथाय् छु यानाच्वंगु दु छं खन ला? इमिसं धाइगु, ‘परमप्रभुं जिमित मखं, परमप्रभुं झीगु देशयात त्वःतादीगु दु।’ ”

13 वयकलं हाकनं जितः धयादिल, “इमिसं थ्व स्वयाः नं अप्वः घच्चाइपुगु ज्या यानाच्वंगु छं खनी।”

14 अले वयकलं जितः परमप्रभुया देगःया उत्तरयागु मू लुखाय् हयादिल। अन जिं फेतुनाः तम्मूज† घःया नितिं ख्वया च्वंपि मिस्त खना।

15 वयकलं जितः धयादिल, “अय् सीमानिम्ह मनू, छं थ्व खना ला? छं थ्व स्वयाः घच्चाइपुगु खँ खनी।”

16 अले वयकलं जितः परमप्रभुया देगःयागु दुनेया चुकय् हयादिल। अन वेदी व दलानया दथुइ देगःया ध्वाखाय् नीन्याम्ह ति मनू दु। थःगु जँधू परमप्रभुया देगःपाखे व ख्वाः धाःसा पुर्बपाखे स्वयकाः इमिसं पुर्बपाखे दुगु सूर्ययात भागि यानाच्चंगु दु।

17 वयकलं जितः धयादिल, “हे सीमानिम्ह मनू, छु छं थ्व खना ला? थ्व ज्या यानाच्चंपि यहदाया घरानायापि मनूतयगु लागि थ्व चिधंगु खँ खः ला? इमिसं देशयात त्वापुख्यापुं जायकाब्यूगु दु। अले जितः बारम्बार तंचायकूगु दु। इमित स्व, इमिसं थःगु न्हायया न्ह्यःने सिमा कचा तया जितः अपमान याःगु स्व।

18 उकिं जिं नं इपिलिसें तमय् ज्या याये। जिं इमित भचा नं दया याये मखु, त्वःते नं मखु। जिगु न्हायपनय् चिल्लाया दनाः हाःसां जिं इमिगु खँ न्यने मखु।”

9

मूर्ति पुजा याःपिन्त सजॉय

1 हाकनं वयकलं तसकं हालाः थथे धाःगु जिं ताल, “शहरयात सजॉय बीत ल्ययातःपि मनूतयत जिगु न्ह्यःने हजि! इपि सकसिनं ल्हातय् थथःगु हतियार ज्वनाच्चंगु जुइमाः।”

2 अले खुम्ह मनू ल्हातय् थथःगु ग्यानापुगु हतियार ज्वनाः उत्तरपाखे स्वःगु च्वय्यागु ध्वाखां वल। इपिनापं भिंगु सुतिया वसः फिनातःम्ह व जँय् मसी थल घानातःम्ह छम्ह मनू दु। इपि दुहां वयाः कँय्या वेदीया लिक्क दन।

3 इस्राएलया परमेश्वरया महिमा धाःसा करूबतय् च्वयनं थाहां वनाः देगःया लुखाखलुइ वल। अले परमप्रभुं व सुतिया वसः फिनातःम्ह व मसी थल घानातःम्ह मनूयात थःथाय् सःतादिल,✱

† 8:14 ८:१४ तम्मूज बेबिलोनीतय् छम्ह घः। दँयदसं कचाय् च्वंगु सिमाहः कुतुं वइबलय् थ्व घः सी अले मेगु दँ कचाय् सिमाहः पिहां वइबलय् हाकनं थ्व घः म्वाना वइ धकाः बेबिलोनीतय्सं विश्वास याइगु। अथे जुयाः थः घः सित धकाः क्यनेत मिस्त ख्वया तुं च्वनी। ✱ 9:3 ९:३ प्रस २५:१८-२२; गन्ती ७:८९

4 अले वयात धयादिल, “यरूशलेम शहरया फुक्क थासय् वना: अन या:गु फुक्क घच्चाइपुगु ज्याया निंति नुग: मछिंकुपिं व बिलाप या:पिं सकलें मनूतय्गु कपालय् छगू चिं ति!”✧

5 वयकलं मेपिन्त नं जिं तायेक थथे धयादिल, “छिपिं नं वयागु ल्यूल्यु शहरया फुक्क थासय् वना: स्या, सुयातं दया याये मते!

6 बुरापिं मनूत, ल्याय्महपिं ल्यासेपिं, मिस्त व मस्त सकसितं स्यानाछव! तर कपालय् व चिं दुपिं सुयातं नं थी मते! जिगु पवित्रगु थासं हे शुरू या।” उकिं इमिसं देग:या न्ह्य:ने दुपिं धर्म गुस्तपाखें हे थ्व ज्या शुरू यात।

7 अले वयकलं इमित धयादिल, “देग:यात अशुद्ध यानाब्यु, स्या:पिं मनूतय्गु सीमहं चुकते जायकाब्यु, हूँ!” उकिं इपिं वना: शहरया प्यखेरं मनूत स्यात।

8 इमिसं स्यानाच्चंबलय् जि छम्ह जक ल्यन। अले बैय् भवसुला: ख्वख्वं जिं धया, “हे परमप्रभु परमेश्वर, यरूशलेमय् थ:गु तं प्वंकादीबलय् इस्राएलयापिं ल्यंपिं सकसितं नं छिं स्यानादी ला?”

9 वयकलं जित: धयादिल, “इस्राएल व यहूदाया घरानाया पाप तसकं त:धं। देश मनू स्यायेगु ज्यां जा:गु दु अले शहर अन्यायनं जा:गु दु। इमिसं धाइगु, ‘परमप्रभुं देशयात त्व:तादीगु दु, परमप्रभुं मखं।’

10 उकिं जिं धा:सा, जिं थ:गु मिखा मेखेपाखे स्वयके, अले जिं इमित भचा नं दया याये मखु, तर इमिसं छु या:गु दु, इमिगु ज्याया लिच्च: जिं इमिगु हे छेनय् प्वंकाबी।”

11 अले व सुतिया वस: फिनात:म्ह व जँय् मसी थल घानात:म्ह मनुखं थथे धका: खबर बिल, “छिं जित: आज्ञा बियादीगु थें हे जिं यानागु दु।”

10

परमप्रभुया महिमा देग: त्व:ता वंगु

1 जिं स्वाया, कस्बतय्गु छ्यंया च्वय्यागु गुम्बजय् नीलमया सिंहासन थें छुं खनेदत।✧

2 परमप्रभुं सुतिया वस: फिनात:म्ह मनूयात धयादिल, “कस्बतय्गु क्वय् दुगु घ:चा:या दथुइ हूँ। उपिं कस्बतय्गु दथुइ दुगु च्यानाच्चंगु हेंवा: छम्हु ल्हातय् कया: शहरय् ह्लाब्यु!” अले जिं स्वयाच्चनाबलय् हे व दुहां वन।✧

✧ 9:4 १:४-६ प्रका ७:३; १:४; १४:१

✧ 10:1 १:०१ इज १:२६; प्रका ४:२

✧ 10:2 १:०२ प्रका

3 व मनु दुहां वंबलय् कस्बत धाःसा देगःया दच्छिनय् दनाच्चंगु खः। सुपाँचं दुनेयागु चुक जाल।

4 परमप्रभुया महिमा कस्बतयगु च्वयनं देगःया लुखाखलुइ वन। देगः सुपाँचं जाल अले चुक धाःसा परमप्रभुया महिमाया ज्वाल्लच्चंगु जलं जाल।

5 कस्बतयगु पपूया सः पिनेया चुकय् तक ताये दु। व सः दक्व शक्ति दुम्ह परमेश्वर नवानादीबलय् ताये दइगु सः थें च्वं।

6 परमप्रभुं व सुतिया वसः पुनातःम्ह उम्ह मनूयात थथे आज्ञा बियादिल, “उपि कस्बतयगु दथुइ वनाः घःचाःया दथुं भचा च्यानाच्चंगु हेंग्वाः का!” अले व दुहां वनाः घःचाःया लिकसं दन।

7 अले छम्ह कस्बं थःगु ल्हाः मेपिं कस्बतयगु दथुइ दुगु मिइ न्ह्यःज्याकल, अले अनं भचा हेंग्वाः कयाः सुतिया वसः पुनातःम्ह मनूया ल्हातय् व तयाबिल। व मनु हेंग्वाः ज्वनाः पिहां वल।

8 (उपि कस्बतय् पपूया क्वय् मनूया ल्हाः थें छुं खने दु।)

9 अले जिं स्वया, जिं कस्बतयगु लिक्क प्यचा घःचाः दुगु खना, छम्ह छम्ह कस्बया लिक्क छचा छचा घःचाः दु। उपिं घःचाःत प्वालप्वाल थीगु पुखराज थें खने दु।☆

10 स्वयबलय् उपिं प्यचा हे घःचाः उत्थें उत्थें च्वं, छचा घःचाःया दुने मेगु घःचाः दुगु थें च्वं।

11 इपिं वनीबलय् कस्बत स्वःगु प्यंगू दिशा मध्ये छगू दिशापाखे इपिं वनीगु। उपिं वनीबलय् लिफः स्वइ मखु। उपिं कस्बत वनीबलय् इमिगु छयं गुखेपाखे स्वःगु खः, उपिं नं उखेपाखे हे लिफः मस्वसें वनीगु।

12 इमिगु म्ह छम्हं, इमिगु जँ, ल्हाः, पपू व उपिं प्यचां घःचाः नं फुक्क मिखाया मिखां जाःगु दु।☆

13 उपिं घःचाःयात “हुस्सू चाःहिलिगु घःचाः” धाःगु जिं ताल।

14 छम्ह छम्ह कस्बया पेपा पेपा ख्वाः दु। न्हापांगु ख्वाः कस्बयागु, निगूगु ख्वाः मनूयागु, स्वंगूगु ख्वाः सिंहयागु व प्यंगूगु ख्वाः इमायागु थें च्वं।☆

15 अले उपिं कस्बत च्वय् च्वय् थाहां वन। थुपिं जिं कबार खुसि सिथय् खनापि म्वाःपि प्राणीत हे खः।

16 उपि कर्बत थुखे उखे वनीबलय् उमिगु लिक्कया घःचाःत नं इपिलिसें वनीगु। कर्बतयसं जमिनं चव्य् थाहां वनेत थःगु पपू चक्कंकीबलय् उपि घःचाःत कर्बतयगु लिक्कं चिलावनी मखु।

17 उपि कर्बत दीबलय् उपि घःचाःत नं दी, उपि चव्य् थाहां वनीबलय् घःचाःत नं चव्य् थाहां वनी, छायाःसा उपि प्राणीतयगु आत्मा उमिके दु।*

18 परमप्रभुया महिमा देगःया लुखाखलुं पिहां वनाः कर्बतयगु चव्य् दित।

19 अले जिं बांलाक स्वयाबलय् उपि कर्बत थथःगु पपू चक्कंकाः जमिनं चव्य् चव्य् थाहां वन। इपि वंबलय् उपि घःचाःत नं इपि नापनापं चव्य् थाहां वन। अले इपि परमप्रभुया देगःया पुर्बपाखेया मू ध्वाखाय् दित। इस्राएलया परमेश्वरया महिमा इमिगु चव्य् दु।

20 कबार खुसि सिथय् इस्राएलया परमेश्वरया क्वय् जिं खनापिं उपि म्वाःपिं प्राणीत थुपि हे खः। इपि कर्बत खः धकाः जिं सिल।

21 इपि फुक्कसिके प्यपा प्यपा ख्वाः व प्यपा प्यपा पपू दु, उपि पपूया क्वय् मनूयागु थें ल्हाः दु।

22 इमिगु ख्वाः जिं कबार खुसि सिथय् खनागु ख्वाः थें हे च्वं। इपि फुक्कं तप्यंक वनीगु।

11

इस्राएलया नायःतय्त सजॉय

1 आत्मां जितः चव्य् थकयाः परमप्रभुया देगःया पुर्बपाखेयागु मू लुखाय् हयादिल। अन मू लुखाय् नीन्याम्ह मनू दु। जिं अन मनूतय् नायःत अज्जूरया काय् याजन्याह व बनायाहया काय् पलत्याहयात खना।

2 परमप्रभुं जितः धयादिल, “अय् सीमानिम्ह मनू, थ्व शहरय् मभिंगु ज्या यायेत ग्वाः ग्वाःपि व मभिंगु सल्लाह ब्यूपि मनूत थुपि हे खः।

3 इमिसं धाङ्गु, ‘छैं दय्कीगु ई थ्यंकः मवनी ला? थ्व शहर छगः सामान तङ्गु थल थें खः अले थुकिया दुने झीपिं थलय् दुगु ला थें सुरक्षित जू।’

4 उकिं अय् सीमानिम्ह मनू, इमिगु विरोधय् अगमवाणी या, अगमवाणी या!”

5 अले परमप्रभुया आत्मा जिके वल, वय्कलं जितः थथे धा धकाः धयादिल। “परमप्रभुं थथे धयादी – अय् इस्राएलया घराना, छिमिसं थथे हे धयाच्वंगु दु, तर छिमिगु मनय् छु दु जिं स्यू।

6 छिमिसं थ्व शहरय् यक्व मनूत स्याःगु दु, थुकिया चुक स्याःपिं मनूतय्गु सीमंह जायकूगु दु।

7 “उकिं परमप्रभु परमेश्वरं थथे धयादीगु दु – छिमिसं स्यानाः अन वांछवःगु सीमहत ला खः, थ्व शहर धाःसा कराई खः। तर छिमित थुकिया दथुं पिने लिनाछवये।

8 छिपिं तरवार खनाः ग्याः तर जिं छिमिगु विरोधय् तरवार हये, जि, परमप्रभु परमेश्वर न्ववानागु दु।

9 जिं शहरया दथुं छिमित पितिनाछवये, छिमित विदेशीतय्त लःल्हानाबी, अले छिमित सज्जय बी।

10 छिमित तरवारं स्याइ, अले इस्राएलया सिमानाय् जिं छिमिगु न्याय याये। अबलय् जि हे परमप्रभु खः धकाः छिमिसं सी।

11 थ्व शहर छिमिगु लागि कराई जुइ मखु, न छिपिं उकिया दुने ला जुइ। जिं छिमिगु न्याय इस्राएलया सिमानाय् याये।

12 अले जि हे परमप्रभु खः धकाः छिमिसं सी। छायाःसा छिपिं जिगु विधिकथं जूगु मदु, न छिमिसं जिगु नियम पालन याःगु दु। तर छिमिसं थः जःखः च्वंपि जात जातितय्सं याः थें याना जूगु दु।”

13 जिं अगमवाणी ल्हानाच्चनाबलय् हे आकाझाकां बनायाहया काय् पलत्याह सित, अले भ्वसुलाः तसकं हालाः जिं धया, “हाय, परमप्रभु परमेश्वर! छु छिं इस्राएलया ल्यनाच्चंपिन्त भज्यंक नाश यानादी ला?”

ज्वनायंकूपिं इस्राएलीतय्गु निति आशा

14 अनंलि परमप्रभुया थ्व वचन जिथाय् वल,

15 “अय् सीमानिमह मनु, यस्सलेमयापिं मनूतय्सं छ, छिमि दाजुकिजापिं, छिमि थःथितिपिं व देशं ज्वनायंकूपिं इस्राएलया फुक्क घरानायागु बारे खँ ल्हानाच्चंगु दु। इमिसं थथे धाःगु दु, ‘छिपिं सकलें परमप्रभुपाखें यक्व तापाःगु दु। थ्व देश जिमित अधिकार यायेत ब्यूगु खः।’

16 “उकिं थथे धा, ‘परमप्रभु परमेश्वरं थथे धयादी – जिं इमित जाति जातितय्गु दथुइ तापाक छवयागु जूसां अले इमित देश विदेशय् छ्यालब्याल यानाबियागु जूसां इपिं वंगु देशय् जि छु ईया नितिं इमिगु लागि शरण कायेगु थाय् जुयागु दु।’

17 “उकिं धा, ‘परमप्रभु परमेश्वरं थथे धयादी – जिं छिमित जाति जातितपाखें मुंके। गन गन छिपिं छ्यालब्याल जूगु दु, उपि देशं जिं छिमित लित हये, अले हाकनं छिमित इस्राएल देश लितबी।’

18 “इपिं अन लिहां वइ अले इमिसं अनं उकियागु फुक्क घच्चाइपुगु इवातात व घच्चाइपुगु मूर्तित चीकाछवइ।

19 अले जिं इमित छगू हे मन बी। इमिके छगू न्हगु आत्मा तयाबी। जिं इमिगु म्हं ल्वहंया नुगः लिंकयाः इमित लायागु नुगः बी।☆

20 अले इपिं जिगु विधिकथं जुइ, जिगु नियम पालन यायेत होसियार जुइ। अले इपिं जिम्ह प्रजा जुइ, जि इमि परमेश्वर जुइ।

21 तर थःगु घच्चाइपुगु इवातात व घच्चाइपुगु मूर्तिपाखे मन वंकिपिन्त धाःसा जिं इमिसं याःगु ज्या इमिगु हे छैनय् प्वंकाबी, जि, परमप्रभु परमेश्वरं धाये।”

परमप्रभुया महिमा यरूशलेम त्वःता वंगु

22 अले थःगु लिक्क घःचाःत दुपिं कसूबतय्सं थःगु पपू चकंकल। इस्राएलया परमेश्वरया महिमा इमिगु च्वय् दु।☆

23 शहरया दथुं परमप्रभुया महिमा च्वय् थाहां वन, अले शहरया पुर्बपाखे दुगु पर्वतया च्वय् व दित।

24 अनंलि आत्मां जितः च्वय् थकयादिल, अले परमेश्वरया आत्मां जितः दर्शनय् ज्वनाः बेबिलोनय् हःपिन्थाय् लितहयादिल।

अले जिं खनागु व दर्शन जिपाखें थाहां वन।

25 अले जिं परमप्रभुं जितः क्यनादीगु फुक्क खँ यहदां ज्वनाहःपिन्त कना।

12

यहदायात ज्वनाः यंकीगु चिं

1 परमप्रभुयागु थ्व वचन जिथाय् वल,

2 “अय् सीमानिम्ह मनू, छ छगू विद्रोही घरानाया दथुइ च्वनाच्वंगु दु। इमिके स्वयेगु मिखा ला दु अयनं इमिसं मखं। इमिके न्यनेगु न्हायपं ला दु अयनं इमिसं मताः छायाःसा इपिं विद्रोही मनूत खः।☆

☆ 11:19 ११:१९-२० इज ३६:२६-२८
६:९-१०; यर ५:२१; मर्क ८:१८

☆ 11:22 ११:२२-२३ इज ४३:२-५

☆ 12:2 १२:२ यशै

3 “उकिं अय् सीमानिम्ह मनु, देशं ज्वनायंकूम्ह मनु थें थःगु सामान प्वःच्यु, अले न्हिनय् इमिगु मिखाया न्ह्यःने हे छ थः च्वनाच्चंगु थासं मेगु थासय् हूँ! इपिं विद्रोही घराना जूसां इमिसं छुं थुइ ला?

4 न्हिनय् इमिगु मिखाया न्ह्यःने हे देशं ज्वनाः यंकीबलय् यंकीगु सामान थें छ थःगु सामान पित हजि! अले बहनी इमिसं खंक हे छ ज्वंकाः तापाःगु देशय् वनेमाःम्ह मनु थें यानाः हूँ!

5 इमिसं खंक हे छ अंगलय् हः खँ, अले थःगु सामान व हे हतं पिका।

6 इमिसं स्वयाच्चंबलय् हे व सामान छंगु ब्वहलय् ति, अले सन्ध्याकाः इलय् व क्वबिया यंकि। छं त्वःताच्चंगु देश मखनेमा धकाः छं थःगु ख्वाः त्वःपु। छायाःसा जिं छन्त इस्त्राएलया घरानाया नितिं छगू चिं यानागु दु।”

7 उकिं जितः आज्ञा याःथें जिं याना। न्हिनय् देशं ज्वनायंकूम्ह मनुखं थें जिं थःगु सामान प्वःचिनाः पिकया। अले बहनी थःगु हे ल्हातं पखालय् हः खना, अले सन्ध्याकाः इलय् इमिसं स्वयाच्चंबलय् हे जि थःगु सामान ब्वहलय् तयाः वना हे छवया।

8 सुथय् परमप्रभुया थ्व वचन जिथाय् वल,

9 “अय् सीमानिम्ह मनु, इस्त्राएलया व विद्रोही घरानां छन्त ‘छं छु यानाच्चवानागु’ धकाः मन्यं ला?

10 “इमित धा, ‘परमप्रभु परमेश्वरं थथे धयादी – थ्व परमप्रभुया वचन यस्सलेमया शासक व अन च्वपिं इस्त्राएलया फुक्क घरानायापि मनुतयगु बारे खः।’

11 इमित धा, ‘जि छिमिगु नितिं छगू चिं खः।’

“जिं गथे याना, अथे हे इमित याइ। इमित देशं कैदीतय् थें ज्वना यंकी।

12 “इमिगु दथुइ दुम्ह शासक सन्ध्याकाः इलय् थःगु सामान ब्वहलय् तयाः पिहांवनी। अले पःखाः तछ्यानाः पिने वनेत वयागु नितिं छगू हः खनी। अले थःम्हं त्वःताच्चंगु देश मखनेमा धकाः वं थःगु ख्वाः त्वपुइ।

13 जिं वयागु नितिं थःगु जाः हले अले व जिगु जालय् लाइ। जिं वयात कल्दीतयगु देश बेबिलोनियाय् हये, तर वं व खनी मखु, व अन हे सी।☆

14 वया प्यखें दुपिं वया ग्वाहालिमित व वया सेनायात जिं फसय् छ्यालब्याल याये, अले तरवार लिकयाः इमित लितुली।

15 “जिं इमित जात जातिया दथुइ व देश देशय् छ्यालब्याल यायेबलय् इमिसं जि हे परमप्रभु खः धकाः सी।

16 तर जिं इपि मध्ये गुलिसित तरवार, अनिकाल व महामारीपाखें बचय् याये, अले इपिं गन गन वनी अनया जात जातितय्गु दथुइ इमिसं थःम्हं यानागु ज्या घच्चाइपुगु खः धकाः स्वीकार याइ, अले इमिसं जि हे परमप्रभु खः धकाः सी।”

17 हाकनं परमप्रभुया थ्व वचन जिथाय् वल,

18 “अय् सीमानिम्ह मनु, छं थुरथुर खाखां थःगु नसा न, ग्यानाः थुरथुर खाखां थःगु लः त्वे।

19 देशयापि मनूतय्त् धा, ‘यस्सलेमय् व इस्राएल देशय् च्वंपिनिगु बारे परमप्रभु परमेश्वरं थथे धयादी, इमिसं ग्याग्यां थःगु नसा नइ, अले निराश जुजुं थःगु लः त्वनी। छायाःसा अन च्वंपिनिगु त्वापुख्यापुया कारणं अन दुगु फुक्क चिजनापं इमिगु देशयात उजाड याइ।

20 मनूत च्वनाच्चंगु शहरत सुनसान जुइ, अले देश नाश जुइ। अले इमिसं जि हे परमप्रभु खः धकाः सी।”

इस्राएलया निंति छगू न्हूगु उपदेश

21 हाकनं परमप्रभुया थ्व वचन जिथाय् वल,

22 “अय् सीमानिम्ह मनु, ‘दिं फुना वनाच्चनी, अयनं छगू नं दर्शन पूरा जुइ मखु,’ धकाः छिमिसं इस्राएल देशया बारे धइगु उखानया छु अर्थ दु?

23 उकिं इमित धा, ‘परमप्रभु परमेश्वरं थथे धयादी – जिं थ्व उखानया अन्त यानाबी, अले इमिसं इस्राएलय् थ्व उखान हाकनं गुबलें धाइ मखु।’ तर इमित धा, ‘फुक्क हे दर्शन पूरा जुइगु दिं लिक्क हे दु।

24 छायाःसा आवंलि गुबलें इस्राएलयापि मनूतय्गु दथुइ मखुगु दर्शन व साइत स्वइगु जुइ मखु।

25 तर जिं धायेमाःगु खँ जि परमप्रभु थःम्हं हे धाये, अले गुगु वचन जिं धाये व पूरा नं याये। व लिबाइ मखु, छायाःसा अय् विद्रोही घराना, छिमिगु दिनय् हे जिं धयागु खँ जिं पूरा याये, परमप्रभु परमेश्वरं धयादी।”

26 परमप्रभुया थ्व वचन जिथाय् वल,

27 “अय् सीमानिम्ह मनु, इस्राएलया घरानां थथे धयाच्चंगु दु, ‘वं खंगु दर्शन यक्व दें लिपा जक पूरा जुइ। वं यक्व लिपाया ईयागु अगमवाणी ल्हाइगु।’

28 “उकिं इमित धा, ‘परमप्रभु परमेश्वरं थथे धयादी – जिं धयागु छगू खँ नं पूरा जुइत आः लिबाइ मखुत तर जिं छु धयागु दु व पूरा जु हे जुइ, परमप्रभु परमेश्वरं धयादी।’ ”

13

फताहा अगमवक्तातयत् सजॉय

1 परमप्रभुयागु थ्व वचन जिथाय् वल,

2 “अय् सीमानिम्ह मन्, आः अगमवाणी ल्हानाच्च्वपिं इस्राएलया अगमवक्तातयगु विरोधय् अगमवाणी ल्हा, थःगु हे मनं अगमवाणी ल्हाइपिन्त धा, ‘परमप्रभुया वचन न्यँ।

3 परमप्रभु परमेश्वरं थथे धयादी – छुं दर्शन मखंसां थःगु हे आत्माया खँया ल्यु वनीपिं मूर्ख अगमवक्तातयत् धिक्कार दु।

4 अय् इस्राएल, छिमि अगमवक्तात ला भग्नावशेषय् च्वनीपिं ध्वंचात थें जूगु दु।

5 परमप्रभुया दिनय् लडाइँलय् व धिसिलाक्क दनाच्च्वने फयेमा धकाः छिपि इस्राएलया घरानाया निति दुंगु पःखाः ल्हनेत तकं मवं।

6 इमिगु दर्शनत धात्थेंगु मखु व इमिगु ज्वखना फताहा खः। इमिसं धाइगु, “परमप्रभुं धयादी,” तर परमप्रभुं इमित छव्याहयादीगु हे मखु। अयनं इमिसं इमिगु वचन पूरा जुइ धकाः आसा याइ।

7 छिमिसं मखुगु दर्शन खंगु व मखुगु ज्वखना स्वःगु मखु ला? छिमिसं धाइगु, “परमप्रभुं धयादी,” तर जिं छुं धयागु मदु।

8 “ ‘उकिं परमप्रभु परमेश्वरं छिमित थथे धयादी – छिमिसं मखुगु खँ ल्हाःगुलि व मखुगु दर्शन खंगुलि जि छिमिगु विरोधय् दु, परमप्रभु परमेश्वरं धयादी।

9 जिगु ल्हाः मखुगु दर्शन खनीपिं व मखुगु ज्वखना ल्हाइपिं अगमवक्तातयगु विरोधय् जुइ। इमित जिगु प्रजाया सभाय् थाय् दइ मखु। इमिगु नां इस्राएलया घरानाया धलखय् दइ मखु। इस्राएल देशय् इपिं दुहां वने दइ मखु। अले जि हे परमप्रभु परमेश्वर खः धकाः छिमिसं सी।

10 “ ‘छाय्धाःसा शान्ति मदुबलय् नं जिमि मनूतयत् “शान्ति दु” धकाः धयाः इमिसं मखुगु लैय् यंकूगु दु। अले मनूतयस्सं तसकं बमलाःगु पःखाः दयकूबलय् थुपि अगमवक्तातयस्सं उकियात सख्याः पानाः त्वपुयाब्यूगु दु।☆

11 उकिं उपिं सख्याः पानाः त्वपुयाब्यूपिन्त व दुनी धकाः धयाब्यु! तसकं वा वइ, यक्व प्वें गाइ अले तसकं वाफय् वइ।

12 व पःखाः दुनीबलय् मनूतयस्सं छिमित थथे धकाः मन्यनी ला, “छिमिसं थुकी पानागु सख्याः गन वन?””

13 “ ‘उकिं परमप्रभु परमेश्वरं थथे धयादी – जिगु तंम्वय् जिं छगू ग्यानापुगु वाफय् वय्काबी, अले जिगु तंम्वय् प्वँ व तसकं वा वइ, गुकिं व पःखाःयात थुनाबी।

14 अले छिमिसं सख्वाः पाःगु पःखाःयात जिं थुनाबी अले उकियात बै तक हे माथं वंकाबी। व दुनीबलय् छिपि नं उकिं ल्हानाः नाश जुइ, अले परमप्रभु जि हे खः धकाः छिमिसं सी।

15 थुकथं जिं थःगु तं पःखाः व उकी सख्वाः पाःपिं मनूतय्गु विरोधय् प्वंके। जिं छिमित धाये, “व पःखाः आः मन्त, उकी सख्वाः पाःपिं नं मन्त,

16 यस्शलेमया बारे अगमवाणी ल्हाःपिं व अन शान्ति मदुसां शान्तिया दर्शन खपिं इस्राएलया अगमवक्तात नं मन्त, परमप्रभु परमेश्वरं धयादी।” ’

फताहा मिसापिं अगमवक्तातय् सजँय

17 “अय् सीमानिम्ह मनु, थःगु ख्वाः थःगु हे मनं अगमवाणी ल्हाइपिं इस्राएलया म्हायिपिंपाखे स्वय्कि। इमिगु विरोधय् अगमवाणी ल्हानाः थथे धा,

18 ‘परमप्रभु परमेश्वरं थथे धयादी – धिक्कार दु, उपिं मिस्तय्त गुपिन्सं थःगु नाडीइ जन्तर ची अले मनूतय्गु प्राण जालय् लाकेत इमिगु म्हाधिकःकथं छ्यं त्वपुइगु गाबः दय्की। छु छिमिसं जिमि मनूतय्गु प्राणयात जालय् लाकाः थःगु प्राणयात धाःसा बचय् यानातयेगु ला?

19 छिमिसं छम्ह निम्हु तछ्व व छपा निपा मरिया निंति जिमि प्रजाया न्ह्यःने जितः हेला यात। मखुगु खँ न्यनीपिं जिमि प्रजायात मखुगु खँ ल्हानाः सीम्वाःपिं मनूतय्त छिमिसं स्यात। म्वायेम्वाःपिं मनूतय्त धाःसा छिमिसं बचय् याना तल।

20 “ ‘उकिं परमप्रभु परमेश्वरं थथे धयादी – जि छिमिसं मनूतय्त झंगःतय्त थें जालय् लाकीगु छिमिगु जादुयागु जन्तरया विरोधय् दु। जिं छिमिगु ल्हातं व लाकाकाये। छिमिसं झंगःयात थें जालय् लाकूपिं मनूतय्त जिं त्वःतके।

21 जिं छिमिगु गाबः नं लिक्कायाबी, अले जिमि प्रजायात छिमिगु ल्हातं त्वःतके। इपिं हाकनं गुबलें छिमिगु ल्हातय् शिकार जुइ मखु। अले छिमिसं जि हे परमप्रभु खः धकाः सी।

22 छिमिसं मखुगु खँ ल्हानाः धर्मीतय्त निराश यात, तर जितः इपिं निराश जूगु मयः। छिमिसं दुष्टतय्त थःगु मभिंगु पहःचहः मत्वःतेत हःपाः बिल, इमिसं मभिंगु पहःचहः त्वःतूगु जूसा इमिगु प्राण बचय् जुइगु।

23 उकिं आवंलि छिमिसं मखुगु दर्शन खनी मखु, अले ज्वखना स्वइ मखु। जिं छिमिगु ल्हातं थः मनूतय्त त्वःतके। अले छिमिसं जि परमप्रभु खः धकाः सी।” ’

14

इस्त्राएलया नायःतयस्सं याःगु मूर्ति पुजा

1 इस्त्राएलया सुं धर्मगुस्त जिथाय् वल, इपिं जिगु न्ह्यःने फेतुनाच्चंबलय्

2 परमप्रभुयागु थ्व वचन जिथाय् वल,

3 “अय् सीमानिम्ह मनु, थुपिं मनूतयस्सं थःगु मनय् मूर्ति तःगु दु, अले थःगु ख्वाःया न्ह्यःने पापय् लाकीगु खँ तःगु दु। जिं इमित जिके सल्लाह कायके बी ला?

4 उकिं इपिलिसैं खँ ल्हानाः इमित थथे धा, ‘परमप्रभु परमेश्वर थथे धयादी – इस्त्राएलयाम्ह सुं नं मनू थःगु मनय् मूर्ति तयाः, थःगु मिखाया न्ह्यःने पापय् लाकीगु खँ तयाः अगमवक्तायाथाय् वइ, वयात जि परमप्रभु थःम्हं हे वयागु मूर्ति पुजाकथं लिसः बी।

5 इमिगु मूर्तितयगु कारणं जितः त्वःतावंपिं इस्त्राएलया घरानाया नुगःयात जिं हाकनं ज्वनेत जिं थथे याये।’

6 “उकिं इस्त्राएलया घरानायात थथे धा, ‘परमप्रभु परमेश्वरं थथे धयादी – पस्ताय् चा! थःगु मूर्तितपाखें लिहां वा, अले थःगु फुक्क घच्चाइपुगु ज्या त्वःति!

7 “ ‘इस्त्राएलया घरानायाम्ह सुं नं अथवा इस्त्राएलय् च्वनाच्चंम्ह सुं नं परदेशी थःगु नुगलय् मूर्ति तयाः अथवा पापय् लाकीगु खँ थःगु ख्वाःया न्ह्यःने तयाः जिपाखें अलग जुइ, अयनं जिके छुं खँ न्यनेत अगमवक्तायाथाय् वल धाःसा, जि परमप्रभु थःम्हं हे वयात लिसः बी।

8 जिं व मनूपाखें थःगु ख्वाः फस्वय्के, अले जिं वयात छगु नमूना व न्हीकीगु खँ यानाबी। जिं वयात जिम्ह मनूतपाखें अलग तयाबी। अले छिमिसं जि हे परमप्रभु खः धकाः सी।

9 “ ‘अले उम्ह अगमवक्तायात लोभ क्यनाः अगमवाणी याकेब्यूगु दुसा, जि परमप्रभुं हे उम्ह अगमवक्तायात लोभ क्यनागु खः। जिं थःगु ल्हाः वयागु विरोधय् ल्हने, अले जिगु प्रजा इस्त्राएलया दथुं वयात नाश यानाबी।

10 इपिं निम्हयसिं थथःगु अपराधया दोष फइ, अगमवक्ताया दोष व सल्लाह काइम्हयसिगु दोष उति हे जुइ।

11 अले इस्त्राएलया मनूत जिपाखें गुबलें थुखे उखे वनी मखु, इमिसं थःगु फुक्क पापं थःत अशुद्ध याइ मखु। इपिं जिम्ह प्रजा जुइ, अले जि इमि परमेश्वर जुये, परमप्रभु परमेश्वरं धयादी।’ ”

परमप्रभुया न्याय वइगु पक्का

12 परमप्रभुया थ्व वचन जिथाय् वल,

13 “अय सीमानिम्ह मनु, धाये कि, देशं जिगु विरोधय पापयात अले व देशयागु नसा वइगु दिकेत व अन अनिकाल छवयेत अले अनयापिं मनूत व पशुत स्यायेत जिं वयागु विरोधय ल्हा: ल्हन धा:सा,

14 थुपिं स्वम्ह मनूत नोआ, दानिएल व अय्यूब थ:पिं अन दुगु दुसां इमिसं थ:गु धार्मिकतापाखें थ:त जक बचय् याये फइगु ख:, परमप्रभु परमेश्वरं धयादी।

15 “धाये कि, जिं उगु देशय् गुँपशुत छवल, अले वयात काय्म्ह्याय् मदुपिं यानाबिल अले व देश उजाड जुल, उपिं पशुतयसं याना: उगु थासं सुं वये वने मफुत,

16 गथे जि धात्थें म्वा:म्ह ख:, जि, परमप्रभु परमेश्वरं धयादी, अन थुपिं स्वम्हं दुगु जूसां थुमिसं थ: काय्म्ह्याय्पिं नं बचय् याये मफइगु ख:। थुपिं हे जक बचय् जुइगु, देश धा:सा उजाड जुइगु।

17 “अथवा थ्व देशया विरोधय तरवार हया: ‘देशया प्यखें थ्व तरवार चले जुइमा’ धका: जिं धाल धा:सा अले जिं अन च्वंपिं मनूत व पशुत स्यानाबिल धा:सा,

18 गथे जि धात्थें म्वा:म्ह ख:, जि, परमप्रभु परमेश्वरं धाये, थुपिं स्वम्ह मनूत अन दुगु जूसां थुमिसं थ: काय्म्ह्याय् बचय् याये मफइगु ख:। थुपिं थ: जक बचय् जुइगु।

19 “अथवा जिं उगु देशय् महामारी छवल अले हिबा: वय्का: अन च्वंपिं मनूत व पशुत स्याना: जिगु तं प्वंकल धा:सा,

20 नोआ, दानिएल व अय्यूब अन दुगु जूसां गथे जि धात्थें म्वा:म्ह ख:, जि, परमप्रभु परमेश्वरं धाये, इमिसं थ:काय् म्ह्याय्पिन्त बचय् याये मफइगु। इमिसं थ:गु धार्मिकतापाखें थ:गु जक ज्यान बचय् याये फइगु ख:।

21 “परमप्रभु परमेश्वरं थथे धयादी — जिं यरूशलेमय् अन च्वंपिं मनूत व पशुत स्यायेत जिगु प्यंगू सजाँय— तरवार, अनिकाल, गुँपशुत व महामारी छवयेबलय् इन गुलि बांमलाइगु जुइ!✧

22 अयनं अन सुं काय्म्ह्याय्पिं म्वानाच्वंगु दइ, इमित अनं लिक्का: छिमिथाय् हइ। इपिं छिमिथाय् वइबलय् छिमिसं इमिगु पह: व ज्या खनीबलय् जिं यरूशलेमय् हयागु विपत्तिया बारे छिमित सान्त्वना दइ। जिं अन हयागु छगू छगू विपत्तिया बारे छिमित सान्त्वना दइ।

23 इमिगु पह: व ज्या खना: छिमित सान्त्वना दइ, छायाधा:सा जिं अन छु छु याना, जिं अर्थे या:गु मखु धका: छिमिसं सी, परमप्रभु परमेश्वरं धयादी।”

15

यरूशलेम, ज्यालगे मजूगु दाखमा

1 परमप्रभुयागु थ्व वचन जिथाय् वल,

2 “अय् सीमानिम्ह मनु, छमा दाखमाया सिं गय् याना: गुँइच्चंगु मेगु सिमातय् कचा स्वया: भिं जुइ फइ?

3 उकिया सिं छुं चिज दय्के जी ला? मनूतय्सं उकिं छुं थल यख्खायेत नकिं दय्की ला?

4 अले उकियात सिं याना: मिइ तये धुंका: अले उकिया निखेंपाखें मि च्याना: दथुइच्चंगु ब्व हेंग्वा: जुइ धुंका: व छुं ज्याया लागि ज्यालगे जुइ ला?

5 व छमा जूबलय् हे छुं ज्यालगे मजू धा:सा उकियात मिं छवय्का: हेंग्वा: जुइ धुंका: झन व छुं ज्या वइ धका:?

6 “उकिं परमप्रभु परमेश्वरं थथे धयादी – गथे जिं गुँइच्चंगु सिमात मध्ये दाखया मायात सिं जुइत मियात बियागु दु, अथे हे जिं यरूशलेमय् च्वपिं मनूतय् यानाबी।

7 अले जिं थ:गु ख्वा: इमिगु विरोधय् तये, इपिं मिं पिहां व:सां इमित मिं हे भस्म यानाबी। जिं थ:गु ख्वा: इमिगु विरोधय् स्वय्केबलय् छिमिसं जि हे परमप्रभु ख: धका: सी।

8 इमिसं जित: विश्वासघात या:गुलि जिं इमिगु देशयात तहसनहस यानाबी, परमप्रभु परमेश्वरं धयादी।”

16

यरूशलेम विश्वास यायेबह: मजूम्ह कला:

1 हाकनं परमप्रभुयागु थ्व वचन जिथाय् वल,

2 “अय् सीमानिम्ह मनु, यरूशलेमयात वयागु घच्चाइपुगु ज्या क्यना:

3 थथे धा, ‘परमप्रभु परमेश्वरं यरूशलेमयात थथे धयादी – छंगु पुर्ख्यौली व छ बगु देश कनानीतयगु देश ख:, छिमि बौ छम्ह एमोरी ख:, अले छिमि मां छम्ह हितीनी ख:।*’

* 16:3 १६:३ एमोरी-हिती अबलय् एमोरी व हिती धाइपि दुष्ट घ:तय्त पुजा याइपि दुष्ट विदेशी मनूत ख: धका: इस्राएलीतय्सं बिचा: याइगु।

4 छ बूबलय सुनानं छंगु पि मध्ये, छन्त सफा यायेत सुनानं लखं म्वःल्हुइकामब्यू। सुनानं छंगु म्हय चि बुलामब्यू† अले सुनानं छन्त वसतं भुंका मब्यू।

5 थ्व फुक्क ज्या यायेत सुनानं छन्त दया मक्यं, बरु छ बूबलय घच्चाइपुगु चिज थें छन्त पिने ख्यलय वांछवयाबिल।

6 “ ‘अले जि छंगु लिक्क जुयाः वनाबलय जिं छन्त हिइ ग्वारा ग्वारा तुलाच्चंगु खना, अले छ हिइ लानाच्चंबलय हे जिं छन्त धया, “छ म्वाना च्वै!”

7 ख्यलय च्वंगु माचा थें जिं छन्त ब्वलंकेबिया। छ ब्वलन अले तधिकः जुयाः ल्यासे जुल। छंके दुस्वः दत अले छंगु सँ ताहाक जुल। छ न्हापा नांगाम्ह व वसः पुना मतःम्ह खः।

8 “ ‘अनंलि जि छंगु लिक्क जुयाः वनाबलय जिं छन्त मतिना याये ज्यगु उमेरय थ्यंगु खना। स्व, जिं थःगु गाः चक्कंकाः छंगु नांगा म्हय फाय्काबिया। जिं छलिसें पाफयाः ब्याहाया बाचा चिना, अले छ जिम्ह जुल, परमप्रभु परमेश्वरं धयादी।

9 “ ‘अनंलि जिं छन्त लखं म्वःल्हुइकाः छंगु हि सिलाबिया। छंगु म्हय जैतूनया चिकं बुलाबिया।

10 जिं छन्त बुत्ता भरय यानातःगु वसः पुंकाबिया अले छंगु तुतिइ छेंगूयागु लाकां न्हाकाबिया। जिं छन्त भिंगु सुतियागु वसः पुंकाबियाः छन्त मू मू वंगु वसतं त्वपुयाबिया।

11 जिं छन्त तिसां तिकाः बांलाकाबिया— जिं छंगु ल्हातय चुर्नि न्हाकाबिया, अले छंगु गःपतय बांलाःगु सिखः क्वखाय्काबिया,

12 जिं छंगु न्हासय फुलिचा व छंगु न्हायपनय चाःचा तयाबिया अले छंगु छैनय बांलाःगु श्रीपेच पुइकाबिया।

13 थुकथं छ लुँ व वहः, भिंगु सूती कापः, थीकेगु कापः व बुत्ता दुगु वसतं बांलात। छंगु नयेगु नसा नचुगु छवचुं, कस्ति व जैतूनया चिकं खः। छ तसकं बांलात, छ रानी जुइ बहःम्ह जुल।

14 छ बांलाःगुलिं छंगु नां जाति जातितयगु दथुइ बयबय जुल, छायाःसा जिं छन्त बियागु गौरवया कारणं छ तसकं बांलाःगु खः, परमप्रभु परमेश्वरं धयादी।

15 “ ‘तर छ थःगु बांलाःगुलिइ भलसा तयाः थःगु नां बयबय यानाः छ छम्ह वेश्या जुल। छंगु लिक्क जुयावनीपि न्हाम्हसित नं छ थःत वेश्या थें बिल, अले लैय् जूपि न्हाम्हयसित नं छंगु बांलासू बिल।

† 16:4 १६:४चि बुलेगु अबलय न्हम्ह बूम्ह मचायात थुपि प्यता खँ याःसा बांलाइ धकाः इमिसं विश्वास याइगु।

16 थःगु वसः कयाः छं रंगिबिरंगी पुजा यायेगु थायत दय्कल, अन हे छं थःगु वेशयाया ज्या याना हल।‡ थज्याःगु मभिंगु ज्या ला न्हापा गुबलें जूगु मदु, लिपा गुबलें जुइ नं मखु।

17 जिं छन्त बियागु लुँ, वहःयागु छंगु बांभांलाःगु तिसातपाखें छं थःगु निति मिजं मूर्तित दय्काः उपिलिसे वेशयाया ज्या यात।

18 छं थःगु बुत्ता भरय् यानातःगु वसः इमित त्वपुइत यंकल, जिगु चिकं व धुपाँय इमिगु न्ह्यःने छाल।

19 जिं छन्त नयेगु नसा नं ज्वरय् यानाबिया, नचुगु छुचुं, कस्ति व जैतूनया चिकं छन्त नयेत बिया। तर छं उपि इमिगु न्ह्यःने नस्वाःगु बास्ना जुइत छाल। अथे हे जुल, परमप्रभु परमेश्वरं धयादी।

20 “ ‘अले छं जिगु निति बुझ्कूपिं छिमि काय् म्हायपिन्त यंकाः मूर्तितयगु लागि नयेगु नसाकथं बलि छाल। छु छंगु थ्व वेशयाया ज्या चिधंगु खँ खः ला?

21 छं जिम्ह काय् म्हायपिन्त स्यानाः उपि मूर्तितयगु निति बलि छाल।

22 छंगु थ्व फुक्क घच्चाइपुगु ज्या व वेशयाया ज्याय् छं थःगु ल्याय्म्हबलयया दित लुममंकू— उबलय् छ नांगा, वसः मदुम्ह व थःगु हिइ ग्वारा ग्वारा तुलाच्चंगु खः।

23 “ ‘धिव्कार! धिव्कार छन्त! परमप्रभु परमेश्वरं धयादी। थ्व फुक्क मभिंगु ज्या नापनापं

24 छं थःगु निति द्रुम्बःचा दय्कल अले चुक पतिकं थःगु निति पुजा यायेगु ततःजाःगु थाय दय्कल।

25 लँया कुं पतिकं छं थःगु निति पुजा यायेगु ततःजाःगु थाय दय्कल, अले अनं जुया वनीपिं न्ह्याम्हसित नं थःगु म्ह लःल्हानाः छं थःगु वेशयाया ज्या अप्वय्कल अले थःगु बांलाःसूयात घच्चाइपुइकल।

26 थः मिसाह्यः जलाःखलाः तःपुगु लिग दुपि मिश्रयापिलिसें नं छं वेशयाया ज्या यात। थःगु वेशयाया ज्या अप्वय्काः जितः तंचाय्कल।

27 उकिं जिं थःगु ल्हाः छंगु विरोधय् ल्हनाः, अले छंगु इलाका चिकु यानाबिया, जिं छन्त छिमि शन्नत पलिशती मिसातयगु लोभया शिकार यानाबिया। इपिं छंगु क्वह्नांगु पहःचहः खनाः वातां जूगु खः।

28 छं अश्शूरीतलिसें नं वेशयाया ज्या यात, छायाधाःसा छ लुमधंम्ह खः। अथे जूसां छ लुमधं।

‡ 16:16 १६:१६ हिब्रू भाषाय् थ्व पदय् लिपितय् प्यंगू खँवः बियातःगु दु, थुपि खँवःया अर्थ थुइकेत तसकं थाकु।

29 ब्यापार यायेगु देश बेबिलोनिया तक नं छं थःगु वेश्या ज्या थ्यंकल। अथे जूसां छं लुमधं।

30 “ परमप्रभुयागु थ्व वचन जिथाय् वल, छंगु नुगः गुलि कमजोर, छायाःसा छं लज्या मचाःम्ह छम्ह वेश्यां थें थ्व फुक्क ज्या यात।

31 लैया कुन्चा पतिकं थःगु द्रुम्बः व चुक पतिकं छं थःगु पुजा यायेगु तःजाःगु थाय् दय्कल। अयनं छं वेश्या थें जूगु मदुनि, छायाःसा छं ज्यालायात घृणा यात।

32 “ अय् व्यभिचारी कलाः, छं थः भाःतया पलेसा मेपिं मिजपिन्त यय्कीगु।

33 मिजपिन्सं सकलें वेश्यातय्त कोसेलि बी, तर छं ला अःखः थः फुक्क प्रेमीपिन्त कोसेलि बिल। छलिसें व्यभिचार यायेत इपिं प्यखेरं छन्थाय् वयेमा धकाः छं कोसेलि बिल।

34 उकिं छं थःगु वेश्या ज्याय् मेपिं मिस्त स्वयाः पा। छं याःथें वेश्याया ज्या मेपिन्सं मयाः, सुं नं छन्थाय् वयाः लसपस यायेत न्यं मवः तर छं वनाः इमिके न्यन। छायाःसा छन्त सुनानं ध्यबा मब्यूसां छं थःम्हं हे ध्यबा बिल। थुकथं छं पात।

यस्शलेमया वेश्याया ज्याया सजॉय

35 “ उकिं अय् वेश्या, परमप्रभुयागु वचन न्यौं।

36 परमप्रभु परमेश्वरं थथे धयादी – छं व्यभिचार यानाः तसकं लज्या मचासैं थःगु म्ह थः प्रेमीपिन्त क्यन, थःगु मूर्तितलिसैं घच्चाइपुगु ज्या यात, अले घःतय्त थः मस्तयगु हि छाल,

37 छं मोज याःपिं, छन्त यःपिं व मयःपिं सकलें हे प्रेमीपिन्त जिं मुंके। छंगु प्यखेरं छंगु विरोधय् जिं इमित मुंके अले इमिगु न्ह्यःने छंगु नांगागु म्ह खनेदय्कः छन्त नांगा यानाबी।

38 व्यभिचार याइपिं मिसात व मनू स्याइपिं मिस्तय्त बीगु थें हे सजॉय जिं छन्त बी, जिं छंके जिगु दाहायागु तंया हि प्वंके।

39 अले जिं छन्त छं प्रेमीपिन्त लःल्हानाबी, अले इमिसं छंगु द्रुम्बःचायात थुनाबी, अले छंगु ततःजाःगु वेदीत नाश यानाबी। इमिसं छंगु वसः जबरजस्ती त्वःकी। अले छंगु बाबांलाःगु तिसात लाकाकयाः छन्त नांगा यानाः त्वःताबी।

40 इमिसं छंगु विरोधय् मनूतयगु हल हइ, इमिसं छन्त ल्वहंतं कय्की, अले छन्त तरवारं कुचा कुचा याइ।

41 इमिसं छंगु छैंत छवय्काबी, अले यक्व मिसातयगु न्ह्यःने छन्त सजॉय बी। थुकथं जिं छन्त छंगु वेश्याया ज्यापाखें पने, छं थः प्रेमीपिन्त गुबलें ज्याला नं बी माली मखु।

42 थुकथं जिं थःगु तं कम याये, अले जिगु डाहाया तं नं छपाखें चिलावनी। जि शान्त जुये, जि हाकनं तंचाये मखु।

43 “ छं थःगु ल्याय्म्हबलय्या दियात लुममंकू, तर थ्व फुक्क ज्यापाखें जितः तंचायकल, उकिं जिं छंगु ज्याया लिच्चः छंगु हे छेनय् प्वंकाबी, परमप्रभु परमेश्वरं थथे धयादी। छु छंगु मेगु फुक्क घच्चाइपुगु ज्या बाहेक छं थःगु पहःचहः स्यंकूगु मदु ला?

44 “ उखान धाइपिं सकसिनं छंगु बारे थ्व उखान धाइ, “गथे मां अथे म्हाय्।”

45 छ ला थः भाःत व मस्तयत मयय्कूम्ह छिमि मां थें च्वं, अले छ ला धातथें थः भाःतपि व थः मस्तयत मयय्कूपिं छिमि तताकेहेंपिं थें च्वं। छिमि मां छम्ह हिती खः, छिमि अबु छम्ह एमोरी।☆

46 छिमि तता थःम्हायपिनापं छंगु उत्तरपाखे च्वनीम्ह सामरियाऽ खः, छिमि केहें थः म्हायपिलिसें छंगु दच्छिनपाखे च्वनीम्ह सदोम खः।

47 अथे जूसां छ इमिगु पहःचहःकथं जूगु जक मखु इमिसं थें छं घच्चाइपुगु ज्या नं यात। उलि जक मखु, कम इलय् हे छं थःगु फुक्क पहःचहलय् थःत इपिं स्वयाः यक्व स्यंकल।

48 गथे जि धातथें म्वाःम्ह खः, परमप्रभु परमेश्वरं धयादी, छं व छिमि म्हायपिन्सं याःथें ला छिमि केहें सदोम व वया म्हायपिन्सं गुबलें याःगु मदु।

49 “ स्व! छिमि केहें सदोमया पाप थ्व खः, व अले वया म्हायपिं जिराहा खः, प्वाः जायक नइगु, याउँक च्वनीगु, तर इमिसं गरीबत व मगाःमचाःपिन्त ग्वाहालि मयाः।

50 इपिं घमण्डी खः, इमिसं जिगु न्ह्यःने घच्चाइपुगु ज्या यात। उकिं जिं इमित नाश यानाबिया, व छं खंगु हे दु।

51 “ सामरियां ला छं याःगु स्वयाः बच्छि नं पाप मयाः। इमिसं स्वयाः छं अप्वः घच्चाइपुगु ज्या याःगु दु, छं याःगु थ्व फुक्क ज्यापाखें छं थः तताकेहेंपिन्त छ स्वयाः धर्मी खने दय्काब्यूगु दु।

52 छं थःगु बेइज्जत भोगय् या, छायाःसा छं छिमि तताकेहेंपिनिगु न्याय यात। इमिसं स्वयाः छं क्वहांगु पाप याःगुलि इपिं छ स्वयाः धर्मी खने दु। उकिं लज्या चा,

☆ 16:45 १६:४५ इज १६:३ § 16:46 १६:४६सामरिया, सदोम थुपि निगू शहर परमेश्वरया आज्ञा मानय् मयाइपिं मनुत च्वनीगु थासय् लाः। सामरिया शहर उत्तरय् च्वंगु इस्राएल देशया राजधानी खः। थन आहाब जुजु थें ज्याःपिं यक्व दुष्ट जुजुपिन्सं राज्य यात। ओम्री जुजुं सामरियाय् न्हगु राजधानी दय्कगु व आहाब जुजुं थः जुजु जुबलय् व थें हे मभिगु ज्याखें याःगु खें १ राजा १६ अध्यायलय् बियातःगु दु। सदोम शहर नं तसकं मभिगु शहर खः। छिं थ्व शहरया बारे उत्पत्ति १९ अध्यायलय् ब्वनादीफु।

अले थःगु बेइज्जत भोगय् या, छायाःसा छं थः तताकेहेंपिन्त धर्मी खने दय्काब्यूग दु।

53 “ ‘अथेसां जिं सदोम व वया म्हाय्पिनिगु अले सामरिया व वया म्हाय्पिनिगु लसता व शान्ति लित हयाबी। अले इपिलिसें छंगु लसता व शान्ति नं लित हयाबी।

54 थुकथं इमित सान्त्वना बीत थःमहं याःगु फुक्क ज्याया निति छं बेइज्जत भोगय् याइ अले छ मछाले माली।

55 छं तताकेहेंपिं सदोम व सामरिया थःम्हाय्पिनापं न्हापायागु अवस्थाय् हे लिहां वइ, अले छ नं छिमि म्हाय्पिनापं न्हापायागु अवस्थाय् हे लिहां वइ।

56 छंगु घमण्डया दिनय् छं याःगु मभिंगु ज्या खनेदये न्ह्यः छिमि केहें सदोमया नां तक नं छं काइ मखुगु।

57 अथे जूसां एदोमया म्हाय्पि व वया सकलें जःलाखःलापिं व पलिशीतय् म्हाय्पिन्सं छन्त हेस्यानाच्चंगु दु, छंगु प्यखें च्वपिन्सं छन्त घृणा याइगु।

58 छं थःगु मभिंगु ज्या व घच्चाइपुगु ज्याया सजाँय भोगय् यानाच्चंगु दु, परमप्रभुं धयादी।

59 “ ‘परमप्रभु परमेश्वरं थथे धयादी — छं व्यवहार याःथें जिं छलिसें व्यवहार याये, छायाःसा छं जिलिसें पाफःगुयात हेला याःगु दु अले झीसं चिनागु बाचायात त्वाःथूगु दु।

60 अथे जूसां छ ल्याय्म्हबलय् छलिसें यानागु जिगु बाचायात लुमंकाः जिं छलिसें सदांया बाचा ची।

61 अले छं थःगु ज्या लुमंकी अले लज्या चायाः छिमि तताकेहेंपिं निम्हयसितं छं नाली। छिमि तताकेहेंपिन्त जिं छिमि म्हाय्पि थें जुइत छन्त बी, खःला जिं छलिसें चिनागु बाचा थथे ला मखु।

62 थुकथं जिं छलिसें बाचा ची अले जि परमप्रभु खः धकाः छं सी।

63 छं याःगु फुक्क ज्याया निति जिं प्रायश्चित यायेबलय् छं व फुक्क लुमंकी अले छ लज्या चाइ, छं लज्यां गुबलें थःगु म्हुतु चाय्की मखु, परमप्रभु परमेश्वरं धयादी।’ ”

17

निम्ह इमाया बाखं

1 परमप्रभुयागु थ्व वचन जिथाय् वल,

2 “अय् सीमानिम्ह मनु, इस्राएलया घरानायात थ्व बाखं व उखान धा,

3 इमित धा, 'परमप्रभु परमेश्वरं थथे धयादी – बल्ला:गु पपू व ताहाक:गु रंगिबिरंगी पा दुम्ह छम्ह त:धीम्ह इमा लेबनानय् ब्वया: वल, अले वं छपु देवदास्या दकलय् च्वय् च्वंगु च्वका ज्वन।

4 वं व कचायात त्वथुला: ब्यापारीतयूगु छगू देशय् यंका: ब्यापार याइपिनिगु छगू शहरय् पित।

5 “ ‘अनंलि वं छिमिगु देशया छुं पुसा यंका: नायुगु जमिनय् पित। वं बैसया सिमा थें यक्व ल: दुगु थासय् व पित।

6 अले व चुलि ह्या: चिजा:गु चकंगु मा जुल। उकिया कचात उम्ह इमापाखे स्वल तर उकिया हा धा:सा उकियागु हे क्वय् च्वन। उकिं व दाखया मा जुल अले उकियागु कचात बुयावल अले उकी यक्व ह: पिहां वल।

7 “ ‘तर अन बल्ला:गु पपू व यक्व पा दुम्ह मेम्ह छम्ह त:धीम्ह इमा दु। आ: व दाखया मां थ:त पिनात:गु थासं थ:गु हा व पाखे छवल, अले ल:या नितिं थ:गु कचात उम्ह इमापाखे चक्कंकल।

8 उकी कचात सया वयेमा, अले फल सय्का: व छगू बांला:गु दाखमा जुइमा धका: उकियात यक्व ल: दुगु छगू नायुगु जमिनय् पिनाब्यूगु ख:।’

9 “इमित धा, ‘परमप्रभु परमेश्वरं थथे धयादी – व त:मा जुयामवइ ला? उकियात हानिसें लिना मकाइ ला? अले उकियागु फल मखाइ ला, अले व सुकूमगनी ला? उकियागु फुक्क चुलि सुकूगनावनी। उकियात हानिसें लिनाकायेत तसकं बल्ला:गु ल्हा: अथवा यक्व मनूत माली मखु।

10 उकियात मेथाय् त:सां छु व त:मा जुइ ला? पुर्बयागु फसं कय्के धुंका: व फुक्क सुकूगनामवनी ला, व बुयाव:गु थासय् हे सुकूगनामवनी ला?’ ”

उखानया अर्थ कंगु

11 परमप्रभुयागु थ्व वचन जिथाय् वल,

12 “थ्व विद्रोही घरानायात धा, ‘छु! छिमिसं थ्व खँया अर्थ मस्यू ला?’ इमित धा, ‘बेबिलोनयाम्ह जुजु यरूशलेमय् वल अले अनयाम्ह जुजु व भारदारतय् थ:नापं बेबिलोनय् हल।’”

13 वं जुजुया वंशयापि मध्ये छम्हयसित कया: वयात पाफय्का: वलिसें सन्धि यात। अले देशयापि मू मू मनूतय् वं यंकल।

14 उगु राज्य वयागु अधीनय् च्वनेमा, अले हाकनं दने मफयेमा अले वयागु सन्धिया वचन पालन याना जक वं दयाच्वनेमा धका: वं थथे या:गु ख:।

15 तर जुजुं सलत व त:धंगु सेना कयाहयेत मिश्र देशय् दूतत छवया: वयागु विरोधय् विद्रोह यात। छु व ता:लाइ ला? थज्या:गु ज्या याइम्ह छु व बचय् जुइ ला? सन्धि त्वा:थला: नं छु व सजाँयपाखें बचय् जुइ ला?

16 “ ‘गथे जि धात्थें म्वा:म्ह ख:, जि, परमप्रभु परमेश्वरं धाये, व बेबिलोनय् सी। वयात बेबिलोनयाम्ह जुजुं गद्दीइ त:गु ख:, वं वलिसें पाफ:गु खँयात हेला या:गु ख:, अले वं वलिसें या:गु सन्धि त्वा:थूगु ख:।’”

17 बेबिलोनयाम्ह जुजुं यरूशलेमयापि यक्व मनूत स्यायेत ल्वहं व चायागु द्रुम्ब:चा थना: घेरय् याइबलय् थ:के त:धंगु सेना व यक्व सिपाईत दुम्ह फारों नं वयात ग्वाहालि याये फइ मखु।

18 वं बाचा त्वा:थल, अले पाफ:गुयात हेला यात, बचं बिया: नं वं थ्व फुक्क या:गुलि व बचय् जुइ मखु।

19 “ ‘अथे जुया: परमप्रभु परमेश्वरं थथे धयादी – वं जिलिसें पाफ:गुयात हेला यात अले जिगु बाचा त्वा:थल, उकि गथे जि धात्थें म्वा:म्ह ख:, जिं वयात सजाँय बी।’”

20 जिं वयागु विरोधय् थ:गु जा: हले, अले व जिगु जालय् लाइ। जिं वयात बेबिलोनय् हये, वं जित: विश्वासघात या:गुलि जिं वयागु इन्साफ याये।

21 वया सकलें बिस्युं वंपि दक्वसिबय् बांला:पि सिपाईतय्त तरवारं स्याइ, म्वानाच्वंपि प्यखें छ्यालब्याल जुइ। अले छिमिसं जि परमप्रभुं हे थ्व खँ धा:गु ख: धका: सी।’

22 “परमप्रभु परमेश्वरं थथे धयादी – जिं थ:म्हं हे देवदास्या च्चकां छपु चुलि कया: उकियात पी। जिं उकिया दकलय् च्वय्यागु कचां छपु क्यातूगु चुलि लिक्का: थुकियात तज्जा:गु व च्वय् थ्यंक थ्यंगु पहाडय् पी।

23 इस्राएलया पहाडया च्चका च्चकाय् जिं व पी। उकिया कचात दइ अले वं फल सय्की, अले व छमा देवदास्या बांला:गु सिमा जुइ। फुक्क कथंयापि झंग:पन्छितय्सं उकी स्वं दय्की, अले उकिया किचलय् इपि च्वनी।

24 गुँयागु फुक्क सिमातय्सं त:मागु सिमायात चीमागु याइम्ह, चीमागु सिमायात त:मागु याइम्ह, वाउँगु सिमायात गंकाबीम्ह अले गंगु सिमायात वाउँकाबीम्ह जि परमप्रभु हे ख: धका: गुँयागु फुक्क सिमातय्सं सी।

“ जि परमप्रभुं हे धयागु खः, व जिं या हे याये। ”

18

धर्मी परमेश्वरया न्याय

1 परमप्रभुयागु थ्व वचन जिथाय् वल,

2 “इस्त्राएल देशया बारे धाःगु थ्व उखान हाकनं दोहरय् याःगुया अर्थ छु खः

“ पाउँसे च्वंगु दाख मांबौनं नल,
वा तुन काय् म्हायपिनिगु? ”

3 “गथे जि धातर्थे म्वाःम्ह खः, परमप्रभु परमेश्वरं धयादी, छिमिसं थ्व उखान
इस्त्राएलय् हाकनं गुबलें धाये खनी मखु।

4 छायाःसा फुक्क प्राण जिगु हे खः। गथे बौया प्राण अथे हे काय्या प्राण नं
जिगु खः। सुनां पाप याइ, व हे सी।

5 “धाये कि, छम्ह मनू न्याय

व खःगु ज्या याइम्ह धर्मीम्ह खः,

6 वं डाँडाय् दुगु पुजा याइगु थासय् नःगु मदु,

अथवा इस्त्राएलया घरानाया मूर्तिपाखे स्वःगु मदु।

वं थः जःलाखःलाया कलाःयात स्यंकूगु मदु

व थीमज्यू जुयाच्च्वंम्ह मिसानापं घंगु मदु।

7 वं सुयातं क्वत्यली मखु

तर त्यासा काःम्हयसित वयागु बर लितबी।

वं खुया काइ मखु,

तर नये पित्याःम्हसित थःगु नयेगु नसा बी,

नांगायात थःगु वसः फिका बी।

8 वं ब्याज कयाः दां त्याये बी मखु

अले ब्यूगु स्वयाः अप्वः काइ मखु।

मनू मनूया दथुइ खःकथं न्याय याइ।

9 वं जिगु विधि पालन याःगु दु

अले विश्वास यायेबहः जुयाः जिगु नियम पालन याःगु दु।

थज्याःम्ह मनू धर्मीम्ह खः,

व धातर्थे म्वानाच्चनी,

परमप्रभु परमेश्वरं थथे धयादी।☆

10 “धाये कि, वया तंगुलु काय् दु, गुम्ह मनू स्याइम्ह खः अथवा थुपिं मध्ये मेगु छुं नं ज्या याइम्ह खः,

11 खः ला वया बौनं थुपिं मध्ये छगू नं ज्या याःगु मदु।

“वं डौंदाया पुजा याइगु थासय् नइगु,

थः जःलाखःलाया कलाःयात स्यंकीगु,

12 गरीब व मगाःमचाःपिन्त क्वत्यलीगु,

खुइगु, बरः तयातःगु सामान लित मबीगु,

मूर्तिपाखे स्वइगु व

घच्चाइपुस्से च्वंगु ज्या याइगु।

13 वं ब्याज कयाः दां त्याये बीगु अले ब्यूगु स्वयाः अप्वः काइगु।

“छु! थज्याःम्ह मनू म्वानाच्चनी ला? व म्वानाच्चनी मखु। वं थ्व फुक्क घच्चाइपुगु ज्या याःगुलि वयात स्यानाः हे छवयेमाः, वयागु हि वयागु हे छेनय् लाइ।

14 “तर धाये कि, वया छम्ह थः बौनं याःगु फुक्क पाप खंम्ह छम्ह काय् दु तर वं बौनं थें थज्याःगु ज्या याःगु मदु।

15 “वं डौंदाय् पुजा याइगु थासय् नइ मखु,

वं इस्त्राएलया घरानाया मूर्तिपाखे स्वइ मखु,

वं थः जःलाखःलाया कलाःयात स्यंकी मखु।

16 वं सुयातं क्वत्यलेगु ज्या याइ मखु,

तर त्यासा काःम्हयसित वयागु बर लितबी।

वं खुया काइ मखु,

तर नये पित्याःम्हसित थःगु नयेगु नसा बी,

नांगायात थःगु वसः फीकाबी।

17 वं पापपाखें थःगु ल्हाः तापाक हे तइ,

वं ब्याज कयाः दां त्याये बी मखु अले ब्यूगु स्वयाः अप्वः काइ मखु।

वं जिगु नियम पालन याइ

अले जिगु विधि पालन याइ।

“व थः बौनं याःगु पापं यानाः सी मखु। व धात्थें हे म्वाइ।

18 तर वया बौ थःगु अधर्म यानाः सी, छायाःसा वं जबरजस्ती कायेगु यात, थः किजायात लुतय् यात अले थः मनूतय् दथुइ मभिंनु ज्या यात।

19 “अयनं छिमिसं न्यनीगु, ‘कायनं थः बौया दोष छाया भोगय् याये म्वाः?’ कायनं न्याय व खःकथं ज्या याःगु दु अले जिगु विधि बांलाक पालन याःगुलि व धात्थें म्वाइ।

20 सुनां पापयात, व हे सी। कायनं थः अबुया दोषया फल भोगय् याइ मखु, न अबुं कायम्हय्सिगु पाप भोगय् याइ। धर्मीयात थःगु धार्मिकताया फल व दुष्टयात थःगु मभिगु ज्याया फल दइ।☆

21 “तर सुं दुष्टम्ह मनुखं थःम्हं याःगु फुक्क पाप त्वःताः जिगु विधि पालन यात धाःसा अले न्याय व खःकथं ज्या यात धाःसा, व धात्थें हे म्वाइ। व सी मखु।

22 वं याःगु छुं नं अपराध वयागु विरोधय् लुमंकीगु जुइ मखु। वं धर्म याःगुलि व म्वाइ।

23 “छु! दुष्ट सीबलय् जि लय्ताइ ला? परमप्रभु परमेश्वरं थथे धयादी। बरु थःगु पहः त्वःताः इपि म्वाःगु जितः स्वयेमास्ति मवइ ला?

24 “तर धर्मी मनुखं थःगु धार्मिकता त्वःताः पापयात, अले दुष्ट मनुखं याःगु घच्चाइपुगु ज्या यात धाःसा छु व म्वाइ ला? वं न्हापा याःगु छुं नं धर्मया ज्या लुमंकीगु जुइ मखु। वयागु विश्वासघात व वं याःगु पापया कारणं व सी।

25 “अयनं छिमिसं धाइगु, ‘परमप्रभुं खःगु ज्या यानामदी।’ अय् इस्राएलया घराना, न्यै, छु जिं खःगु ज्या यानागु मदु ला? छु छिमिसं हे मखुगु ज्या यानाच्चनागु मदु ला?

26 धर्मी मनुखं थःगु धार्मिकता त्वःताः पापयात धाःसा, उकिया लागि व सी। वं याःगु पापं हे व सी।

27 तर दुष्ट मनुखं थःम्हं यानाच्चंगु मभिगु ज्या त्वःताः खःगु ज्या यात धाःसा, वं थःगु प्राण बचय् याइ।

28 वं बिचाः यानाः थःम्हं याःगु फुक्क अपराध लुमंकी अले व त्वःती। उकिं व धात्थें हे म्वाइ, व सी मखु।

29 अयनं इस्राएलया घरानां धाइगु, ‘परमप्रभुं खःगु ज्या यानामदी।’ अय् इस्राएलया घराना, छु जिं खःगु ज्या यानागु मदु ला? छु छिमिसं मखुगु ज्या यानाच्चनागु मदु ला?

30 “अथे जुयाः अय् इस्राएलया घराना, जिं छिपिं छम्ह छम्हय्सिगु न्याय वयागु पहःचहःकथं याये, जि, परमप्रभु परमेश्वर न्ववानागु दु। पस्ताय् चा, थःगु फुक्क अपराधपाखें लिहां वा, अले छिमिगु पाप छिमिगु पतनया कारण जुइ मखु।

31 छिमिसं यानाच्चनागु फुक्क अपराध त्वःति, न्हगु नुगः व न्हगु आत्मा का, अय् इस्राएलया घराना, छिपि छाय् सीगु?

32 छायाःसा जि सुं सीगु खनाः लय्ताइम्ह मखु, परमप्रभु परमेश्वरं धयादी, पस्ताय् चा, अले म्वाना च्वै!”

19

इस्राएलया जुजुपिनिगु निंति शोकया म्ये

1 “इस्राएलया शासकतयगु बारे छं थ्व बिलापया म्ये न्यंकि,

2 अले थथे धा,

“ छिमि मां छु खः?

व सिंहतयगु दथुइ दुम्ह छम्ह मिसाम्ह सिंह खः।

ल्याय्म्हपि सिंहतयगु दथुइ ग्वारातुलाः

वं थः मस्तयत् लहित।

3 उपि मस्त सिंहत मध्ये छम्हयसित वं लहिनाः तःधिकः यात,

अले व छम्ह बल्लाःम्ह सिंह जुल।

वं शिकार यायेगु सयकल

अले मनूत नल।✧

4 जाति जातियापि मनूतयसं वयागु बारे न्यन।

इमिसं गाः म्हुल, अले व उकी लात।

इमिसं वयात हुकं लुयायंकाः

मिश्र देशय् यंकल।

5 “ वं थःम्हं आशा यानागु पूमवंगु खनाः थः मस्त मध्ये मेम्ह छम्हसित काल,

अले वयात छम्ह बल्लाःम्ह सिंह दयकल।

6 व सिंहतयगु दथुइ थुखे उखे वये वने याना जुल।

छायाःसा व आः छम्ह बल्लाःम्ह सिंह जुइ धुंकल।

वं शिकार यायेगु सयकल,

वं मनूत नल।✧

7 वं इमिगु किल्लात सयंकाबिल,

इमिगु शहरत तहसनहस यानाबिल।

✧ 19:3 १९:३-४ २ राज २३:३१-३४; २ इति ३६:१-४

✧ 19:6 १९:६-७ यर २१:११-२२:१९

व थ्वयक हाःगु सलं देश

व अन दुपिं सकलें ग्यात।

8 अले प्यखें च्वंगु जाति जातियापिं मन्त

थथःगु लागां वलिसें लडाईं यायेत वल,

इमिसं वयात ज्वनेत जाः हल,

अले व इमिगु गालय् लात।

9 इमिसं वयात हुकं पन्जलय् तयाः बेबिलोनयाम्ह जुजुयाथाय् हल।

इस्त्राएलया डाँडा डाँडाय्

वयागु सः गुबलें ताये मदय्मा धकाः

इमिसं वयात कुनातल।

10 “ छिमि मां लःया लिक्क पिनातःगु छंगु दाखक्यबया दाखया मा थें खः,

गुगु यक्व लः दुगुलिं फल व कचां जाःगु दु।

11 शासकतय्गु राजदण्ड दय्केत

उकी बल्लाःगु कचात दु।

ख्वातुगु कचातय्गु दथुइ

व तज्जाः जुयाः थाहां वल।

उकिया कचात यक्व दु।

व तज्जाः खने दु।

12 तर तंम्वय् उकियात लिनाकाल।

उकियात बैय् वांछवयाबिल।

पुर्बयागु क्वाःगु फसं उकियात गंकाबिल,

उकिया फुक्क फल कुतुंवन।

उकियागु बल्लाःगु कचात फुक्क गन,

मिं उपिं भस्म जुल।

13 आः उकियात मस्भूमिइ पिल,

गंगु व लः मदुगु थासय्।

14 उकिया मू कचात मध्ये छपु कचां मि पिहां वल,

अले उकिं उकिया फलत

व कचात भस्म यानाबिल।

आः उकी शासकया राजदण्ड यायेत ज्यूगु

छपु नं कचा मन्त।’

“थ्व छपु बिलापया म्ये खः अले मनूतय्सं इपिं गुलि दुःखी जूगु खः धकाः क्यनेत थ्व म्ये हालाच्चनी।”

20

विद्रोही इस्राएल

1 न्हयगूगू दँया न्यागूगू लाया झिन्हु दुखुन्हु* इस्राएलया छं धर्मगुस्त वयाः परमप्रभुया सल्लाह कायेत जिगु न्ह्यःने फेतुत।

2 अबलय् परमप्रभुयागु वचन जिथाय् वल,

3 “अय् सीमानिम्ह मनू, इस्राएलया धर्म गुस्तय्त थथे धा, ‘परमप्रभु परमेश्वरं थथे धयादी – छु छिपिं जिके सल्लाह काःवयागु ला? गथे जि धाथें म्वाःम्ह खः, जिं छिमित सल्लाह काय्के बी मखु, परमप्रभु परमेश्वरं धयादी।’

4 “छं इमिगु न्याय या, इजकिएल! छं इमिगु न्याय या! इमित इमि पुर्खातय्गु घच्चाइपुगु ज्या लुमंकाब्यु!

5 अले इमित धा, ‘परमप्रभु परमेश्वरं थथे धयादी – गुखुन्हु जिं इस्राएलयात ल्यया, जिं थःगु ल्हाः ल्हनाः याकूबया घरानालिसें पाफया, अले मिश्र देशय् जि इमिगु न्ह्यःने खनेदय्क वया अले पाफयाः जिं इमित “जि परमप्रभु छिमि परमेश्वर खः” धकाः धया।☆

6 उखुन्हु हे जिं इपिलिसें जिं इमित मिश्र देशं लिगनाः हयाः जिं इमिगु निंति ल्ययागु छगू देशय् हये धकाः नं पाफया। व मेगु फुक्क देश स्वयाः बांलाः, अन दुर्ग व कस्ति बाः वयाच्चंगु।

7 अले जिं इमित धया, “छिपिं सकसिनं थथःगु मिखा वंकूगु उपिं घच्चाइपुगु मूर्तिंत वांछव! अले थःत मिश्र देशयागु मूर्तिंतपाखें अशुद्ध याये मते! जि परमप्रभु छिमि परमेश्वर खः।”

8 “तर इमिसं जिगु विरोध यानाः जिगु खँ मन्यन, इमिसं न्ह्याबलें लुमंका च्वनीगु उपिं घच्चाइपुगु मूर्तिंत वांमछवः, न इमिसं मिश्र देशया मूर्तिंत हे त्वःतल। उकिं जिगु तं क्वलाकेत इपिं मिश्र देशय् दुबलय् हे इमिके जिगु तं प्वंके धकाः रख्याच्चः बिया।

9 तर जिं अथे मयाना, छायाःसा जिं जिगु नांया इज्जतयात रक्षा यायेगु ज्या याना। जिं इस्राएलीतय्त मिश्र देशं पितहःगु खंपिं जःखः च्वंगु जातितय्गु दथुइ जि थःगु नांयात बदनाम जुइके मबिया।

* 20:1 २०:१ १४ अगष्ट ५९१ बी.सी. ☆ 20:5 २०:५-६ प्रस ३:१५-१७; यर ११:५

10 उकिं जिं इमित मिश्र देशं पिकया: मरूभूमिइ हया।

11 अन जिं इमित जिगु विधित बिया, अले जिगु नियमत क्यना, सुनां थुपिं पालन याइ व मनू उकिं याना: म्वाइ।✧

12 हाकनं इमित पवित्र याइम्ह जि परमप्रभु हे ख: धइगु खँ इमिसं सीमा धका: इमिगु व जिगु दथुइ चिंया लागि जिं इमित विश्रामबारत नं बिया।✧

13 “अयनं इस्राएलयापि मनूतयसं मरूभूमिइ जिगु विरोधय विद्रोह यात। इपिं जिगु विधिकथं व आज्ञा कथं मज्ज, तर इमिसं जिगु नियमयात हेला यात, ख: ला उपिं पालन याइपिं मनूत उपिंपाखें हे म्वाइ। जिगु विश्रामबारत इमिसं पूरा अशुद्ध यानाबिल। उकिं जिं धया, “थ्व हे मरूभूमिइ इमिके जिगु तं प्वंका: इमित नाश यानाबी।”

14 तर गुगु जातियापिं मनूतयगु मिखाया न्ह्य:ने जिं इमित पित हया, उपिं जातियापिं मनूतयगु मिखाया न्ह्य:ने जिगु नां अपवित्र मजुइमा धका: जिं जिगु नांया इज्जतयात रक्षा यायेगु ज्या याना।

15 हाकनं जिं इमित बियागु मरूभूमिइ “दुरु व कस्ति बा: वयाचवंगु अले फुक्क देशत स्वया: बांला:गु देशय जिं इमित हये मखु” धका: इपिलिसें पाफया,✧

16 छायाधा:सा इमिसं जिगु नियमयात हेला यात, अले इपिं जिगु विधिकथं मजुल, जिगु विश्रामबारतयत् अपवित्र यात। छायाधा:सा इमिगु मन इमिगु मूर्तितपाखे वनाचवंगु ख:।

17 अयनं जिं इमित नाश मयासैं दया याना, अले मरूभूमिइ इमित सिधयकामछवया।

18 जिं मरूभूमिइ इमि काय् म्हायपिन्त धया, “छिपिं थ: पुर्यातयगु विधिकथं जुइ मते, इमिगु नियम मानय याये मते, इमिगु मूर्तित पुजा याना: थ:त अशुद्ध याये मते।

19 जि परमप्रभु छिमि परमेश्वर ख:। जिगु विधिकथं जु! होसियार जुया: जिगु नियम पालन या!

20 जिगु विश्रामबारयात पवित्र तयाति! गुकिं याना: व छंगु व जिगु दथुइया बाचाया छगू चिं जुइ! अले छिमिसं जि हे परमप्रभु छिमि परमेश्वर ख: धका: सी।”

21 “तर इमि काय् म्हायपिन्सं नं जिगु विरोधय विद्रोह यात। इपिं जिगु उजंकथं मजुल, अले जिगु व्यवस्था पालन यायेत होशियार मज्ज, “ख: ला उपिं पालन या:सां

मनूत उपिपाखें हे म्वाइ” अले इमिसं जिगु विश्रामबारयात अशुद्ध यात। उकिं जिगु तं क्वलाकेत इपिं मिश्र देशय दुबलय हे इमिके जिगु तं प्वंके धकाः ख्याच्चः बिया।

22 तर जिं इमित पित हयागु खंपिं जातितयगु न्ह्यःने जिगु नां बदनाम मजुइमा धकाः जिं थःगु ल्हाःयात पना, जिं जिगु नांया इज्जतयात रक्षा यायेगु ज्या याना।

23 हाकनं मरूमिइ जिं इपिलिसें, “जिं इमित जाति जातियापिं मनूतयगु दथुइ छ्यालब्याल यानाबी, अले देश देशय छिमित छ्यालब्याल यानाबी” धकाः पाफया, ☆

24 छायाधाःसा इमिसं जिगु नियम मानय मयात, जिगु विधितयत हेला यात, अले जिगु विश्रामबारयात अशुद्ध यात। इमिगु मिखा थः पुर्खातयगु मूर्तितपाखे वनाच्चन।

25 अले जिं इमित ज्यालगय मजगु नियम बिया, अले इपिं म्वानाच्चने मफइगु विधि बिया।

26 इमित वातां यायेत जिं इमित उपिं हे बलिदानतपाखें अपवित्र याकेबिया, गुगु बलिदानय इमिसं थः फुक्कं न्हापा बूपिन्त मिइ बलि छाल। इमिसं जि परमप्रभु इमि परमेश्वर खः धयागु सीमा धकाः थथे याना।’

न्याय व लिथापं

27 “उकिं अय सीमानिम्ह मनु, इस्राएलयापिं मनूतलिसें खँ ल्हा, इमित धा, ‘परमप्रभु परमेश्वरं थथे धयादी – जितः त्वःताः छिमि पुर्खातयसं जिगु अपमान यात।

28 जिं पाफयाः इमित बी धयागु देशय इमित हयाबलय, गन गन इमिसं तःज्जाःगु वा इयाम्म जगु सिमा खन, अन अन इमिसं थःगु बलिदानत छाल, जितः तं पिकाइगु इमिगु भेटी छाल। इमिसं थःगु नस्वाःगु गुँगू थन अले थःगु त्वँसाबलि छाल।

29 अले जिं इमित न्यना— छिपिं वनाच्चनागु पुजा याइगु थाय छु खः?” ” थौं तक नं व थाययात बामा† धाइ।

30 “उकिं इस्राएलया घरानायात धा, ‘परमप्रभु परमेश्वरं थथे धयादी – छु! छिमिसं थः पुर्खातयसं थें थःत अशुद्ध यायेगु ला? इमिगु घच्चाइपुगु ज्याकथं व्यभिचारी थें ज्या यायेगु ला?

31 छिमिसं थः मस्तयत कोसेलिकथं मिइ बलि छायाः थौं तक हे थःगु मूर्तितपाखें थःत अशुद्ध यानाच्चंगु दु। अय इस्राएलया घराना, छु! जिं छिमित जिके सल्लाह काय्के बीगु ला? गथे जि धात्थें म्वाःम्ह खः, जि, परमप्रभु परमेश्वरं धाये, छिमिसं जिके न्यनेकने यायेदइ मखु।

☆ 20:23 २०:२३ लेवी २६:३३ † 20:29 २०:२९बामा थुनिया अर्थ “पुजा याइगु थाय” खः।

32 “ छिमिसं धाइगु, “जिमित सिं व ल्वहंयागु सेवा याइपिं जातिथें, संसारयापिं मनूत थें जुइ मास्ति वः।” तर छिमिगु मनय् दुगु खँ गुबलें पूरा जुइ मखु।

33 गथे जि धात्थें म्वाःम्ह खः, जि, परमप्रभु परमेश्वरं धाये, जिं छिमित बल्लाःगु ल्हातं, अले चक्कंगु लपुं तं प्वकू प्वकू राज्य याये।

34 जिं छिमित बल्लाःगु ल्हाः व चक्कंगु लपुं तं प्वकू प्वकू जाति जातियापिं मनूतयगु दथुं लिगना हये, अले छिपिं छ्यालब्याल जूगु देशं जिं छिमित मुंके।

35 जिं छिमित जाति जातितयगु मरूभूमिइ हये, अले अन जिं इमिगु न्ह्यःने हे छिमिगु न्याय याये।

36 जिं मिश्र देशय् छिमि पुर्खातयगु न्याय यानागु थें हे जिं छिमिगु न्याय याये। जि, परमप्रभु परमेश्वर न्ववानागु दु।

37 छिपिं फै थें जिगु कथिया क्वं वनीबलय् जिं छिमित स्वये, अले छम्ह छम्ह यानाः ल्याःखनाः बाचाया बन्धनय् हये।

38 जिं छिपिं मध्ये जिगु विरोधय् अपराध याइपिं फुक्क विद्रोहीतय् पितछवयाः छिमित श्दु याये। इपिं च्वनाच्चंगु देशं इमित जिं हयेगु जूसां इपिं इस्राएल देशय् दुहां वने दइ मखु। अले जि हे परमप्रभु खः धकाः छिमिसं म्हसी।

39 “ हे इस्राएलया घराना, छिमिगु बारे, परमप्रभु परमेश्वरं थथे धयादी – वनाः छिपिं सकसिनं थथःगु मूर्तियात पुजा या! तर लिपा छिमिसं धात्थें हे जिगु खँ न्यनी, अले छिमिसं जिगु पवित्र नांयात थःगु कोसेलि व मूर्तितपाखें गुबलें अशुद्ध याइ मखु।’

40 छायाःसा परमप्रभु परमेश्वरं धयादी, ‘थ्व देशय् इस्राएलया फुक्क घरानां जिगु पवित्र पर्वत, इस्राएलया तज्जाःगु पर्वतय् जिगु सेवा याइ, अन जिं इमित नालाकाये। अन हे जिं छिमिगु बलिदानत, भेटीत व छिमिगु दकलय् भिगु भिगु क्वस्यलितनापं छिमिगु बलित कायेगु याये।

41 जिं छिमित जाति जातितपाखें पित हयेबलय् अले छिमित छ्यालब्याल जुयाच्चंगु देशं छिमित मुंकेबलय् छिमित नस्वाःगु धुपौय् थें नाले। अले जाति जातितयगु न्ह्यःने जिं थःम्हं थःत छिमिगु दथुइ पवित्र क्यने।

42 जिं थःगु ल्हाः ल्हनाः छिमित बी धकाः छिमि पुर्खातलिसे पाफयागु इस्राएल देशय् हयेबलय् छिमिसं जि हे परमप्रभु खः धकाः सी।

43 छिमिगु गुगु पहःचहः व ज्यापाखें छिपिं अशुद्ध जूगु खः, उपिं छिमिसं अन लुमंकी। अले छिमिसं याःगु मभिगु ज्याया लागि छिमिसं थःम्हं थःपिन्त मययेका हइ।☆

44 हे इस्राएलया घराना, छिमिगु मभिं गु पहःचहः व स्यंगु ज्याकथं मखु, तर जिं जिगु नांया इज्जतयात रक्षा यायेत जिं छिपिलिसे व्यवहार यायेबलय् छिमिसं जि हे परमप्रभु खः धकाः सी। परमप्रभु परमेश्वरं धयादी।’ ”

दच्छिनया विरोधय् न्याय

45 हाकनं परमप्रभुया थ्व वचन जिथाय् वल,

46 “अय् सीमानिम्ह मनु, थःगु ख्वाः दच्छिनपाखे स्वय्काः दच्छिन पाखेया विरोधय् न्चवा! झाः दुगु दच्छिनया देशयागु विरोधय् अगमवाणी ल्हा!

47 झाः दुगु दच्छिनया देशयात धा, ‘परमप्रभु परमेश्वरया थ्व वचन न्यै! वयकलं थथे धयादी – जिं छंके मि तयाबी। उकिं छंगु फुक्क वाउँगु सिमा व गंगु सिमायात भस्म यानाबी। उकिया हाना हाना च्यानाच्चंगु मि सी मखु तर दच्छिननिसें उत्तर तकया फुक्क लागायात भस्म यानाबी।

48 जि परमप्रभुं हे व मि तयाब्युगु खः धकाः सकसिनं सी। अले व सी मखु।’ ”

49 जिं धया, “हे परमप्रभु परमेश्वर, इमिसं ला जिगु बारे थथे धयाच्चंगु दु, ‘थ्वं उखान जक धाःगु, मखु ला?’ ”

21

परमेश्वरया न्याययागु तरवार

1 परमप्रभुयागु थ्व वचन जिथाय् वल,

2 “अय् सीमानिम्ह मनु, थःगु ख्वाः यस्शलेमपाखे स्वय्काः पवित्र थाय्या विरोधय् अगमवाणी ल्हा! इस्राएल देशया विरोधय् अगमवाणी ल्हा,

3 वयात थथे धा, ‘परमप्रभुं थथे धयादी, स्व! जि छंगु विरोधय् दु। जिं दापं थःगु तरवार लिकयाः छिपिं मध्ये धर्मी व दुष्ट निखलःसितं स्यानाबी।

4 धर्मी व दुष्ट निखलःसित जिं खतम यानाबी, अथे जुयाः दच्छिननिसें उत्तर तक फुक्कसिगु विरोधय् जिगु तरवार दापं पिहां वइ।

5 थुकथं जि, परमप्रभुं हे थःगु तरवार दापं लिकाःगु खः धकाः फुक्कसिनं सी। व दापय् हाकनं लिहांवनी मखु।’

6 “अय् सीमानिम्ह मनु, झसुका ति! ख्वःगु नुगलय् तसकं दुःख चायाः इमिगु न्ह्यःने झसुका ति!

7 अले इमिसं छन्त ‘छं छाया झसुका तयाच्चनागु’ धकाः न्यन धाःसा थथे लिसः ब्यु, ‘वयाच्चंगु खबरं यानाः सकसिगु नुगः खाइ अले सकसिगु ल्हाः याताप्याता

जुइ। सकसिगु नुगः क्वतुनी अले सकसिगु पुलि लः थें याग्लाप्याग्ला जुइ। स्व!
थथे जुइत्यंगु दु, अले थथे हे जुइ,’ जि, परमप्रभु परमेश्वरं थथे धाये।”

8 हाकनं परमप्रभुयागु थ्व वचन जिथाय् वल,

9 “अय् सीमानिम्ह मनु, अगमवाणी ल्हानाः थथे धा, ‘परमप्रभुं थथे धयादी,
“ छपु तरवार, ज्वय्कातःगु तरवार

व प्वालप्वाल थीकातःगु तरवार,

10 स्यायेत ज्वय्कातःगु,

हाबलासा थें प्वालाक्क च्यायेत थीकातःगु।

“ छु! जिपि जिम्ह काय् यहदाया राजदण्डय् लय्तायेगु ला? तरवारं ला
अज्याःगु फुक्क कथियात हेला याइ।

11 “ ‘तरवारयात छ्यलेत प्वालप्वाल थीकल अले ज्वय्कल,
ल्हातय् ज्वनेत,

व स्याइम्हय्सिगु ल्हातय् बीत तयार याःगु दु।

12 अय् सीमानिम्ह मनु, तसलं ख्वयाः बिलाप या!

छाय्धाःसा थ्व जिगु प्रजाया विरोधय् दु।

थ्व इस्त्राएलया फुक्क शासकतय्गु विरोधय् दु।

इमित जिम्ह मनूतनापं हे तरवारया अधीनय् ब्यगु दु।

उकिं छाति दा!

13 “ ‘धात्थें हे परीक्षा वइ, अले तरवारं हे हेला याइगु यहदाया राजदण्ड हे दया
मच्चन धाःसा? परमप्रभु परमेश्वरं धयादी।’

14 “उकिं अय् सीमानिम्ह मनु,

अगमवाणी ल्हा, ल्हातं ल्हातय् दा।

तरवार, खः, तरवारं निकः तक पालेमा!

खः, स्वकः तक नं!

थ्व तरवार स्याये पालेत खः।

तःधंगु नाशया निंति फुक्कपाखें वं इमित घेरय् याइ।

15 मनूतय्गु नुगः ग्यानाः नाया वनेमा,

अले यक्व मनूत क्वःदयेमा धकाः

इमिगु फुक्क मू ध्वाखाय् स्याये पालेत

जिं तरवार तयागु दु।

हाबलासा थें थीत उकियात दय्कूगु दु,

उकियात स्याये पालेत ज्वनी।

16 अय् तरवार, छंगु धा: गुखेपाखे स्व:गु दु,
जवपाखे कि खवपाखे,
छ उखेपाखे हूँ!

17 जिं नं ल्हातं ल्हातय् दाये,
अले जिगु तं क्वलाइ।

जि परमप्रभुं हे धयागु ख:।”

बेबिलोनयाम्ह जुजुं ज्वखना स्वइ

18 परमप्रभुयागु थ्व वचन जिथाय् वल,

19 “अय् सीमानिम्ह मनु, बेबिलोनयाम्ह जुजु तरवार ज्वना: वइगु निपु लँय् चिं
ति। थुपि निपु लँ छगू हे देशं शुरू जूगु जुइ, उकिया दोबातय् छगू नां च्वइगु थां ति।

20 छं अम्मोनीतयगु रब्बा शहरय् तरवार वयेत छपु लँ व यहूदा अले किल्ला
दुगु यरूशलेम शहरय् तरवार वयेत छपु लँ ल्य!

21 छाया:सा बेबिलोनयाम्ह जुजु ज्वखना स्वयेत निपु लँ बायावनीगु थासय्
दोबातय् दनी। वं वाणत चिष्टा तइ, वं थ: मूर्तितलिसें सल्लाह काइ, वं पशुया स्यें
जाँचय् याइ।

22 प:खा: तछ्याइगु ततम्ब:गु धलित तयेत, तसलं स्याये पालेत आज्ञा बीत,
लडाइया स: न्यंकेत, ध्वाखा तछ्यायेत तम्ब:गु धलि तयेत, द्रुम्ब:चा थकायेत व
घेरय् याइगु चाया प:खा: दय्केत वयागु जव ल्हातय् यरूशलेमया चिष्टा लाइ।

23 यरूशलेमयापि मनुतयसं थ्व मखुगु ज्वखना: ख: धका: बिचा: याइ,
छाया:सा इमिसं बेबिलोनियानापं सन्धि या:गु ख:। तर बेबिलोनियायाम्ह जुजुं
इमिगु दोष लुमंकी अले हमला याना: इमित ज्वनी।

24 “उकि परमप्रभु परमेश्वरं धयादी, ‘त:क: मछि हे छिमिसं छिमिगु पाप व
अपराध जित: लुमंकाब्यूगु दु। छिमिसं थुकियात सुचुकेगु तक नं मया:। छिमिसं
या:गु फुक्क खँय् छिमिसं थ:गु पाप क्यनी। उकि याना: हे छिमित शत्रुतयसं ज्वना
यंकी।

25 “ ‘अय् इस्राएलियाम्ह अपवित्र व दुष्ट शासक, छंगु लिपांगु दि व सजाँयया
ई थ्यंक: व:गु दु।

26 परमप्रभु परमेश्वरं थथे धयादी – फेटा लिका! मुकुट नं त्व: आ: हाकनं छुं
खँ न्हापा थें जुयाच्चनी मखु। चिधंपिन्त त:धंकीगु जुइ, अले त:धंपिन्त चिधं याइ।

27 नाश! नाश! जिं थ्व शहरयात सत्यानाश यानाबी। थ्व शहरयात न्याय यायेगु अधिकार दुम्ह मवतले हाकनं थ्व शहरयात दय्की मखु। व वये धुंकाः जिं वयात थ्व लःल्हानाबी।’ ”

अम्मोनीतय्गु विरोधय् अगमवाणी

28 “अय् सीमानिम्ह मन्, छं अगमवाणी यानाः धा, ‘अम्मोनीत व इमिगु अपमानया बारे परमप्रभु परमेश्वरं थथे धयादी,

“ ‘छपु तरवार, छपु तरवार,
दापं स्याये पालेत लिकाःगु दु।

हाबलासा थें प्वालाक्क च्यायेत
व थीकातःगु दु।☆

29 छंगु बारे मखुगु दर्शन खंसां तबि,
छंगु लागि मखुगु ज्वखना स्वःसां तबि
उपि स्याये हे माःपि दुष्टत,
गुपिनिगु दि वये धुंकल,
गुपिनिगु लिपांगु सजाँयया ई वये धुंकल,
इमिगु ककुइ पालेत व तरवारयात छ्यलीगु जुइ।

30 “ ‘व तरवार दापय् ति!
अय् तरवार, छन्त दय्कूगु थासय् हे,
छं पुर्खातय्गु देशय् हे
जिं छंगु इन्साफ याये।

31 जिं थःगु तं छंके प्वंके।
जिगु च्याःगु तंया मि छंगु विरोधय् पिकाये।
जिं छन्त नाश याये सःपिं
व दयामदुपिं मनूतय्गु ल्हातय् बी।

32 छ मिआ लागि सिं जुइ।
छंगु हि छंगु हे देशय् बाः वइ।
छन्त हाकनं गुबलें लुमंकीगु जुइ मखु,
छाय्धाःसा जि परमप्रभुं हे थ्व खँ धयागु खः।’ ”

☆ 21:28 २१:२८-२९ यर ४९:१-६; इज २५:१-७; आमो १:१३-१५; सप २:८-११

22

यस्शलेमयागु तःधंगु पाप

1 परमप्रभुयागु थ्व वचन जिथाय् वल,

2 “अय् सीमानिम्ह मनू, छु छं वयागु न्याय याये, मखु ला? छु छं थ्व ज्यानमारा शहरया न्याय याये, मखु ला? छं वयागु फुक्क घच्चाइपुगु ज्या वयात कनाब्यु।

3 अले वयात थथे धा, परमप्रभु परमेश्वरं थथे धयादी, ‘हे शहर, थःत अशुद्ध यायेत मूर्तित दय्कूम्ह, थःगु हे अन्तया ई हयेत, थःगु हे दथुइ हि बाः वय्कूम्ह शहर!

4 छं बाः वय्कूगु हिं यानाः छ दोषी जूगु दु। छं दय्कूगु मूर्तिं यानाः छ अशुद्ध जूगु दु। छंगु नाशया दिं वये धुंकल। छंगु ई फुत। जिं छन्त संसार न्यकं न्हीकीगु खँ यानाबी। फुक्क देशं छन्त हेस्याइ।

5 अय् बदनाम व अलमलं जाःगु शहर, छंगु लिक्क व तापाक च्वंपिन्सं छन्त लायबुइ।

6 “ ‘स्व! छंगु पःखाः दुने दुपि सकलें शासकतय्सं गय् यानाः थःगु बल मनू स्यायेगुलिइ छ्यलाच्वंगु।

7 छंके हे इमिसं थः मां बौयात हेला यात, विदेशीतय्त अत्याचार यात, अले मांभौ मदुपि मस्त व भाःत मदुपि मिस्तय्त बांमलाःगु व्यवहार यात।☆

8 छं जिगु पवित्र वस्तुयात हेला याःगु दु अले जिगु विश्रामबारया दियात अपवित्र याःगु दु।☆

9 हि बाः वय्केत मखुगु खँ ल्हानाजुइपिं मनूत छंके तयार जुयाः च्वनाच्वंगु दु। अले डाँडाया पुजा याइगु थासय् प्रसाद नइपिं व मभिगु ज्या याइपिं मनूत नं छंके दु।

10 छंके थः बौया कलाःपिनापं घनाः थः बौयात अपमान याइपिं दु, छंके थीमत्यः जूबलय् व विधिकथं अशुद्ध जुयाच्वंम्ह मिसालिसें लसपस याइपिं मनूत नं दु।☆

11 छंके गुलिसिनं थः जःलाखःलाया कलाःलिसें घच्चाइपुगु ज्या याइगु। गुलिसिनं थः भौयात स्यंकीगु, अले गुलिसिनं थः हे बौया म्हाय्, थः केहँयात बलात्कार याइगु।

12 छंके हे मनूतय्सं मनू स्यायेत ध्यबा काइगु, गुलि मनूतय्सं ब्याजय् नं यक्व ब्याज काइगु, थः जःलाखःलायात अन्याय यानाः जबरजस्तिं लबः काइगु। छं जितः ल्वःमंकूगु दु, परमप्रभु परमेश्वरं धयादी।☆

☆ 22:7 २२:७ प्रस २०:१२; २२:२१-२२; व्य ५:१६; २४:१७-२२

☆ 22:8 २२:८ लेवी १९:३०; २६:२

☆ 22:10 २२:१०-११ लेवी १८:७-२०

☆ 22:12 २२:१२ प्रस २२:२५-२७; २३:८; लेवी २५:३५-३७; व्य

१६:१९; २३:१९-२०

13 “ ‘छं अन्याय याना: फाइदा का:गुलि अले थ:गु दथुइ हि बा: वय्कूगुलि जिं धात्थें हे ल्हातं ल्हातय् दाये।

14 छु जिं न्याय यानागु दिं छंगु साहस दयाच्चनी ला? अथवा छंगु ल्हा: बल्लाइ ला? जि, परमप्रभुं थ्व धयागु दु, अले थथे हे याये।

15 जिं छिमि मनूतयूत जाति जाति व देश देशय् छ्यालब्याल यानाबी। जिं छंके दुगु अशुद्धता मदयकाबी।

16 जाति जातितयगु मिखाय् छंगु बेइज्जत जुइबलय् छं जि हे परमप्रभु ख: धका: सी।’ ”

परमप्रभुया मिया भट्टी

17 परमप्रभुयागु वचन जिथाय् वल,

18 “अय् सीमानिम्ह मनु, इस्राएलया घराना जिगु निंति धातुयागु कसर थें जूगु दु, इपिं सकलें भट्टीइ दुगु सिज:, टिन, नँ व म्ह: थें जुल। इपिं ला वह:यागु कसर थें जुइ धुंकूगु दु।

19 उकिं परमप्रभु परमेश्वरं थथे धयादी, ‘छिपिं सकलें कसर जूगुलि जिं छिमित यस्शलेम दुने हे मुंके।

20 ह्वाना ह्वाना मि च्याका: नाय्केत गथे मनूतयूसं वह:, सिज:, नँ, म्ह: व टिन भट्टीइ मुंकी, अथे हे जिं नं जिगु तं व जिगु इव्वं:कय् छिमित छथाय् मुंके, अले छिमित अन शहर दुने हे तया: नाय्के।

21 जिं छिमित मुंके, अले छिमिके जिगु तंया मि स्वांपुया बी, अले छिपिं उकिं दुने हे नायावनी।

22 भट्टीइ वह: नायावंगु थें हे छिपिं नं उकी दुने नायावनी। अले जि परमप्रभुं हे छिमिके थ:गु तं प्वंकूगु ख: धका: छिमिसं सी।’ ”

इस्राएलया नाय:तयगु पाप

23 हाकनं परमप्रभुयागु थ्व वचन जिथाय् वल,

24 “अय् सीमानिम्ह मनु, इस्राएल देशयात धा, ‘छ अशुद्धगु देश ख:, जि छ खना: थुलि तं चायागु दु कि जिं छन्त सजॉय बीबलय् भचा नं वा वइ मखु।’

25 वया शासकतयूसं मभिगु ग्वसा: ग्वयाच्चंगु दु इपिं शिकारयात काचाकुचु याइपिं सिंह थें गर्जय् जुया: च्वंगु दु। इमिसं मनूतयूत नल, इमिसं मू मू वंगु सामान लुतय् यात, अले अनच्चपिं यक्व मिस्तयूत भा:त मदुपि यानाब्यूगु दु।☆

26 वया पुजाहारीत जिगु व्यवस्थाया अःखतं वंगु दु अले जिगु पवित्र चिजत स्यंकूगु दु। इमिसं पवित्र व साधारणया दथुइ छुं मपाकु। इमिसं शुद्ध व अशुद्ध छुं मपाः धकाः स्यंगु दु। इमिसं जिगु विश्रामबार नं मानय् मयाः, इमिगु दथुइ जि अपमानित जूगु दु।☆

27 उकिया दुने दुपि हाकिमत थः शिकारतय्त कुचा कुचा याइपि गुंखिचात थें च्वं। इमिसं बेइमान यानाः फाइदा कायेत हि बाः वय्काः मनूत स्याइगु।

28 वया अगमवत्तातय्सं मखुगु दर्शन अले फताहा ज्वखना स्वयाः उपि मभिगु ज्यायात सख्याः पाःगु थें त्वःपुइगु। परमप्रभुं छुं धयामदीसां ‘परमप्रभु परमेश्वरं थथे धयादिल’ धकाः इमिसं धाइगु।

29 देशयापिं मनूतय्सं जबरजस्ती लाकाकायेगु व खुइगु ज्या याइगु, इमिसं गरीबत व मगाःमचाःपिन्त इन्साफ मब्यूसें इमित अत्याचार याइगु, अले विदेशीतय्त बांमलाःगु व्यवहार याइगु।☆

30 “पःखाः हाकनं दय्काबीम्ह व देश जिपाखें नाश मजुइमा धकाः देशया लागि जिगु न्ह्यःने पःखाःया हतय् दनाबीम्ह छम्ह मनू इमिगु दथुइ जिं स्वया, तर जिं सुं मखना।

31 उकि जिं इमिके जिगु तंया मि प्वंकाः इमित भस्म याये। इमिसं याःगु फुक्क ज्या इमिगु हे छेनय् हयाबी, परमप्रभु परमेश्वरं धयादी।”

23

निम्ह व्यभिचारिणी तताकेहें

1 परमप्रभुयागु वचन जिथाय् वल,

2 “अय् सीमानिम्ह मनू, निम्ह मिसात दु, इपिं छम्ह हे मांया म्हायपिं खः।

3 इमिसं मिश्रय् ल्यासेबलय् हे वेश्याया ज्या यात। अन इमिगु दुस्स्वः ज्वन, अले इमिगु कुमारी म्हायात तिसिल।

4 तताम्हयसिगु नां ओहोला खः। केहेंम्हयसिगु नां ओहोलिबा खः। इपिं जिगु हे खः, इमिसं कायम्ह्यायपिं बुइकल। ओहोला सामरिया खः, ओहोलिबा यस्शलेम खः।

5 “जिमि कलाः जूसां ओहोलां वेश्याया ज्या याना हे च्वन, अले अश्रूय् च्वंपि प्रेमीतलिसें लसपस यायेगु त्वःमतू।

6 इपि वँचुगु वसः फिनातःपि राज्यपालत व हाकिमत खः। इपि सकलें ल्वःवनापुसे च्वंपि ल्याय्म्हपि व सल गया जुइपि खः।

7 वं इपिलिसें हे व्यभिचार यात, इपि सकलें अश्रूयापि ततःधपि मनूत खः। वं सुयात ययकल, इमिगु हे मूर्ति व अशुद्ध जुल।

8 थः मिश्र देशय् दुबलय्निसें याःगु वेश्याया ज्या वं त्वःमतू। छायाःसा व ल्यासेबलय् मनूत वलिसें घन, वयागु कुमारी अवस्थायागु दुस्वलय् इमिसं ल्हाः तल, अले वलिसें व्यभिचार यात।

9 “वं वया अश्रूरी प्रेमीयात तसकं ययकूगु खः। अथे जुयाः जिं वयात वया प्रेमीत, अश्रूया ल्हातय् बिया।

10 इमिसं वयात नांगा यात। इमिसं वया काय् म्हाय्पिन्त ज्वन, वयात तरवारं पालाः स्यात। मिसात मध्ये व बदनाम जुल, वयात सजौय बिल।

11 “वया केहें ओहोलीबां व खन, अय्न् ओहोलीबा वेश्याया ज्या यायेगुलिइ थः तता स्वयाः यक्व स्यनावन।

12 वं अश्रूरी हाकिमत, राज्यपालत व बांवांलाःगु सेनाया वसः फिनाः सल गया जुइपिन्त ययकल। इपि सकलें ल्वःवनापुसे च्वंपि ल्याय्म्हपि मनूत खः।

13 व नं अशुद्ध जुइ धुंकूगु जिं खना। इपि निम्हं तताकेहेंपि छगू हे लैय् वन।

14 “वं ला थःगु वेश्याया ज्या झन अप्वयकल। वं अंगलय् ह्याउँगु रंगं दय्कातःगु बेबिलोनी मिजंतयगु किपा खन।

15 इमिसं जैय् जनी व छेनय् ताहाकःगु फेटा चिनातःगु दु, इपि सकलें रथया हाकिमत थें खने दु। इपि बेबिलोनिया देशय् बूपि बेबिलोनी मनूत थें खने दु।

16 वं इमित खनेवं इमित ययकाः बेबिलोनीतय्गु देशय् इमिथाय् दूतत छवल।

17 अले बेबिलोनीत वयाथाय् वयागु मतिनाया खाताय् लसपस याः वल। अले वनापं व्यभिचार यानाः वयात स्यंकाबिल। इपिपाखें व अशुद्ध जुइ धुंकाः दिक्क चायाः वयागु मन इपिपाखें तापानावन।

18 “वं खनेदय्कः वेश्याया ज्या यात अले थःगु नांगा म्ह सकसितं क्यंगुलि वया ततापाखें जिगु मन तापाःगु थें अथे हे वपाखें नं जिगु मन तापात।

19 अयन् वं थः ल्यासेबलय् थःम्हं मिश्रय् याःगु वेश्याया ज्यायात लुमंकाः वं थःगु वेश्याया ज्यायात झन झन अप्वयकाहल।

20 अन गधाय्गु थें लिग दुपि व सलयागु थें वीर्य दुपि थः प्रेमीपिन्त ययकाजुल।

21 थुकथं मिश्र देशय् छंगु छातिइ ल्हाः तःगु, छंगु ल्यासेबलय्गु दुस्वः तिस्सिगु खँ लुमंकाः छं थःगु ल्यासेबलय्गु कामुकताया इच्छा यात।

ओहोलीबायात परमप्रभुया न्याय

22 “उकि हे ओहोलीबा, जि, परमप्रभु परमेश्वरं थथे धाये – स्व! जिं छ दिक्क चाःपि छिमि प्रेमीपिन्त छंगु विरोधय् ग्वाके अले इमित प्यखेरं छंगु विरोधय् हये।

23 जिं बेबिलोनयापि मिजंपि व फुक्क बेबिलोनियायापि मिजंपि, पकोद, शोअ व कोअयापि मिजंपि अले फुक्क अशशूरीतयत् हये। जिं उपि फुक्क बांलाःपिं, ल्यायम्हपि हाकिमत, मू मू हाकिमत व सल गया जुइपि सकसितं प्यखेरं छंगु विरोधय् हये।

24 इपि छंगु विरोधय् उत्तरं ल्वाभः, रथत व गाडात व जाति जातियापि सिपाईतयगु पुचःनापं वइ। तःधंगु व चिधंगु ढालत ज्वनाः व नैयागु तपुलि पुनाः इमिसं छन्त घेरय् याइ। जिं छन्त इमिगु ल्हातय् सजौयया लागि बी। इमिसं थःगु चलन कथं छन्त सजौय बी।

25 जिं थःगु दाहाया तं छपाखे स्वयके, इमिसं छलिसैं बांमलाःगु व्यवहार याइ। इमिसं छंगु न्हाय व न्हायपं ध्यनाबी, छिमि म्वानाच्चपिन्त तरवारं पालाः स्यानाबी। इमिसं छिमि काय् म्हायपिन्त लाकायंकी, छिमि ल्यंदुपिं मिं भस्म जुइ।

26 इमिसं छंगु वसः खुनाः छंगु बांमलाःगु तिसातासा लाकायंकी।

27 थुकथं छं मिश्र देशय् शुरु यानाः आः तक याना वयाच्चंगु छंगु वेश्याया ज्या व मभिगु ज्या जिं पनाबी। छं हाकनं गुबलें इमिपाखे कुइच्छां स्वइ मखु। छं हाकनं मिश्र देशयात लुमंकी मखु।

28 “छाय्धाःसा परमप्रभु परमेश्वरं थथे धयादी, जिं छन्त छं तसकं मययक्पिनिगु ल्हातय् लःल्हाये त्यनागु दु, जिं छन्त छ दिक्क चाःपि मनूतयगु ल्हातय् लःल्हाये त्यनागु दु।

29 इमिसं छन्त घृणा याइ। छंगु फुक्क कमाइ लाका काइ, अले छन्त नांगा यानाः त्वःताबी। छंगु वेश्याया ज्याया लज्या खने दइ। छं वेश्याया ज्या याःगुलि व छ स्यनावंगुलि

30 छन्त थज्याःगु अवस्थाय् हःगु खः। छाय्धाःसा जाति जातिया निंति छ वेश्या जुल अले इमिगु मूर्तितयत् पुजा यानाः छं थःत अपवित्र यात।

31 छ थः तताया लैय् वंगु दु। उकि जिं वयागु सजौयया ख्वला छंगु ल्हातय् बी।☆

32 “परमप्रभु परमेश्वरं थथे धयादी –

“छं तग्वःगु व तःजाःगु छिमि ततायागु ख्वलां त्वनी,

☆ 23:31 २२:३१-३४ यशै ५१:१७-२३; यर २५:१५-१६; ४९:१२; विलाप ४:२१; ओब १६; प्रका १४:१०; १६:१९

- सकसिनं छन्त हेस्याइ
 अले हेला याइ,
 छायाःसा उगु ख्वलाय् यक्व न्ह्यं।
- 33 थुकिं म्हाइपुइकाबी अले लगय् जुइकाबी,
 व छिमि तता सामरियायागु ख्वला खः,
 नाश व उजाडया ख्वला।
- 34 छं व ख्वला खालि मजुतले त्वनी,
 छं थुकियात कुचा कुचा जुइक तछ्याइ।
 अले छकु कुचा कयाः थःगु दुस्स्वलय् कियाबी।”
- जि परमप्रभु परमेश्वरं थ्व खँ न्ववानागु खः।

35 “उकिं परमप्रभु परमेश्वरं थथे धयादी – छं जितः त्वःमंकल, अले छंगु जँधूफाःया ल्युने जितः तल, उकिं छं थःगु महापाप व व्यभिचारया लिच्चः भोगे यायेमाली।”

निम्ह तताकेहेंपिन्त परमप्रभुया न्याय

36 परमप्रभुं जितः धयादिल, “अय् सीमानिम्ह मनू, छु! छं ओहोला व ओहोलीबाया न्याय यायेगु ला? अथे खःसा इमिसं याःगु घच्चाइपुगु ज्या इमित कनाब्यु,

37 छायाःसा इमिसं व्यभिचार याःगु दु, इमिगु ल्हातय् हि दु। इमिसं थःगु मूर्तिनापं व्यभिचार यात, जिगु लागि बुइकूपिं इमि काय् म्हाय्पिन्त इमिसं उपि मूर्तितय्गु न्ह्यःने मिइ बलि छाल।

38 इमिसं जिलिसें थथे नं याःगु दु, उखुन्ह हे इमिसं जिगु पवित्र थाय्यात अशुद्ध यात अले जिगु विश्रामबारयात मानय् मयात।

39 इमिसं थःकाय् म्हाय्पिन्त इमिगु मूर्तितय्गु निंति बलि छाःगु दिनय् हे इपिं जिगु पवित्रथाय् दुने दुहां वल, अले उकियात अपवित्र यात। इमिसं जिगु देगलय् थज्याःगु हे ज्या यात।

40 इमिसं तातापापिं मनूतय्त दूतत छवयाः नं सःतल, इपिं वल।

“अय् ओहोला व ओहोलीबा छिमिसं इमिगु निंति म्वःल्हुल, मिखाय् अजः तल, अले तिसा पुनाः थःत बांलाकल।

41 छिपिं छगू बांलाःगु ताहाकःगु बेन्चाय् च्वन,* उकिया न्ह्यःने तेबिल तयाः जिगु धुपाँय् व चिकं तल।

42 “मस्भूमि ग्वाः ग्वाः मनूत ब्वनाः हल, इपिं सकलें तसकं लयताः, अले इमिगु सः तसकं तसः। इमिसं उपिं निम्ह तताकेहेंपिनिगु ल्हातय् चुरि न्ह्याकाबिल, इमिगु छैनय् बांलाःगु श्रीपेच पुइकाबिल।

43 व्यभिचार यायां बुरी जुइ धुंकूम्ह छम्हय्सिगु बारे जिं धया, “आः वयात मेपि वेशयात थें छयलेमा, छायाधाःसा व व हे जक खः।”

44 अले इपिं वलिसें वेशयानापं घं थें घन। अथे हे इपिं कामुक मिस्त ओहोला व ओहोलिबानापं घन।

45 तर धर्मीं मनूतय्सं धाःसा इमित व्यभिचारिणी व मनू स्याइपिं मिस्त धकाः न्यायया सजॉय बी, छायाधाःसा इपिं व्यभिचारिणी मिस्त खः। इमिगु ल्हातय् मनू स्याःगुया हि लाःगु दु।

46 “परमप्रभु परमेश्वरं थथे धयादी – इमिगु विरोधय् छगू भीड हजि, अले इमित लुट व आतंकयात लःल्हानाब्यु।

47 भीडं इमित ल्वहेंतं कयकी, अले इमिगु तरवारं इमित खतम याइ, इमि काय् म्हायपिन्त इमिसं स्याइ अले इमिगु छें छवय्काबी।

48 “थुकथं जिं देशय् व्यभिचार बन्द यानाबी, इपिं निम्ह मिसातय्सं व्यभिचार मयायेमा धकाः सकलें मिसातय्गु नितिं थ्व ख्याच्चः जुइ।

49 छंगु व्यभिचारया सजॉय छं फयेमाली, छं याःगु मूर्ति पुजाया पापया सजॉय छं भोगे याइ। अले जि हे परमप्रभु परमेश्वर खः धकाः छं सी।”

24

ज्वरय् यायेगु थलया चिं

1 हाकनं जुजु यहोयाकीनयात ज्वनाः बेबिलोनय यंकूगु गुंगूगु दँया झिगूगु लाया झिन्हु दुखुन्हु* परमप्रभुयागु थ्व वचन जिथाय् वल,☆

2 “अय् सीमानिम्ह मनू, थौया दिं, थौयागु मिति च्वयाति! छायाधाःसा थौया हे दिं बाबेलया जुजुं यरूशलेमयात घेरय् यायेगु शुरू याःगु दु।

3 थ्व विद्रोही घरानायात थ्व उखान धा, “परमप्रभु परमेश्वरं थथे धयादी –

* **23:41** २३:४१ताहाकःगु बेन्च इजकिएलया इलय् तःमिपिं मनूतय्सं भवय् नयेबलय् लिधनाः च्वनेत थज्याःगु ताहाकःगु बेन्च छयलीगु खः। * **24:1** २४:१ १५ जनवरी ५८८ बी.सी. ☆ **24:1** २४:१-२

२ राज २५:१; यर ३९:१; ५२:४

“ ‘मिया च्वय् थल ति,
उकी लः नं ति,

4 उकी तुति, ब्वहया ला
व फुक्क भिंगु भिंगु कुचात मुनाः ति,
अले भिंगु भिंगु क्वँचं व जाय्की।

5 बथांयाम्ह दकलय् बांलाःम्ह पशु ल्ययाः का!
उकिया क्वय् सिँ द्रुँचिकि!
थलय् दुगु ला दाय्कि,
उकी क्वँय्त दाय्कि!

6 “ ‘छाय्धाःसा जि, परमप्रभु परमेश्वरं थथे धाये,
“ ‘धिक्कार, थ्व ज्यानमारा शहरयात!
व खतं नःगु थलयात,
गुकियागु खतं नःगु उकि वंगु मदुनि,
छकु छकु यानाः लाः लिका,
बांलाःगु धकाः छुं छकु नं ल्यंके मते।

7 “ ‘छाय्धाःसा वं बाः वय्कूगु हि
आः तक नं वयागु हे दथुइ दु।
वं व हि बैय् तयाः धुलं त्वःमपू,
तर नांगागु ल्वहंधिकय् तल।

8 अथे जुयाः जिगु तंयात ग्वाकाः बदला कायेत
वयागु हि त्वःमपुइमा धकाः जिं व नांगागु ल्वहंधिकय् तयागु दु।

9 “ ‘उकि परमप्रभु परमेश्वरं थथे धयादी –
“ ‘धिक्कार, थ्व ज्यानमारा शहरयात!
जिं नं सिँ द्रुँचिके।

10 सिँ मुंकि, मि च्याकि।
मसला तयाः ला बांलाक दाय्कि,
अले क्वँय्त छवय्कि।

11 अले थल खालि यानाः मिया च्वय् ति,

व क्वायेमा, उकिया सिजः ह्याँउसे च्वनेमा।
अले उकिया दुनेया फोहर नाया वनेमा,
उकिया खतं नःगु क्वायावनेमा।

12 शुकिं यानाः फुक्क कुतःयात निराश यानाब्यूगु दु,
उकिया तफिगु खतं नगु मिं नं वनी मखु।

13 “ ‘हे यरूशलेम, छं याःगु याये मत्यःगु ज्याखं छन्त अशुद्ध याःगु दु। जितः
ला छन्त शुद्ध याये मास्ति वःगु खः, तर छ शुद्ध मजू। अथे जुयाः छंगु विरोधय् जिगु
तं क्वमलाःतले छ हाकनं शुद्ध जुइ मखु।

14 “ ‘जि परमप्रभुं हे थ्व खँ धयागु खः। जिं ज्या यायेगु ई वःगु दु। जि लिचिले
मखु। जिं छन्त त्वःते। जिं छन्त दया याये मखु, जिं थःम्हं धया थें या हे याये। छंगु
चाला व छंगु ज्या स्वयाः जिं छंगु न्याय याये, परमप्रभु परमेश्वरं धयादी।’ ”

इजकिएलया कलाः सीगु

15 परमप्रभुयागु थ्व वचन जिथाय् वल,

16 “हे सीमानिम्ह मनु, स्व! छगू हे झापुं जिं छपाखें छंगु मिखाया नानिचायात
यंकेत्यनागु दु। अयनं छ ख्वये मते, मिखां ख्वःबि हाय्के मते।

17 चिसल्लं जक उंउं हा। सीम्हयसिगु निति दुखं च्वने मते। छेनय् फेटा हिं अले
तुतिइ लाकां न्ह्या, छंगु म्हुतुसि त्वपुइ मते, दुखं च्वनीपिन्सं नइगु मरि नये मते।”

18 उकिं सुथय् जिं थ्व खँ मनूतय्त धया। अले उखुन्हु हे बहनी जिमि कलाः
सित। कन्हय् खुन्हु सुथय् जिं जितः छु आज्ञा ब्यूगु खः व हे याना।

19 मनूतय्सं जितः धाल, “छिं यानादियागु थज्याःगु व्यवहार छु खः? थ्व
फुक्कया जिमिगु नितिं छु अर्थ दु? जिमित धयादी मखु ला?”

20 अले जिं इमित धया, “परमप्रभुयागु थ्व वचन जिथाय् वल –

21 छं इस्राएलया घरानायात धा, ‘परमप्रभु परमेश्वरं थथे धयादी – स्व! जिं थःगु
पवित्रथाय् अर्थात छिमिगु सुरक्षा व गर्वया मूल, छिमिगु मिखाया नानिचा, छिमिसं
दुनुगलनिसें यय्कूगु थाय्यात अपवित्र याये त्यनागु दु। छिमिसं अन त्वःताःवःपिं
छिमि काय् म्हाय्पिन्त तरवारं स्याइगु जुइ।

22 उबलय् जिं यानागु थें छिमिसं याइ। छिमिसं थःगु म्हुतुसि त्वपुइ मखु, दुखं
च्वपिन्सं नइगु मरि छिमिसं नइ मखु।

23 छिमिगु फेटा छिमिगु हे छेनय् दइ, अले छिमिगु लाकां छिमिगु हे तुतिइ। छिपि दुखं च्वनी मखु, छिपि ख्वइ मखु, तर छिपि थःगु पापं यानाः सुकूचिन वनी, अले थः हे नुगः मछिंकाच्वनी।

24 थुकथं इजकिएल छिमिगु निंति छगू चिं जुइ। वं याःथें छिमिसं नं याइ। थथे जुइ धुंकाः छिमिसं जि हे परमप्रभु परमेश्वर खः धकाः सी।’

25 “अय् सीमानिम्ह मनु, गुखुन्ह जिं इमिगुपाखें इमिगु किल्ला, इमिगु लसता व गौरव, इमिगु मिखाया नानिचा, इमिगु मनया इच्छा व इमि काय्मह्दाय्पि नं यंके,

26 उखुन्ह छन्त थ्व खबर बीत छम्ह बिस्सुं वःम्ह मनु छन्थाय् वइ।

27 अबलय् छंगु म्हतु चाइ, छ हाकनं सुम्क च्वनी मखु, छं वलिसें खँ ल्हाइ। थुकथं छ इमिगु निंति छगू चिं जुइ, अले इमिसं जि हे परमप्रभु खः धकाः सी।”☆

25

जाति जातिया विरोधय् अगमवाणी २५-३२

अम्मोनया बारे अगमवाणी

1 परमप्रभुयागु थ्व वचन जिथाय् वल, ☆

2 “हे सीमानिम्ह मनु, अम्मोनीतपाखे थःगु ख्वाः स्वय्काः इमिगु विरोधय् अगमवाणी ल्हा।

3 इमित धा, ‘अय् अम्मोनीत, परमप्रभु परमेश्वरयागु वचन न्यँ। परमप्रभु परमेश्वरं थथे धयादी – जिगु पवित्र थाय्पात अपवित्र याःबलय्, इस्राएल देशयात तहसनहस याःबलय् अले यहूदायापि मनूतय्त ज्वनायंकूबलय् छिमिसं “आहा, आहा!” धाल।

4 उकिं जिं छिमित पुर्बयापि मनूतयगु ल्हातय् सम्पत्ति थें लःल्हानाबी। इमिसं छिमिगु दथुइ छाउनी तइ अले छिमिगु हे दथुइ थःगु पाल ग्वइ। इमिसं छिमिगु फल नइ अले छिमिगु दुर्गु त्वनी।

5 जिं रब्बा शहरयात ऊँत च्वनीगु थाय् व अम्मोन देशयात फै-च्वलय् च्वनीगु थाय् दय्काबी। अले छिमिसं जि हे परमप्रभु खः धकाः सी।

6 परमप्रभु परमेश्वरं थथे धयादी – छिमिसं इस्राएल देशया विरोधय् ल्हाःपा थाःगु व प्याखं हुगु दु, छिमिगु नुगलय् दुगु ईखया कारणं छिपिं लय्ताःगु दु।

☆ 24:27 २४:२७ इज ३:२६-२७ ☆ 25:1 २५:१-७ यर ४९:१-६; इज २९:२८-३२; आमो १:१३-१५; सप २:८-११

7 उकिं जिं थःगु ल्हाः छिमिगु विरोधय् ल्हने, अले छिमित जाति जातितयगु ल्हातय् लुतया सामान थें बी। जाति जातितयगु दथुं छिमिगु नां तक नं मदयकाबी अले देश देशं छिमित नाश यानाबी। जिं छिमित भज्यंक नाश यानाबी अले छिमिसं जि हे परमप्रभु खः धकाः सी।’ ”

मोआबया बारे अगमवाणी

8 “परमप्रभु परमेश्वरं थथे धयादी, ‘मोआब व सेइरं थथे धाःगु दु, “स्व, यहदाया घराना ला मेगु फुक्क जातित थें जूगु दु।” ☆

9 उकिं जिं मोआबया पच्छिमयागु सिमानाय् हमला याकेबी। थुकी दुने मोआबया बांवांलाःगु शहरत बेथ-यशीमोत, बालमोन व कियतैम शहर नं लाः।

10 जिं मोआब व अम्मोनीतय् पुर्ब देशयागु अधीनय् बी। अनंलि हाकनं अम्मोन छगू जाति जुयाचवनी मखु।

11 जिं मोआबयात सजॉय बी। अले इमिसं जि हे परमप्रभु खः धकाः सी।’ ”

एदोमया बारे अगमवाणी

12 “परमप्रभु परमेश्वरं थथे धयादी, ‘एदोमं यहदाया घरानालिसें बदला काल। अथे याःबलय् व अज्ज अप्वः दोषी जुल। ☆

13 उकिं परमप्रभु परमेश्वरं थथे धयादी — जिं एदोमया विरोधय् थःगु ल्हाः ल्हनाः अनयापिं मनूत व पशुतय् स्यानाबी। जिं उकियात तहसनहस यानाबी, अले तेमानंनिसें ददान तक हे इमित तरवारं स्याइ।

14 जिं थः प्रजा इस्राएलपाखें एदोमयात बदला काये। थुमिसं जिगु तं व इवँक कथं एदोमयात व्यवहार याइ। अले थुमिसं जिगु बदला गय् च्वं धकाः सी, परमप्रभु परमेश्वरं धयादी।’ ”

पलिशतीतयगु बारे अगमवाणी

15 “परमप्रभु परमेश्वरं थथे धयादी, ‘पलिशतीतयसं बदला कायेगु ज्या यात, थःगु नुगलय् ईख तयाः बदला कायेगु ज्या यात, अले पुलांगु दुश्मनी कयाः यहदायात नाश यायेत स्वल। ☆

☆ **25:8** २५:८-११ यशै १५:१-१६:१४; २५:१०-१२; यर ४८:१-४७; आमो २:१-३; सप २:८-११ ☆ **25:12**

२५:१२-१४ यशै ३४:५-१७; ६३:१-६; यर ४९:७-२२; इज ३५:१-१५; आमो १:११-१२; ओब १-१४; मला १:२-५

☆ **25:15** २५:१५-१७ यशै १४:२९-३१; यर ४७:१-७; योए ३:४-८; आमो १:६-८; सप २:४-७; जक १:५-७

16 उकिं जि, परमप्रभु परमेश्वरं धाये — जिं पलिशीतयगु विरोधय् थःगु ल्हाः ल्हने त्यनागु दु, जिं करेतीतयत् खतम यानाबी, समुद्र सिथय् ल्यनाच्चपिन्त नाश यानाबी।

17 जिं इमित तसकं ग्यानापुक बदला काये। थःगु तम्बय् इमित सजॉय बी अले जिं इमिके बदला काये धुंकाः इमिसं जि हे परमप्रभु खः धकाः सी।”

26

टुरोसया बारे अगमवाणी

1 जिमित ज्वनाः बेबिलोनय् यंकुगु झिनिगू दँया झिछगू लाया न्हापांगु दिखुन्हु* परमप्रभुया थ्व वचन जिथाय् वल।☆

2 “अय् सीमानिम्ह मन्, यस्शलेमया बारे टुरोस शहरं थथे धाःगु दु, ‘आहा! जाति जातियापिं मनूतय् मू ध्वाखा दुंगु दु। ध्वाखात जिगु निंतिं चाःगु दु। व नाश जुल, आः जि च्वन्हाइ।’

3 अथे जुयाः जि, परमप्रभु परमेश्वरं थथे धाये — अय् टुरोस शहर,† जि छंगु विरोधय् दु। समुद्रं लबुत हःगु थें जिं यक्व जातितयत् छंगु विरोधय् हये।

4 इमिसं टुरोसया पःखाःत थुनाबी, अले उकिया धरहरातयत् क्वथलाबी। जिं उकिया ल्वहंत प्वतु प्वलाः उकियात नांगागु भीर थें यानाबी।

5 व समुद्रय् छगू नांगागु ल्वहँधी, समुद्रया दथुइ जाः हलीगु थाय् जुइ, छायाःसा जिं धयागु दु, परमप्रभु परमेश्वरं धयादी, उकियात जाति जातितय्सं लुटपाट याइ।

6 अले देशया मू भागया बस्ती बस्तीइ च्वंपिं मनूतयत् तरवारं स्याइ। अले इमिसं जि हे परमप्रभु खः धकाः सी।”

नबूकदनेसरं टुरोसयात हमला याइ

7 “परमप्रभु परमेश्वरं थथे धयादी — जिं उत्तरं जुजुतय् जुजु बेबिलोनया जुजु नबूकदनेसरायात सलत, रथत, सलगइपिं व छगू तःधंगु सेना ज्वनाः टुरोसयात हमला यायेत ब्वनाहये।

8 वं देशया मू भागया बस्ती बस्तीइ च्वंपिं मनूतयत् तरवारं स्याइ। वं छंगु विरोधय् चा व ल्वहं दुंचिकाः दुम्बःचा दय्काः छन्त हमला याइ अले ढालत ल्हनी।

* 26:1 २६:१३ फ्रेबुअरि ५८५ बी.सी. ☆ 26:1 २६:१-२८:१९ यशै २३:१-१८; योए ३:४-८; आमो १:९-१०; जक १:१-४; मती ११:२१-२२; लूक १०:१३-१४ † 26:3 २६:३ टुरोस शहर थ्व तःधंगु टुरोस शहर देशया मुख्य भाग लिक्कसं छगू टापुलय् लाः।

9 वं पःखाः तछ्याइगु तग्वःगु धलिनं छंगु पःखाः तछ्याइ। वयागु हतियारं छंगु धरहरात थुनाबी।

10 वया सलत यक्व अप्वः दइ, वया सलतयसं ब्वयकूगु धुलं छन्त त्वपुइ। पःखाः दुंगु शहरय् मनुत दुहां वंगु थें व छंगु मू ध्वाखां दुहां वनीबलय् लडाईया सलत, गाडात व रथतयगु सलं छंगु शहरया पःखाःत लिगिलिगि सनी।

11 वया सलया ख्वलं छंगु फुक्क लैयात न्हुतुन्हइ। वं छिमि मनुतयत् तरवारं स्याइ, छंगु बबलाःगु थनातःगु ल्वहंत बैय् क्वःदली।

12 इमिसं छंगु धन-सम्पत्ति लुतय् याइ, छंगु व्यापारया मालताल लुतय् यानाः यंकी। इमिसं छंगु पःखाः थुनाबी अले बांबांलाःगु छैयात नाश यानाबी। छंगु ल्वहं, सिं व चायात समुद्रय् वांछवयाबी।

13 जिं छंगु म्येयागु सः दिकाबी। छंगु वीणाया सः हाकनं ताये दइ मखु।☆

14 जिं छन्त नांगागु भीर यानाबी, छ जाः हलिगु थाय् जुइ। छन्त हाकनं गुबलें दय्की मखु। छायाधाःसा जि परमप्रभुं हे थ्व खँ धयागु खः।”

परमप्रभु परमेश्वरं धयादी।

टुरोस नाश जूगुया लिच्चः

15 “परमप्रभु परमेश्वरं टुरोस शहरयात थथे धयादी — घाःपाः जूपि सास्ती जुयाः चिल्लाय् दनाः हालीबलय् अले छिमिगु दथुइ स्याये पाले जुइबलय् छ क्वःदगु सः न्यनाः समुद्र सिथय्या देशत थुरथुर मखाइ ला?

16 अबलय् समुद्रया सिथय् दुगु देशयापि फुक्कं शासकतयसं थथःगु सिंहासनं क्वहां वयाः थथःगु वसः त्वइ, बुत्ता भरय् यानातःगु वसः त्वइ। ग्यानाः इपि थुरथुर खाइ। इपि बैय् च्वनाः थरथर खायाच्चनी, अले छ खनाः वातां जुइ।☆

17 इमिसं छंगु बारे बिलापया म्ये दय्काः छन्त धाइ,
“ ‘समुद्रयापि मनुतयसं जाःगु, हे नांजाःगु शहर,
छ गय् यानाः नाश जूगु!

छ व छिमि मनुत छगू इलय् समुद्रय् बल्लाःपि खः,
अनच्चंपि सकसितं छं ख्यानातःगु खः।

18 आः छंगु पतनया दिनय् समुद्र सिथय्यागु देशत थुरथुर खाइ।
छ तनावंगु खनाः समुद्रया टापुत ग्याःगु दु।’ ”

टुरोस पातालय् वनी

19 “परमप्रभु परमेश्वरं थथे धयादी – जिं छन्त मनूत मदुगु शहरत थें छगू तहसनहस जूगु शहर याइबलय् जिं तज्जाःगु समुद्रयात छंगु च्वय् हये, उकिया ततःधंगु लबुतय्सं छन्त त्वपुइ।

20 अबलय् जिं छन्त पातालय् वनेधुंकूपिं पुलांगु ईयापिं मनूतयथाय् छवयाबी। जिं छन्त पृथ्वीया क्वय् सदांया नितिं नाश जूगु थासय् च्वनेबी। अले छ हाकनं गुबलें म्वाःपिनिगु देशय् लिहां वयाच्चनी मखु।

21 छ म्वाना मच्चनेमा धकाः जिं छन्त ग्यानापुसे च्वंक सिधयकाः बी। छन्त माली तर सुनानं छन्त लुइके फइ मखु, जि, परमप्रभु परमेश्वरं धाये।”☆

27

टुरोस शहरया बिलापया म्ये

1 परमप्रभुया वचन जिथाय् वल,

2 “अय् सीमानिम्ह मन्, टुरोस शहरया बारे बिलाप या।

3 समुद्रया मू ध्वाखाय् दुगु, समुद्रया सिथय् च्वनीपिं यक्व मनूतय्सं व्यापार याइगु टुरोस शहरयात धा, ‘परमप्रभु परमेश्वरं थथे धयादी,

“ ‘अय् टुरोस, छं धाःगु दु,
“जि तसकं बांलाःम्ह खः।”

4 छंगु सिमाना समुद्र तक थ्यंगु दु,
छन्त दय्कूपिन्सं छन्त बांलाःगु जहाज थें दय्कूगु दु।

5 इमिसं छंगु फुक्क सिंपौत
सेनीरया सल्लाया सिँ
व पाल खायेत धंकातःगु थां
लेबनानया देवदारुया सिँ दय्कल।

6 इमिसं बाशानया स्वसिमां
छंगु चतंत दय्कल।

साइप्रसया समुद्रया सिथं हःगु धूपीया सिँ जहाजया बैँ दय्कल,
अले उकियात किसिया दनं बांलाकल।

7 छंगु जहाजया पाल मिश्र देशं हःगु भिंगु बुत्ता दुगु सूती कापःयागु खः।
उकिं हे छंगु झण्डाया ज्या बिल।

छंगु पाल एलीसाहया समुद्र सिथयागु

वँचुगु व प्याजीगु रंगया कापतं दय्कातःगु दु।

8 छंगु चतंत संकीपिं सीदोन व अर्वादय् च्वनीपिं खः।

अय् टुरोस, छं बुद्धि दुपिं मनूत छंगु जहाज चले याइपिं खः।

9 गबालयापिं पुलापिं व बुद्धि दुपिं कारिगरत

छनापं जहाजय् दु।

उपिं हे जहाजया प्वाःत तिनाबीपिं छिमि मनूत खः।

छन्थाय् व्यापार यायेत जहाज चले याइपिं मनूतनापं समुद्रया फुक्क जहाज
छन्थाय् वइगु।

10 “ फारस, लूद व पूतयापिं* मनूतय्सं

छंगु सेनाय् सिपाईया ज्या याइगु,

इमिसं थथःगु ढाल व टोप

छंगु पखालय् यख्खाना छंगु गौरव थकाइगु।

11 अर्वाद व हेलेकयापिं मनूत

छंगु प्यखेरं पखालय् दु।

गमादयापिं मनूत

छंगु धरहराय् दु।

इमिसं थथःगु ढाल छंगु प्यखेरं पखालय् यख्खाइगु।

इमिसं छन्त यक्व बांलाकीगु।

12 “ ‘छंके यक्व मालसामान दुगुलि तशींशं छनापं व्यापार यात। इमिसं वहः,
नँ, टिन व म्हः बियाः छंगु मालसामान न्यात।

13 “ ‘ग्रीस, तूबल व मेशेकयापिं मनूतय्सं छलिसें व्यापार यात। इमिसं थः दास
दासी व कँय्या थलबलत छंगु मालतालनापं हिल।

14 “ ‘छंगु मालताल कयाः बेथ-तोगर्मायापिं मनूतय्सं मालताल क्वबीपिं सल,
लडाईया सल व खच्चरत बिल।

15 “ ‘रोडसयापिं मनूतय्सं छलिसें व्यापार यात, समुद्र सिथय्या यक्व देशत
छंगु गाहाकि जुल। इमिसं किसिया दं व अब्नुसया† सिं बियाः छंगु मू पुलीगु।

* 27:10 २७:१० लूद व पूतया मेगु नां लिडिया व लिब्या खः। स्वयादिसँ ३०:५ † 27:15 २७:१५
अब्नुस – अब्नुस छगूकथंया सिमा खः। थ्व सिमा भारत व श्रीलंका देशय् दइ। थुकिया सिं तसकं हाकुसे
च्वनी, इजकिएलया इलय् इमिसं थ्व सिं कतांकीगु ज्या यायेत छयली, थुपि कतां ज्या दनापं बांलाकीगु याइ।

16 “ ‘छं यक्व मालताल दयकूगुलि आरामं छलिसैं व्यापार यात। छंगु मालतालया पलेसा इमिसं छन्त फिरोजा थी, प्याजीगु रंगयागु थानातःगु वसः व बुत्ता दुगु कापः, मलमलया कापः, मूगा-मोती व माणिक्य बिल।

17 “ ‘यह्दा व इस्राएलं छलिसैं व्यापार यात। छंगु मालतालया पलेसा इमिसं छन्त मिन्नीतयागु छव अले मरि, कस्ति, चिकं व मलम बिल।

18 “ ‘छंके फुक्क कथंया मालताल व यक्व धनसम्पत्ति दुगुलि दमस्कसं छलिसैं व्यापार यात। इमिसं छंगु मालताल कयाः हेलबोनया दाखमघ व जाहारया तँय

19 अले ऊजालया दाखमघया ड्रमत बीगु। व इमिसं छंगु मालताल कयाः रंग पानातःगु नँ, तेजपात व नस्वाःगु घौय् बिइगु।

20 “ ‘दनानं छलिसैं सलया काथिइ लाइगु कापः बियाः व्यापार याइगु।

21 “ ‘अरब व केदारयापि फुक्क शासकत छंगु गाहाकि खः। इमिसं छलिसैं चीधिकःपि भ्याःचात, भ्याःचात व दुगुत हयाः व्यापार याइगु।

22 “ ‘शेबा व रामाहया व्यापारीतयसं छलिसैं व्यापार याइगु। इमिसं छंगु मालतालया पलेसा फुक्क कथंया भिंगु भिंगु मसला, फुक्क कथंया मू वंगु रत्नत व लुँ बिइगु।

23 “ ‘हारान, कन्नेह व अदन, अले शेबा, अश्शूर व किल्मदया व्यापारीतयसं छलिसैं व्यापार याइगु।

24 छंगु बजारय् बाबांलाःगु वसः, वँचुगु कां दयकातःगु वसः, बुत्ता दुगु कापः, थूतुलातःगु थीथी कथंया रंगयागु गलैँचात, थुपि मालतालयागु इमिसं छलिसैं व्यापार याइगु।

25 “ ‘तशीशिया जहाजत छंगु व्यापार याइगु सेवकत थें खः।

छ समुद्रया दथुइ इयातुगु इयातुगु मालतालं जाःगु जहाज थें च्वं।’ ”☆

टुरोस नाश जूगु

26 “ ‘छिमि जहाज चले याइपिन्सं
छन्त वाफय् वयाच्चंगु समुद्रय् यंकी,

तर पुर्बयागु फसं छन्त
समुद्रया दथुइ हे नाश याइ।

27 छंगु धनसम्पत्ति, छंगु व्यापारया मालताल,
छंगु फुक्क माझीत व फुक्क जहाज चले याइपिं,

- जहाजया प्वाः तिनाबीपिं, छिमि व्यापारीत,
 जहाजयापिं फुक्क सिपाइँत व जहाजय् दुपिं
 छंगु जहाज स्यंगु दिनय मेपि सकलें समुद्रय हे दुबय जुइ।
- 28 छिमि जाहाज चले याइपिनिगु चिल्लाय् दंगु सलं
 समुद्रया सिथय् च्वंगु थाय् खाइ।
- 29 मेमेगु जहाज चले याइपिं सकसिनं थथःगु जहाजयात त्वःताबी।
 माझीत व जहाज चले याइपिं सकलें समुद्रया सिथय् दनी।
- 30 छंगु निति तःसलं हालाः
 इपिं ह्यँय्ह्यँय् ख्वइ।
 इमिसं थःगु छेनय् धू हली
 अले नउलय् ग्वारा ग्वारातुली।
- 31 छं यानाः इमिसं थःगु सँ खाइ,
 अले इमिसं भांग्रा फी,
 अले छंगु निति मनय् पीर कयाः
 इपिं ह्यँय्ह्यँय् ख्वइ।
- 32 छंगु निति बिलाप व दुखं च्वनाच्चंबलय्,
 इमिसं छंगु बारे थथे धकाः बिलापया म्ये हाली,
 “समुद्रं घेरय् यानातःगु दुरोस थें
 सु गुबलें सुम्क च्वंगु दु?”
- 33 समुद्रय् छंगु मालताल वनीबलय्
 छं यक्व जातितयत् लुधंकी।
 छंगु यक्व धनसम्पत्ति व मालतालं
 छं पृथ्वीयापिं जुजुपिन्त तःमि यात।
- 34 आः लःया तःजाःगु थासय्
 समुद्रं हे छन्त नाश याःगु दु।
 छंगु फुक्क मालताल व ज्या याइपिं सकलें
 छनापं तुं दुबय् जूगु दु।
- 35 समुद्र सिथय् च्वपिं सकलें
 छ खनाः वातां जूगु दु।
 इमि जुजुपिं तसकं ग्यानाः थरथर खाःगु दु,
 इमिगु ख्वाःपाः कय्कूगु दु।

36 जाति जातियापि व्यापारीतयसं छन्त हेस्याइगु,
छ हाकनं गुबलें दइ मखुत,
आ: छंगु ग्यानापुक नाश जुइन।’ ”

28

टुरोसयाम्ह जुजुया विरोधय् अगमवाणी

1 परमप्रभुयागु ध्व वचन जिथाय् वल,

2 “अय् सीमानिन्ह मनू टुरोसयाम्ह जुजुयात धा, ‘परमप्रभु परमेश्वरं थथे धयादी

— “छं तःधंछुया: थथे धा:गु दु, जि छम्ह घ: ख:,

जि समुद्रया दथुइ घ:यागु सिंहासनय् च्वंच्वनागु दु।

तर छ छम्ह मनू जक ख:, घ: मखु,

ख: ला, छं थ:त घ: ति हे बुद्धिमान ताय्कूगु दु।

3 छु छ दानिएल स्वया: बुद्धि दुम्ह ख: ला?

छु छपाखें छुं रहस्य सुलाच्वंगु मदु ला?

4 छंगु बुद्धि व दुयानं छं थ:गु निति यक्व धन-सम्पत्ति कमय् या:गु दु,

छं थ:गु धुकुतिइ लुँ व वह: मुंकूगु दु।

5 छं तःधंगु बुद्धि व व्यापारं थ:गु धन-सम्पत्ति अप्वय्कूगु दु।

छंगु धन सम्पत्तिं यांना: छंगु मन तःधंछूगु दु।

6 “ उकिं परमप्रभु परमेश्वरं थथे धयादी —

“ छं थ:त छम्ह बुद्धि दुम्ह

घ: ताय्कूगु दु।

7 अथे जुया: जाति जातित मध्ये

दकलय् सास्ती याइपि विदेशीतयत् जिं छन्थाय् हये।

इमिसं थ:गु तरवार छंगु बांला:सू व अजू चाइपुगु बुद्धिया विरोधय् चले याइ,

छंगु गौरवयात स्यंकाबी।

8 इमिसं छन्त मृत्यु लोकय् क्वकाइ

अले छ समुद्रया दथुइ ग्यानापुक सी।

9 छु छन्त स्याइपिनिगु न्ह्यःने छं अज्ज नं “जि घ: ख:” धका: धायेगु ला?

छन्त स्याइपिनिगु ल्हातय् छ घ: मखु, मनू जक जुइ।

10 विदेशीतय्गु ल्हातं छन्त

छम्ह म्हय चिं मतःम्ह मनूयात थें स्याइ।

“ जिं थ्व खँ धयागु खः, परमप्रभु परमेश्वरं धयादी। ”

दुरोसयाम्ह जुजुया निति बिलापया म्ये

11 हाकनं परमप्रभुयागु थ्व वचन जिथाय् वल,

12 “अय् सीमानिम्ह मनू, दुरोसयाम्ह जुजुया बारे बिलापया म्ये दय्काः वयात धा, ‘परमप्रभु परमेश्वरं थथे धयादी,

“ ‘छंके सिद्धया चिं तःगु खः,

छ तसकं बांलाःम्ह व बुद्धिं जाःम्ह खः।

13 छ ला परमेश्वरया क्यब
अदनय् दुम्ह खः,

छन्त फुक्क मू वंगु थीनं बांलाकःगु दु –

कार्नेलेन, पुखराज, पन्ना,

पुष्पराज, आनिक्स, बिल्लौर,

नीलम, यू व फिरोजां, छ बांलाकाच्चंगु दु।

छंगु मणिक्ययात लुं हिनातःगु दु।

छन्त दय्कू खुन्हु हे उमित तयार याःगु खः।☆

14 सुरक्षा बीम्ह करूब जुइत छन्त अभिषेक याःगु खः,

जिं छन्त थ्व पद बियागु खः।

छ परमेश्वरया पवित्र पर्वतय् दुगु खः।

छ मि थें थीगु ल्वहंतय्गु दथुइ थुखे उखे जुइगु खः।

15 जिं छन्त दय्काबलय् निसें छंगु अधर्म मलूतले

छ थःगु फुक्क पहःचहलय्

दोष मदुम्ह जुल।

16 तर यक्व थासय् दुगु व्यापारया कारणं

ल्वापुख्यापुं जायाः

छ पापी जुल।

उकिं जिं छन्त परमेश्वरया पर्वतं अपमान यानाः कुतुकाछ्वया,

हे सुरक्षा बीम्ह करूब,

जिं छन्त मि थें थीगु ल्वहंतय्गु दथुं नाश याना।

17 थः बांलाःगुलि छंगु मन तःधंछुयाः,

वैभवं याना: छंगु बुद्धि स्यनावन।
 जिं छन्त बँय् वांछवयाबिया,
 जिं छन्त जुजुपिनिगु न्ह्यःने इमित क्यनेत तयाबिया।
 18 छंगु यक्व पाप व बेइमान व्यापारपाखें
 छं छंगु पवित्रगु थाय् अशुद्ध यात।
 थुकिं याना: जिं छपाखें हे मि पिकयाबिया,
 उकिं हे छन्त भस्म यात।
 छन्त क्वथीक स्वइपि सकसिगु न्ह्यःने
 जिं छन्त जमिनय् नौ यानाबिया।
 19 जाति जातियापि छन्त म्हस्यूपि
 छ खना: वातां जूगु दु।
 छंगु अन्त ग्यानापुक जुइत्यंगु दु,
 छ हाकनं गुबलें दइ मखुत।' ”

सीदोनया विरोधय् अगमवाणी

20 परमप्रभुयागु थ्व वचन जिथाय् वल, ☆
 21 “अय् सीमानिम्ह मनु, थःगु ख्वा: सीदोनपाखे स्वय्का: वयागु विरोधय् थ्व
 अगमवाणी ल्हा,
 22 अले थथे धा, ‘परमप्रभु परमेश्वरं थथे धयादी,
 “ ‘हे सीदोन, जिं छंगु विरोधय् दु,
 छंगु दुने हे जिं महिमा काये।
 जिं वयात सजाँय बीबलय्
 छं जि हे परमप्रभु परमेश्वर खः धका: सी।
 अले जिं थःगु पवित्रता वयागु दुने हे क्यने।
 23 जिं छन्थाय् महामारी छवये,
 छंगु गल्लि गल्लिइ जिं हिबा: वय्काबी।
 छंगु प्यखेरं वयागु तरवार चले जुइ,
 अले छंगु दुने हे स्याःपि क्वःदली।
 अले छं जि हे परमप्रभु खः धका: म्हसी।’ ”

इस्राएलया बारे अगमवाणी

☆ 28:20-26 योए ३:४-८; जक ९:१-२; मत्ती ११:२१-२२; लूक १०:१३-१४

24 “ ‘आवंलि इस्राएलयापि मनुतय सिउँडी व च्वामुगु कँ दुपि ईख याइपि जःलाखःलात दइ मखुत। अले इमिसं जि हे परमप्रभु परमेश्वर खः धकाः सी।

25 “ ‘परमप्रभु परमेश्वरं थथे धयादी – जात जातितय दथुइ छ्यालब्याल जूपि इस्राएलयापि मनुत जिं मुंके, अले जाति जातितयगु न्ह्यःने जिं थःमं थःत छिमिगु दथुइ पवित्र क्यने। अले जिम्ह दास याकूबयात जिं बियागु इमिगु थःगु हे देशय् इपि च्वनी।

26 अन इपि सुरक्षित जुयाः याउँक च्वनी, इमिसं छँ दयकी अले दाखक्यब दयकी। इमित मयय्कीपि सकसितं जिं सजाँय बी, अले इपि सुरक्षित जुइ। अले इमिसं जि हे परमप्रभु खः धकाः सी।’ ”

29

मिश्र देशया बारे अगमवाणी

1 झिगू दँया झिगू लाया झिनिन्ह दुखुन्ह* परमप्रभुयागु थ्व वचन जिथाय् वल, ☆

2 “अय् सीमानिम्ह मनु, छंगु ख्वाः फारोपाखे स्वय्काः वयागु व फुक्क मिश्र देशया विरोधय् अगमवाणी धा।

3 वलिसँ खँ ल्हा, अले वयात थथे धा, ‘परमप्रभु परमेश्वरं थथे धयादी –
“ ‘हे मिश्र देशयाम्ह जुजु फारो, जि छंगु विरोधय् दु,

थःगु खुसिचातयगु दथुइ च्वनाच्वनीम्ह छ तःधीम्ह लखय् च्वनीम्ह जन्तु,
छं थथे धाःगु दु, “निल खुसि जिगु हे खः,

व जिगु निंति दय्कागु खः।”

4 जिं छंगु वाकुधीलय् बल्छीत तयाबी,
छंगु बिखुलिइ छंगु खुसिचाया न्यात जिं प्यपुंके बी।

छंगु बिखुलिइ प्यपुनाच्वंपि उपि न्यातनापं जिं छन्त
छंगु खुसिचातयगु दथुं सालाः लिकाये।

5 छ व छंगु खुसिचायापि फुक्क न्यातयत्
जिं मस्भूमिइ त्वःताबी।

छ चक्कंगु ख्यलय् क्वःदली।

छन्त सुनानं मुंकी मखु वा लानाकाइ मखु।

* 29:1 २९:१ ७ जनवरी ५०७ बी.सी. ☆ 29:1 २९:१-३२:३२ यशै १९:१-२५; यर ४६:२-२६

जिं छन्त पृथ्वीयापि पशुत व आकाशयापि झंगःपन्छितयू आहारा यानाबी।

6 “ अले मिश्र देशय् च्वपि सकसिनं जि हे परमप्रभु खः धकाः सी।

“ छ इस्राएलया घरानाया निति छपु तिकथि थें जूगु दु। ☆

7 इमिसं छन्त ज्वनीबलय् छ त्वःदुलिगु, अले इमिगु ब्वहलय् घाःपाः हे घाःपाः जुइगु। इपि छंके लिधनीबलय् छ त्वःदुलिगु, अले इमिगु जन्हुँफा मर्के जुइगु।

8 “ उकिं परमप्रभु परमेश्वरं थथे धयादी – जिं छंगु विरोधय् छगू सेना हये, जिं छिमि पशुत व मनूत निखलःसितं स्यानाबी।

9 मिश्र देश झिजांमिजां दंगु सुनसान थाय् जुइ। अले इमिसं जि हे परमप्रभु खः धकाः सी।

“ छायाःसा छं धाःगु दु, “नील खुसि जिगु हे खः, जिं उकियात दय्कागु खः।”

10 उकिं जि छ व छंगु खुसिचातयगु विरोधय् दु, उत्तरय् मिगदोलंसिं दच्छिनय् आश्वान तक व कूश† देशया सिमाना तक जिं मिश्र देशयात झिजांमिजां व नाश यानाबी।

11 पिइदँ तक अन सुं मनू वा पशुं पलाः तक नं तइ मखु, न अन सुं च्वनी।

12 जिं मिश्र देशयात नाश जूगु देशतयगु दथुइ उजाड यानाबी, अले उकिया शहरत नाश जूगु शहरतयगु दथुइ पिइदँ तक उजाड हे जुयाच्चनी। अले जिं मिश्रीतयत् जाति जातितयगु दथुइ छ्यालब्याल व देश देशय् उखेलाः थुखेलाः यानाबी।

13 “ अयनं परमप्रभु परमेश्वरं थथे धयादी – पिइदँ फुइ धुंकाः जिं मिश्रीतयत् इपि छ्यालब्याल जूगु जाति जातितयगु दथुं मुंके।

14 अले इमिगु लसता व शान्ति नं लित हयाबी। अले जिं इमित इमि पुर्खातयगु देश, दच्छिन मिश्रय् हये। अन इपिं छगू चिधंगु राज्य जुयाच्चनी।

15 व फुक्क राज्यत मध्ये दकलय् चिधंगु राज्य जुइ। इमिसं गुबलें नं मेगु जातियात शासन याये फइ मखु। जिं इमित हाकनं गुबलें मेगु जातियात शासन याये मफय्क कमजोर यानाबी।

16 इस्राएलयापि मनूतयसं हाकनं गुबलें मिश्र देशयात भलसा याइ मखु। तर झीसं न्हापा मिश्रयात भलसा यानाः गुलि बांमलाःगु ज्या याना धकाः मिश्रयागु छ्यालब्याल जूगु अवस्थां इस्राएलयात सिइके बी। अनंलि इमिसं जि हे परमप्रभु परमेश्वर खः धकाः सी।”

☆ 29:6 २९:६-७ यशै ३६:६ † 29:10 २९:१० कूश थ्व मिश्रया दच्छिनय् लाःगु लागाया पुलांगु नां खः।

नबूकदनेसर जुजु मिश्रयात त्याकी

17 जिमित ज्वना: बेबिलोनय् यंकूगु न्हयगूगु दँया न्हापांगु लाया न्हापांगु दिनय्ः परमप्रभुयागु थ्व वचन जिथाय् वल,

18 “अय् सीमानिम्ह मनु, बेबिलोनयाम्ह जुजु नबूकदनेसरं टुरोसयात घेरय् यायेत थः सेनायात थुलि थाकुगु ज्या याकल कि इमिगु छेनय् च्वंगु सँ हे हाया वन, फुक्कसिगु ब्वहयागु छेंगू च्वतुत, अयनं थुलि दुःख याना नं जुजु व सेनां छुं नं काये मखन।

19 उकिं परमप्रभु परमेश्वरं थथे धयादी – जिं मिश्र देश बेबिलोनयाम्ह जुजु नबूकदनेसरयात बी, वं अन दुगु धन-सम्पत्ति यंकी। वं देशयागु फुक्क लुटपाट याना: थः सेनायात ज्यालाबी।

20 जिं वयागु कुतःया लागि वयात मिश्र देश बियागु दु छायाधा:सा वया सेनां थ्व जिगु लागि यात, परमप्रभु परमेश्वरं धयादी।

21 “उखुन्हु जिं इस्पाएलया घरानाया निंति छपु नेक् बुइके, छं नवाइबलय् मनूतयसं छंगु खँ न्यनी धका: पक्का याये। अले इमिसं जि हे परमप्रभु खः धका: सी।”

30

मिश्र देशया निंति नुगः मछिंकूगु

1 परमप्रभुयागु थ्व वचन जिथाय् वल,

2 “अय् सीमानिम्ह मनु, थ्व अगमवाणी ल्हाना: थथे धा, ‘परमप्रभु परमेश्वरं थथे धयादी,

“ ‘ख्वःसलं थथे धा,
“हाय! व दि!”

3 छायाधा:सा व दिं लिक्क हे दु,

व सुपाँय्या दिं जुइ,

व जाति जातिया लागि नाशया दिं जुइ।

4 मिश्र देशय् लडाइँ जुइ,

कूश देशय् नं संकट वइ।

स्याःपिं मनूत मिश्र देशय् क्वःदलीबलय्

उकिया धन-सम्पत्ति यंकीगु जुइ।

उकिया जग थुनाबीगु जुइ।

5 “कूश, पूत, लूद व सारा अरब देश, कूब व बाचा चिनातःगु देशयापि मनूतयूत मिश्र देशयापि मनूतनापं तरवारं स्याइ।

6 “परमप्रभुं थथे धयादी,

“मिश्र देशनापं मिलय् जूपि पतन जुइ,
मिश्रीतयूंसं घमण्ड याइगु शक्ति पतन जुइ।
वया उत्तरय् मिगदोलनिसें दच्छिनय् आश्वान तक
च्वंपि मनूतयूत तरवारं स्याइ।”

जि, परमप्रभु परमेश्वर न्ववानागु दु।

7 “व देश संसारय् दकलय् झिजांमिजां दंगु देश जुइ।

उकिया शहरत भज्यंक नाश जूगु शहरतय्गु दथुइ लानाच्चनी।

8 जिं मिश्र देशय् मि तयाबीबलय्
अले वयात ग्वाहालि बीपि फुक्क चुंचुं जुइबलय्
इमिसं जि हे परमप्रभु खः धकाः सी।

9 “उखुन्हू याउँक च्वनाच्चंपि कूशीतयूत ख्याइगु खबर बीत जिगु न्ह्यःनं दूतत नांचाय् च्वनाः पिहांवनी। मिश्र देश नाश जुइगु दिनय् इपि ग्याइ, छायाःसा व दि धात्थे हे वइ।

10 “परमप्रभु परमेश्वरं थथे धयादी –

“जिं बेबिलोनयाम्ह जुजु नबूकदनेसरया ल्हातं
मिश्र देशया सेनायात नाश यानाबी।

11 व अले वया तसकं दयामदुपिं मनूत
व देशयात तहसनहस यायेत हइगु जुइ।

इमिसं मिश्रया विरोधय् तरवार सालाः
देशयात स्याःपिं मनूतयूगु सीम्हं जाय्काबी।

12 जिं नील खुसिया लः गंकाबी
अले व देशयात दुष्ट मनूतयूगु ल्हातय् मियाबी।

व देश व उकी दुगु फुक्कयात जिं विदेशीतयूगु ल्हातं तहसनहस यानाबी।
जि परमप्रभुं थ्व खँ धयागु खः।

13 “परमप्रभु परमेश्वरं थथे धयादी –

“जिं मूर्तिनयूत नाश यानाबी।
नोपय् दुगु इवातात मदय्काबी।

मिश्र देशय् हाकनं गुबलें शासक दइ मखु,
थुकथं जिं थ्व देशय् आतंक थ्यंकाबी।

14 दच्छिन मिश्रयात जिं तहसनहस यानाबी,
सोअनय् मि तयाबी,
थेबेस शहरयात जिं सजॉय बी।

15 जिं मिश्र देशया बल्लाःगु किल्ला दुगु शहर
पेलुसियमयाके जिगु तं प्वके,
अले थेबेस शहरया सेनायात नाश यानाबी।

16 जिं मिश्र देशय् मि तयाबी,
अले पेलुसियम स्याः चायाः वाथा वाथा कनी।

थेबेस शहरया पःखाःया छुं भाग दुनी,
नोप धाःसा मदिकक आपतय् लानाच्चनी।

17 हेलीओपोलिस व बुबास्तीसयापिं ल्याय्म्हपिन्त तरवारं स्याइ,
अले फुकक शहरयात ज्वना यंकी।

18 तहपनेसय् जिं मिश्रीतय्गु जुवा त्वथुलाबीबलय्
अन न्हिनय् हे खिउँसे च्वनी,
वं घमण्ड याइगु वयागु शक्तिया नाश जुइ।

वयात सुपाँचं त्वपुइ,
वया गांतय् ज्वना यंकी।

19 थुकथं जिं मिश्र देशयात सजॉय बी,
अले इमिसं जि हे परमप्रभु खः धकाः सी।' ”

फारोया लप्पा त्वःथुलाब्यूगु

20 झिंछागू दँया न्हापांगु लाया न्हय्न्ह दुखुन्ह* परमप्रभुयागु थ्व वचन जिथाय्
वल,

21 “अय् सीमानिम्ह मनु, जिं मिश्र देशयाम्ह जुजु फारोया लप्पा त्वथुलाबियागु
दु। हाकनं तरवार चले याये फयेमा धकाः थुकियात पट्टी चिनाब्यूगु मदु थुकियात
लंकेत मलम पट्टी नं तःगु मदु।

* 30:20 ३०:२० २९ अप्रिल ५,८७ बि.सी.

22 उकिं परमप्रभु परमेश्वरं थथे धयादी – जि मिश्र देशयाम्ह जुजु फारोया विरोधय् दु। जिं वयागु त्वमधूगु व त्वधूगु निपुं हे लप्पा त्वथुलाबी, अले जिं वयागु तरवार वयागु ल्हातं कुर्काबी।

23 जिं मिश्रीतय्त जाति जातितय्गु दथुइ छ्यालब्याल यानाबी, अले इमित देश देशय् थुखेला: उखेला: यानाबी।

24 जिं बेबिलोनयाम्ह जुजुया ल्हा:यात बल्लाका: जिगु तरवार वयागु ल्हातय् बी। तर जिं फारोया लप्पा त्वथुलाबी, व धा:सा वयागु न्ह्य:ने सी थें च्वंक घा:पा: जूम्ह मनु थें हाली।

25 जिं मिश्र देशयाम्ह जुजुयात कमजोर यानाबी, बेबिलोनयाम्ह जुजुयात बल्लाकाबी। जिं जिगु तरवार बेबिलोनयाम्ह जुजुया ल्हातय् बीबलय्, वं व तरवार मिश्र देशया विरोधय् चले याइबलय् इमिसं जि हे परमप्रभु ख: धका: म्हसी।

26 जिं मिश्रीतय्त जाति जातितय्गु दथुइ छ्यालब्याल यानाबी अले देश देशय् थुखेला: उखेला: यानाबी। अले इमिसं जि हे परमप्रभु ख: धका: सी।”

31

मिश्रयात अश्रूनापं दौंजय् या:गु

1 झिंछगूगु दँया स्वंगूगु लाया न्हापांगु दिनय्* परमप्रभुयागु थ्व वचन जिथाय् वल,

2 “अय् सीमानिम्ह मनु, मिश्र देशयाम्ह जुजु व वया सेनायात थथे धा,
“ ‘छंगु वैभवय् छ थें जा:म्ह सु दु?

3 अश्रू देशयात स्व, छगू इलय् व लेबनानया देवदारु ख:,
उकिया बांवांला:गु कचां गुँयात किच: बियात:गु ख:,
उकिया च्वकात सुपौंय् दुथाय् तक थ्यनिगु ख:।

4 लखं उकियात सय्कल, बुंगा:चां उकियात तज्जा: यात।
उकिया ज:ख: च्वंगु खुसिचां उकियात प्याकाबिल,
उकिया खुसिं ख्यलय् च्वंगु फुक्क सिमायात प्याकल।

5 थुकथं ख्यलय् च्वंगु फुक्क सिमात मध्ये
व दकलय् तज्जा:गु सिमा जुल।

ल: यक्व दुगुलि उकिया यक्व कचामचा दत,
उपि त:मा जुया: न्यनावन।

* 31:1 ३१:१ २१ जुन ५८७ बी.सी.

6 उकिया कचामचाय् आकाशयापि

फुक्क झंगःपन्छितय्सं थःगु स्वं दय्कल।

उकिया कचाया क्वय् गुँयापि फुक्क पशुतय्सं थः मस्त बुइकल।

उकिया किचलय् फुक्क ततःधंगु जातित च्वंवल।

7 न्यनावंगु ताहाकःगु कचा दुगु

व छगू बांलाःगु सिमा खः,

छाय्धाःसा उकिया हा

यक्व लः दुगु थाय्या लिक्क दु।

8 परमेश्वरयागु क्यबया देवदास्या सिमा स्वयाः थ्व सिमा तसकं बांलाः।

थकुराःमा उकिया कचा ति मय्गं,

न चिनारया सिमात उकिया कचामचा ति ग्यं।

परमेश्वरयागु क्यबया छुं नं सिमा व ति बांलाः मजू।✧

9 जिं यक्व कचामचां उकियात बांलाकागु खः,

उकिं परमेश्वरया क्यबय् अदनया फुक्क सिमात व खनाः नुगः मुइकीगु।

10 “ ‘उकिं परमप्रभु परमेश्वरं थथे धयादी – व उलि तज्जाःगुलि अले उकिया च्वकात सुपाँय् दुथाय् तक थ्यंगुलि वया नुगः तःधं छुल।

11 उकिं जिं वयात जातित मध्ये छगू बल्लाःगु जातितय् शासकया ल्हातय् बियागु दु। वं धात्थें हे वलिसें बांमलाःगु व्यवहार याइ। वं याःगु मभिं गु ज्याया कारणं जिं वयात पितिनाछवयागु दु।

12 अले दकलय् ग्यानापुपि विदेशी जातितय्सं वयात पालाः त्वःताबिल। उकिया कचामचा पहाडत व फुक्क ब्यासिइ क्वःदल। उकिया कचात त्वदुलाः देशयागु फुक्क खुसिचाय् लानाच्वन। पृथ्वीया फुक्क जातित उकिया किचलं पिहां वल, अले उकियात त्वःताबिल।

13 क्वःदगु व सिमाय् आकाशयापि फुक्क झंगःपन्छित च्वन, उकिया कचाया दथुइ गुँयापि पशुत दु।

14 आवंलि मेमेगु सिमा न्हाक्व हे लः दुसां व सिमा थें तज्जाः जुइ मखु वा सुपाँय् दुथाय् तक थाहां वइ मखु अले उलि तज्जाः गुबलें जुइ फइ मखु। व फुक्क सिनावनीपिं मनूत थें नाश जुल अले पातालय् थ्यनी।

15 “ परमप्रभु परमेश्वरं थथे धयादी — गुखुन्हु उकियात पातालय् यंकल, उखुन्हु वयागु लागि नुगः मछिंकेत तज्जाःगु बुँगाःचा जिं त्वपुयाबिया। जिं उकिया खुसिचात पनाबिया। उकिया यक्व लः वयेगु दित। उकिया लागि जिं लेबनानयात खिउँकाबिया, उकिं यानाः ख्यलय् दुगु फुक्क सिमा सुकुगना वन।

16 जिं तःमागु सिमायात पातालय् वनीपिनापं चिहानय् कुर्काबियाबलय् व ग्वतुगु सलं जाति जातितय्त थरथर खाकाबिया। अबलय् अदनया फुक्क सिमात, लेबनानयागु दकलय् बांलाःगु व भिंगु सिमात, यक्व लः काःगु सिमातय्त पृथ्वीया क्वय् सान्त्वना दत।

17 वयागु किचलय् च्वनाच्चंपिं अर्थात देशत मध्ये वनापं मिलय् जूपिं नं तरवारं स्याःपिनापं पातालय् मिलय् जू वनी।

18 “ ‘अय् मिश्र, छंगु महिमा व वैभवय् अदनया सिमात मध्ये छन्त गुगु सिमानापं ज्वःलाकाः स्वयगु? अयनं छन्त नं अदनया सिमातनापं क्वय् पातालय् कुर्काबी। अले छ म्हय् चिं मतःपिनिगु दथुइ तरवारं स्याःपिनापं लानाच्चनी।

“ ‘थ्व धाःसा फारो व वया फुक्क सिपाईतय् पुचः खः, परमप्रभु परमेश्वरं थथे धयादी।’ ”

32

फारोयात ख्याच्चः न्यगु

1 झिनिगूगु दँया झिनिगूगु लाया न्हापांगु दिनय्* परमप्रभुयागु थ्व वचन जिथाय् वल,

2 “अय् सीमानिम्ह मनु, मिश्र देशयाम्ह जुजु फारोया बिलापया म्ये दय्काः वयात धा,

“ ‘जाति जातित मध्ये छ सिंह थें खः।

छ थःगु खुसिचाय् कय्कीम्ह,

लःयात थःगु तृति संकाः फोहर यानाबीम्ह तःधिकःम्ह समुद्रया जन्तु खः।

3 “ ‘परमप्रभु परमेश्वरं थथे धयादी,

“ ‘जिं छन्त जिगु जालय् क्यंकेत यक्व मनूत छवयाहये,

इमिसं छन्त जिगु जालय् साली।

4 अबलय् जिं छन्त जमिनय् त्वःताबी।

† 31:15 ३१:१५पाताल हिब्रू भाषाय् थ्व खँक्वः सिओल खः, थुकिया अर्थ सीपिनिगु थाय् खः। स्वयादिसँ हितो ३०:१६; योना २:२; हब २:५; यशै ५:१४; १४:१९,११,१५; २८:१५,१८; ३८:१०,१८; ५७:९; इज ३२:२१,२७

* 32:1 ३२:१ ३ मार्च ५८५ बि.सी.

जिं छन्त मैदानय् वान्छवयाः आकाशयापि
फुक्क कथंयापि झंगःपन्छितयत् छंगु च्वय् च्वनेबी।
पृथ्वीयापि फुक्क पशुतयत् छंगु ला नकेबी।

5 पहाड पहाडय् जिं छंगु ला हलाबी।
छंगु सीम्हं ब्यासिइ जाइ।

6 छपाखें बाः वःगु हिं
जिं पहाड पहाडय् तक जमिन प्याकाबी,
न्हसिकापत छंगु लां जाइ।

7 जिं छंगु नां तक नं मदय्काः छवयबलय्
जिं आकाशयात त्वपुयाबी,
उकिया नगुतयत् खिउँकाबी।

जिं सूर्ययात सुपाँचं त्वपुयाबी, तिमिलां जः बी मखु।☆

8 आकाशया फुक्क थीगु जःतयत्
जिं छंगु कारणं खिउँकाबी।
छंगु देशय् जिं खिउँ हयाबी।

परमप्रभु परमेश्वरं धयादी।

9 जाति जातितयथाय् छं म्हमस्यगु देशय्
जिं छंगु नाशया खबर हयेबलय्,
जिं यक्व मनूतयगु मन थातय् मलाकाबी।

10 जिं यक्व मनूतयत् छ खनाः वातां यानाबी।
इमि जुजुपिनि न्ह्यःने जिं जिगु तरवार संकेबलय्
उपि जुजुपिं थुरथुर खाइ।

छंगु पतनया दिनय्
इपि छम्ह छम्ह थथःगु जीवनया लागिं थुरथुर खाइ।

11 “ ‘छाय्धाःसा परमप्रभु परमेश्वरं थथे धयादी,
“ ‘बेबिलोनयाम्ह जुजुया तरवार छंगु विरोधय् वइ।

12 जिं छंगु फुक्क सेनायात बहादुर सिपाईतयगु तरवारपाखें पतन यानाबी।
इपि मनूत मध्ये दकलय् दयामदुपि खः।

इमिसं मिश्र देशया घमण्डयात चुंचुं यानाबी।

☆ 32:7 ३२:७ यशै १३:१०; योए २:१०, ३१; मत्ती २४:२९; मर्क १३:२४-२५; लूक २१:२५; प्रका ६:१२-१३; ८:१२

वया फुक्क सेना नाश जुइ।

- 13 खुसि खुसिया सिथं वया: फुक्क सा द्रुहंतयत् जिं नाश यानाबी।
अनंलि उपि खुसितयत् न मनूतयग् तुति फोहर याइ न पशुतयग् ख्वलं फोहर याइ।✧
- 14 अनंलि जिं उकिया ल:यात यचुकाबी,
उकिया खुसित चिकं थें सलल न्ह्याइ,
परमप्रभु परमेश्वरं धयादी।

- 15 जिं मिश्र देशयात उजाड यायेबलय,
उगु देशय् दुगु फुक्क नाश जुइबलय,
जिं अन च्वंपिं सकसितं स्यायेबलय,
इमिसं जि हे परमप्रभु ख: धका: सी।'

16 “मनूतयसं बिलाप यायेत बिलापया म्ये थ्व हे ख:। जाति जातिया म्हायपिन्सं थ्व हाली, छाया:सा मिश्र देश व वया फुक्क सेनाया निति इमिसं थ्व हे बिलापया म्ये हाली, जि, परमप्रभु परमेश्वर न्ववानागु दु।”

मिश्र पातालय् कुतुं वंगु

- 17 झिनिगु दँया न्हापांगु लाया झिन्यान्हु दुखुन्हु† परमप्रभुयागु थ्व वचन जिथाय् वल,
18 “अय् सीमानिम्ह मनू, मिश्र देशया सेनाया लागिं ख्व:, वयात व बबल्ला:गु जातिया म्हायपिन्त पातालय् लानाच्चंपिं मनूतयथाय् पृथ्वीया क्वयपाखे क्वका!
19 इमित धा, ‘छु छं थ:त मेपिं फुक्क स्वया: बांला: धका: च्वनागु ला? पातालय् हूँ अले अन खतना मजूपिनापं लानाच्चँ।’
20 इपि तरवारं स्या:पिनिगु दथुइ क्व:दली। व देशयात तरवारया निति हे ल:ल्हा:गु दु। अथे जुया: मिश्रयात वया फुक्क फौजनापं सालायंकी!
21 पातालय् वीर कप्तानतयसं फारो व वया ग्वाहालिमिपिन्त थथे धाइ, ‘इपि क्वय:व:गु दु, इपि तरवारं स्या:पिनापं व खतना मजूपिनापं लानाच्चंगु दु।’
22 “अश्शर देश, वया फुक्क सेनानापं अन दु, वयागु चिहान वयागु प्यखें दु, फुक्कसित तरवारं स्याये धुंकूगु दु।

✧ 32:13 ३२:१३ इज ३२:२ † 32:17 ३२:१७ १७ मार्च ५८५ बी.सी.

23 इमि चिहानत पातालया तज्जाःथायया दुने दु। वया सेना वयागु हे चिहानया प्यखेरं दु। म्वाःपिनिगु देशय् ख्याना जुइपिं सकसितं स्याये धुंकल, तरवारं इमित ग्वतुइका ब्यूगु दु।

24 “एलाम अन दु! वयागु चिहानया प्यखेरं वया सेना दु! थुपिं सकलें तरवारं पाला स्याःपिं खः। म्वाःपिनिगु देशय् ख्याना जुइपिं सकलें पृथ्वीया क्वय् खतना मजुइकं वन। पातालय् वंपिनापं हे इमिसं बेइज्जत फयाच्चंगु दु।

25 वयागु चिहानया प्यखेरं वया सेनानापं स्याःपिनिगु दथुइ वयागु नितिं छगू आराम यायेगुथाय् दयकातःगु दु। इपिं सकलें तरवारं स्याःपिं म्हय् चिं मतःपिं खः। म्वाःपिनिगु देशय् इमिसं ख्याना जूगुलि क्वय् पातालय् वंपिनापं हे इमिसं बेइज्जत फयाच्चंगु दु।

26 “मेशेक व तूबल नं अन दु। इमि चिहानया प्यखेरं इमि फुक्क सेना दु। इपिं सकलें खतना मजूपिं खः। इपिं सकसिनं म्वाःपिनिगु देशय् ख्याना जूगुलि इपिं फुक्कसित तरवारं स्याःगु खः।

27 इपिं मेपिं बहादुर सिपाईतनापं लानाच्चनी, गुपिं सिपाईत ग्वतूगु दु, गुपिं थथःगु लडाइया हतियारनापं चिहानय् वंगु दु, गुपिन्सं तरवार थथःगु छय्या क्वय् तःगु दु। इपिं सिपाईतयसं म्वाःपिनिगु देशय् ख्याना जूगुलि इमिगु पापया सजाँय इमिगु हे क्वच्चय् लाःगु दु।

28 “हे फारो, छ नं कुचा कुचा जुयाः तरवारं स्याःपिं खतना मजूपिनिगु दथुइ लानाच्चनी।

29 “एदोम व वया जुजुपिं अले सकलें शासकत अन दु। इमिके शक्ति दुसां तबि इमित तरवारं स्याःपिनापं तयातःगु दु। इपिं क्वय् पातालय् वनीपिनापं, खतना मजूपिनापं लानाच्चंगु दु।

30 “उत्तरयापिं फुक्क शासकत व फुक्कं सीदोनीत अन दु। इमिगु शक्तिं ग्यासु थंगु जूसां इपिं स्याःपिनापं हे बेइज्जत जुयाः चिहानय् वंगु दु। इपिं म्हय् चिं मतय्कं तरवारं स्याःपिनापं लानाच्चंगु दु। पातालय् वनीपिलिसें इमिगु नं बेइज्जत जूगु दु।

31 “फारो व वया फुक्क सेनां इमित खनी, अले थःगु सेना नाश जूगुलि वयात सान्त्वना दइ। जि, परमप्रभु परमेश्वर न्ववानागु दु।

32 म्वाःपिं मनूत च्वनीगु थासय् जिं वयात ग्यासु थंके बियागु जूसां, व थः फौजलिसें तरवारं स्याःपिं म्हय् चिं मतःपिनापं लानाच्चनी। परमप्रभु परमेश्वरं धयादी।”

33

इजकिएलयात इस्राएलीतय् पिवाः ल्यःगु

1 परमप्रभुयागु थ्व वचन जिथाय् वल, ☆

2 “अय् सीमानिम्ह मनु, थः देशय् च्वंपिं मनूतनापं खँ ल्हाः, अले इमित थथे धा, ‘देशया विरोधय् जिं छगू सेना हयेबलय्, अले उगु देशयापिं मनूतय्सं थःपिं मध्ये छम्हय्सित पिवाः च्वनेत ल्यइबलय्,

3 पिवाः च्वंम्ह मनुखं शत्रुत वयाच्वंगु खनाः मनूतय्त सुचं बीत तुरही पुल धाःसा

4 सुनानं तुरहीया सः न्यनाः नं ध्यान मबिल वा शत्रुत वयाः वयात स्यात धाःसा व सीगुया दोषी व हे जुइ।

5 वं तुरहीया सः न्यना नं सुचंयात वास्ता मयाःगुलि वयागु हि वयागु हे छेनय् लाइ। वं सुचं मानय् याःगु जूसा बचय् जुइगु खः।

6 तर शत्रुत वयाच्वंगु खनाः नं उम्ह पिवाः च्वंम्हय्सिनं सुचं बीत तुरही मपुल धाःसा अले शत्रुत वयाः सुं छम्हय्सित स्यात धाःसा उम्ह मनु थःगु हे पापया कारणं सीगु जुइ, तर व मनु सीगुया ल्याःचाः जिं पिवाः च्वंम्हय्सिके काये।”

7 “अय् सीमानिम्ह मनु, जिं छन्त इस्राएलया घरानाया पिवाः यानागु दु। उकिं जिं आः धयाच्वनागु खँ न्यँ, अले इमित जिगुपाखें ख्याच्वः ब्यु!

8 जिं छम्ह मभिम्ह मनूयात ‘हे मभिम्ह मनु, छ धातथें हे सी’ धकाः धायेबलय् तर वयागु ज्यान बचय् यायेत छं ख्याच्वः मबिल, वा वयागु मभिंगु पहःचहःया लागि वयागु विरोधय् सल्लाह मबिल धाःसा व मनु पापया कारणं सी, अले वयागु हियागु ल्याःचाः जिं छंके काये।

9 तर छं व मभिम्ह मनूयात ख्याच्वः बिल अले व थःगु मभिंगु ज्यापाखें वा थःगु मभिंगु पहःपाखें लिहां मवल धाःसा व थःगु अधर्मय् हे सी, तर छं धाःसा थःम्हं थःत बचय् याइ।”

पिवाःया बुखँ

10 “अय् सीमानिम्ह मनु, इस्राएलया घरानायात धा, “छिमिसं थथे धयाच्वंगु दु, “जिमिगु पाप व अपराधं जिमित क्वत्यलातःगु दु। उकिं यानाः जिपिं बमलाना वनाच्वंगु दु। जिपिं गथे यानाः म्वानाच्वनेगु?” ’

11 उकिं छं इमित थथे धा, ‘गथे जि धातथें म्वाःम्ह खः, जि, परमप्रभु परमेश्वर न्ववानागु दु, मभिपिं मनूत सीगु खनाः जि लय्ताय् मखु, तर इमिसं थःगु मभिंगु

पहःचहः त्वःताः इपिं म्वाःगु जितः स्वयेमास्ति वः। थःगु मभिंगु पहःचहः त्वःति! अय् इस्राएलया घराना छिपिं छाया सीगु?’

12 “अथे जुयाः अय् सीमानिम्ह मनु, छिमि मनूतयत् धा, ‘सुं धर्मीम्ह मनुखं आज्ञा पालन मयात धाःसा इमिगु भिंगु ज्यां इमित बचय् याये फइ मखु, सुं मनुखं मभिंगु ज्या यायेगु त्वःतल धाःसा इमित इमिसं न्हापा याःगु मभिंगु ज्याया सज्जय जुइ मखु। सुं धर्मीम्ह मनुखं अपराध यात धाःसा वं याःगु न्हापायागु धार्मिकतां वयात बचय् याकेबी मखु।’

13 जिं उम्ह धर्मीम्ह मनूयात ‘छ धात्थें म्वाइ’ धकाः धाइबलय् वं थःगु धार्मिकताय् भलसा तयाः मभिंगु ज्या यात धाःसा वयागु छुं नं धार्मिकताया ज्यायात लुमंकीगु जुइ मखु। वं याःगु मभिंगु ज्याया कारणं हे व सी।

14 जिं मभिंम्ह मनूयात ‘छ धात्थें सी’ धकाः धाइबलय् वं थःगु पाप त्वःताः न्याययागु व खःगु ज्या यात धाःसा,

15 धाये कि, वं तयासा ब्यूबलय् कयातःगु बरः लित बिल, थःम्हं खुयायंकूगु सामान लित बिल, अले जीवन बीगु नियम मानय् यात व मभिंगु ज्या मयात धाःसा व धात्थें म्वाइ, व सी मखु।

16 वं याःगु न्हायागु नं पाप वयागु विरोधय् लुमंकीगु जुइ मखु। वं न्याय व खःगु ज्या याःगु दु, व धात्थें हे म्वाइ।

17 “अयूनं छिमि मनूतयसं थथे धयाच्चंगु दु, ‘परमप्रभुया चाला थीक मजू।’ तर इमिगु हे चाला ठीक मजू।

18 सुं धर्मीम्ह मनुखं थःगु धार्मिकता त्वःताः मभिंगु ज्या यात धाःसा धात्थें हे व सी।

19 सुं मभिंम्ह मनुखं थःम्हं यानावयाच्चंगु मभिंगु ज्या त्वःताः न्याय व खःगु ज्या यात धाःसा उकिया कारणं व म्वाइ।

20 तर अय् इस्राएलया घराना, छिमिसं धाइ, ‘परमप्रभुं खःगु ज्या यानामदी।’ जिं छम्ह छम्ह मनूया न्याय वयागु पहःचहःकथं याये।”

यरूशलेम नाश जूगु खबर

21 जिमित ज्वनाहःगु झिनिगूगु दँया झिगूगु लाया न्यान्ह दुखुन्ह* यरूशलेमं बिस्सुं वःम्ह छम्ह मनुखं जिथाय् वयाः धाल, “शहर नाश जुल।”☆

* 33:21 ३३:२१ ८ जनवरी ५८५ बी.सी. ☆ 33:21 ३३:२१ २ राज २५:३-२१; २ इति ३६:१५-२१; यर ३९:२-१०; ५२:४-२७

22 व मनू थ्यंक: वःगु दिया छन्हु न्ह्यःयागु सन्ध्याका: इलय् परमप्रभुया शक्ति जिके वल। सुथय् व मनू थ्यंक: वये न्ह्यः वय्कलं जिगु म्हुतु चाय्काबिल। उकिं जिगु म्हुतु चाल, उबलय् निसैं जि सुम्क मच्चना।*

23 परमप्रभुया वचन जिथाय् वल,

24 “अय् सीमानिम्ह मनू, नाश जूगु इस्राएल देशय् च्वनाच्चं पिं मनूतय्सं धयाच्चंगु दु, ‘अब्राहाम छम्ह हे जक मनू जूसां वं इस्राएल देशयात अधिकार यात। तर झीपिं ला यक्व दु। धात्थें हे झीत थ्व देश अधिकार यायेत ब्यगु दु।’

25 अथे जुया: इमित धा, ‘परमप्रभु परमेश्वरं थथे धयादी – छिमिसं लानापं हि नइगु, छिमिसं मूर्ति पजा याइगु, छिमिसं मनूत स्याइगु, धात्थें हे छिमिसं थ्व देश छिमिगु खः धका: मतिइ तयागु ला?’

26 छिमिसं थःगु तरवारय् भलसा तइगु, छिमिसं घच्चाइपुगु ज्या याइगु, छिपिं सकसिनं छम्हय्सिनं मेम्हय्सिया कलाःयात स्यंकीगु। धात्थें हे छिमिसं थ्व देश छिमिगु खः धका: मतिइ तयागु ला?’

27 “इमित धा, ‘परमप्रभु परमेश्वरं थथे धयादी – गथे जि धात्थें म्वा:म्ह खः, नाश जूगु शहरय् च्वनाच्चं पिं मनूत तरवारं सी। ख्यलय् दुपिन्त जिं गुँपशुतय्त नयेत बी। किल्लाया व गुफाय् दुपिं महामारी सी।

28 जिं व देशयात तहसनहस व झिजांमिजां यानाबी, अले तधंछुया: बलयात नाश यानाबी। इस्राएलया पहाडत सुं न वये वने मफय्क झिजांमिजां यानाबी।

29 जिं इमिसं या:गु घच्चाइपुगु ज्याया नितिं देशयात झिजांमिजां व सुनसान यानाबीबलय् इमिसं जि हे परमप्रभु खः धका: सी।’

30 “अय् सीमानिम्ह मनू, छंगु बारे देशय् च्वं पिं छिमि मनूत छथाय् मुना: प:खा: व लुखाया कुनय् कुनय् दना: छम्हय्सिनं मेम्हय्सित थथे धाइ, ‘वा, परमप्रभुपाखें व:गु खबर छु खः व न्येनेनु।’

31 इमिसं न्ह्याबलें या:थें जिमि मनूत छन्थाय् वइ अले छंगु खँ ध्यान बिया: न्येनेत छंगु न्ह्या:ने च्वनी। तर इमिसं छं धा:थें याइ मखु। इमिगु म्हुतुइ मिसाह्य: खँ जक दइ, तर इमिगु नुगलं ध्यबा जक माली।

32 छ इमिगु लागि बांला:गु स: दुम्ह वा बांलाक बाजं थायेस:म्ह मनू स्वया: अप्व: छुं नं मखु। छं धा:गु खँ ला इमिसं न्यनी तर छं धा:थें याइ मखु।

33 “छं धा:गु फुक्क खँ जुइबलय् इमिसं छम्ह अगमवक्ता इमिगु दथुइ व:गु खः धका: इमिसं सी।”

34

इस्त्राएलया फैजवाःत

1 परमप्रभुयागु थ्व वचन जिथाय् वल,

2 “अय् सीमानिम्ह मनु, इस्त्राएलया फैजवाःतय्गु विरोधय् अगमवाणी यानाः उपि फैजवाःतय् तथे धा! ‘परमप्रभु परमेश्वरं थथे धयादी – धिक्कार दु, थःगु जक वास्ता याइपि इस्त्राएलया फैजवाःतय् त। छु! फैजवाःतय्सं फैच्वलय् तय्गु जक वास्ता यायेमाःगु, मखु ला?

3 छिमिसं धौ नइगु, ऊनया वसः फीगु, ल्हंल्हं पि पशुत स्याइगु, बथांयात धाःसा वास्ता हे मयाः।

4 छिमिसं बमलाःपिन्त बल्लाकूगु मदु, बिरामीतय् लायकूगु मदु, घाःपाः जूपिन्त मलम बुलाः पट्टी तयाब्यगु मदु। छिमिसं लँ ट्रंकुपिन्त खःगु लँ हःगु मदु, तनाच्चपिन्त माःगु मदु। छिमिसं इमित बल व जबरजस्तिं शासन याःगु दु।

5 अथे जुयाः फैजवाः मदुगुलि इपिं छ्यालब्याल जुल, इपिं फुक्क गुँपशुया आहार जुल।☆

6 जिम्ह फैत लँ ट्रंकाः पहाड पहाडय् व ततःजाःगु डाँडाय् वन। इपिं पृथ्वीया फुक्क थासय् छ्यालब्याल जुल। सुनानं इमित वास्ता मयाः, सुनानं इमित माःमवं।

7 “ ‘उकिं हे फैजवाःत, जि, परमप्रभुया वचन न्यँ!

8 जि, परमप्रभु परमेश्वर न्ववानागु दु, गथे जि धाल्थे म्वाःम्ह खः, फैजवाः मदुगुलि जिगु बथांयात लुतय् याःगु दु, गुँपशुया आहारा जूगु दु। छायाःसा जिम्ह फैजवाःतय्सं जिगु बथांयात माःमवं, फैतय् वास्ता मयासें थःगु हे जक वास्ता यात।

9 उकिं, हे फैजवाःत, जि, परमप्रभुयागु वचन न्यँ!

10 जि, परमप्रभु परमेश्वर थथे न्ववानागु दु – जि फैजवाःतय्गु विरोधय् दु। जिं इमिके थःगु बथांया ल्याःचाः काये। जिं उपिं फैजवाःतय् बथांयात नकेगु ज्यापाखे लिक्काबी, इमिसं हाकनं थथःगु प्वाः जायके खनी मखु। जिं छिमिगु म्हुतुं जिगु बथांयात बचय् याये, अले जिम्ह फैत इमिगु निती आहारा जुइ मखु।” ”

भिम्ह फैजवाः

☆ 34:5 ५-६ गन्ती १७:१७; १ राज २२:१७; २ इति १८:१६; जक १०:२; मती ९:३६; मर्क ६:३४

11 “ परमप्रभु परमेश्वरं थथे धयादी – आ: जिं थ:म्हं हे जिम्ह फैतयूत माला: इमित स्वये।☆

12 गथे थ:गु बथां थुखे उखे छ्यालब्याल जुइबलय् फैजवालं फैच्वलयूतयूत मा:वनी, अथे हे जिं जिम्ह फैतयूत माले। सुपाँय् व तसकं खिउँगु दिनय् छ्यालब्याल जूगु फुक्क थासं जिं इमित बचय् याये।

13 जिं इमित जाति जातिया थासं लिगना हये, अले देश देशं मुके। जिं इमित इमिगु थ:गु हे देशय् हये, जिं इमित इस्राएलया पहाड पहाडय् उकिया खुसिचा खुसिचाय् व देशयागु फुक्क बस्तीइ ज्वये।

14 जिं इमित बांला:गु घाँय्ख्यलय् ज्वये। इस्राएलया तत:जा:गु पहाडत इमिगु ज्वयेगु थाय् जुइ। अन इपिं भिगु ख्यलय् ग्वार्तुलाच्वनी। इस्राएलया पहाड पहाडय् भिगु ख्यलय् इपिं ज्वये खनी।

15 जिं थ:म्हं हे जिम्ह फैत स्वये, अले इमित अन थ्यने, परमप्रभु परमेश्वरं धयादी।

16 तंपिन्त जिं माले, लँ दूंकुपिन्त जिं लुइका: हये। घा:पा: जूपिन्त मलम तया: पट्टी चिनाबी, बमला:पिन्त बल्लाकाबी। तर ल्हँपिं व बल्ला:पिन्त जिं नाश यानाबी। ख:कथं बथां स्वइम्ह फैजवा: जि जुइ।

17 “ हे जिगु बथां, छिमित धा:सा परमप्रभु परमेश्वरं धयादी – जिं छम्ह फै व मेम्ह फैया दथुइ, अले मिजपिं फैतयगु व दुगुतयगु दथुइ न्याय याये।

18 भिगु ख्यलय् ज्वये दया: नं छिमित मगात ला? छु छिमिसं ल्यं दुगु घाँय्ख्य:यात तुति न्हइमा: ला? छु सफा लखं छिमित मगात ला? छाया छिमिसं मेगु ल:यात तुति ध्याच: हे ध्याच: यानागु?

19 छु! जिगु बथानं छिमिसं तुति न्हगु घाँय् नयेगु ला, अले छिमिगु तुति ध्याच: हे ध्याच: या:गु ल: त्वनेगु ला?

20 “ उकिं जि परमप्रभु परमेश्वरं इमित थथे धाये – स्व! जिं थ:म्हं हे ल्हँपिं ल्हँपिं व गंसि गंसिपिं फैतयगु दथुइ न्याय याये।

21 छायाधा:सा छिमिसं ला गंसिपिं फैतयूत ब्वहलं घ्वाघ्वां, नेकुलि च्वच्वं, इमित लिनाच्वंगु दु, छ्यालब्याल यानाच्वंगु दु।

22 जिं जिगु छ्यालब्याल जूगु बथांयात बचय् याये, इमित हाकनं गुबलें लुतय् याइ मखु। जिं छम्ह फै व मेम्ह फैया दथुइ न्याय याये।☆

23 जिं इमि छम्ह हे जक फैजवा: जुइत जिम्ह दास दाऊदयात ल्यये। वं इमित स्वइ, व इमि फैजवा: जुइ।☆

24 जि, परमप्रभु छिमि परमेश्वर जुइ, जिम्ह दास दाऊद इमिगु दथुइ शासक जुइ। जि परमप्रभुं थ्व धयागु ख:।' ”☆

परमप्रभुया शान्ति व सुरक्षाया बाचा

25 “ जिं इपिलिसें शान्ति व सुरक्षाया बाचा ची, अले इपिं दुक्क जुया: मरूमिइ च्वनेदयेमा व गुँइ घेने दयेमा धका: गुँपशुतय्त देशं पितिना छवयाबी।

26 जिं इमित व जिगु डाँडाया प्यखेरं च्वंगु थाययात आशिष दयकाबी। जिं ख:गु इलय् इमिगु निंति वा वयकाबी। जिं आकाशं वइगु वायात आशिष यानाबी।

27 ख्यलय् दुगु सिमातयसं फलफुल बी, जमिनं थ:गु बाली बी, मनूत देशय् सुरक्षित जुइ। इमिगु जुवाया सिं त्वधुला: इमित दास दयक्पिपाखें त्व:तकीबलय् जि हे परमप्रभु ख: धका: इमिसं सी।

28 इमित जाति जातितय्सं हाकनं लुटपाट याइ मखु, न गुँपशुतय्सं इमित नइ, इपिं याऊक च्वनी, अले इमित सुनानं ख्याइ मखु।

29 जिं इमित अन्नया निंति नां जाइगु देश बी। उगु देशय् इपिं हाकनं गुबलें नये मखना सी मखु। इमित हाकनं जाति जातितय्सं हेस्याइ मखु।

30 अबलय् जि परमप्रभु इमि परमेश्वर इपिनापं दु व अले इस्राएलया मनूत जिमि प्रजा ख: धका: इमिसं सी, जि, परमप्रभु परमेश्वर न्ववानागु दु।

31 “ छिपि जिम्ह फैत ख:, जिगु ख्य:यापिं फैत, जिम्ह हे मनूत ख:, जि छिमि परमेश्वर ख:, परमप्रभु परमेश्वरं धयादी।' ”

35

एदोमया बारे अगमवाणी

1 परमप्रभुयागु थ्व वचन जिथाय् वल,☆

2 “अय् सीमानिम्ह मनु, सेइर पर्वतपाखे थ:गु ख्वा: स्वय्का: वयागु विरोधय् अगमवाणी ल्हा,

☆ 34:23 ३४:२३ प्रका ७:१७ ☆ 34:24 ३४:२४ इज ३७:२४ ☆ 35:1 ३५:१-१५ यशै ३४:५-१७; ६३:१-६; यर ४९:७-२२; इज २५:१२-१४; आमो १:११-१२; ओब १-२१; मला १:२-५

3 अले वयात थथे धा, ‘परमप्रभु परमेश्वरं थथे धयादी – हे सेइर पर्वत, जि छंगु विरोधय् दु। जिं थःगु ल्हाः छंगु विरोधय् ल्हनाः छन्त झिजामिजां दंगु व तहसनहस जूगु थाय् यानाबी।

4 जिं छंगु फुक्क शहरयात तहसनहस यानाबी, छ मरुभूमि जुइ। अबलय् छं जि हे परमप्रभु खः धकाः सी।

5 “ ‘छं पुलांगु ईयागु ईखयात नुगलय् तया तल। अले इस्राएलीतय्त इमिगु विपत्तिया इलय्, इमिगु लिपांगु सजाँयया ई थ्यंबलय् छं इमित लडाँइलय् बुके बिल।

6 उकिं परमप्रभु परमेश्वरं धयादी, गथे जि धात्थें म्वाःम्ह खः, जिं छन्त हि बाः वःगुया अधीनय् तयाबी, वं छन्त लिनुली। छं हियात घृणा मयाः, अथे जुयाः छन्त हि लिनुली।

7 सेइरया पर्वततय्त जिं सुनसान व तहसनहस यानाबी, अनं जुयाः वये वने याइपिन्त जिं स्यानाबी।

8 जिं छंगु पहाडत स्याःपिं मनूतयगु सीम्हं जाय्काबी। तरवारं स्याःपिं छंगु डाँडा डाँडाय् व छंगु ब्यासिइ ब्यासिइ खुसिचा खुसिचाय् कुतुं वनी।

9 जिं छन्त न्हाबलेंया निंति झिजामिजां दंगुथाय् यानाबी। छंगु शहरय् हाकनं सुं नं मनूत च्वनी मखु। अबलय् छं जि हे परमप्रभु खः धकाः सी।

10 “ ‘जि परमप्रभु अन दुगु जूसां छं थथे धाःगु दु, “उपिं निगू जाति यहदा व इस्राएल अले इमिगु देश झीगु जुइ। झीसं इमित अधिकार याये।”

11 उकिं परमप्रभु परमेश्वरं धयादी, गथे जि धात्थें म्वाःम्ह खः, डाहाया तं क्यनाः छं इमित घृणा यानाः छु याःगु खः, जिं नं छन्त अथे हे याये। जिं छंगु न्याय यायेबलय् जिं थःत इमिगु दथुइ म्हसीके।

12 अबलय् इस्राएलया पर्वतया बारे हेपय् यानाः छं धाःगु फुक्क खँ जि परमप्रभुं न्यंगु दु धकाः छं सी। छं धाल, “इस्राएलया पहाडत उजाड जूगु दु, उपिं नयेत जिमित ब्यगु दु।”

13 छं जिगु विरोधय् घमण्डयात अले छं जिगु विरोधय् छु न्ववात, जिं व न्यनागु दु।

14 परमप्रभु परमेश्वरं थथे धयादी – सारा पृथ्वी लयतायाच्चंबलय् जिं छन्त झिजामिजां दंगुथाय् यानाबी।

15 इस्राएलया घरानाया सर्बय उजाड जूबलय् छ लयत्ताल, उकिं जिं नं छन्त अथे हे याये। हे सेइर पर्वत, हे एदोमया फुक्क लागा, छ उजाड जुइ। अले छिमिसं जि हे परमप्रभु खः धकाः सी।’ ”

36

इस्त्राएल देशयात हाकनं दयकूगु

1 “अय् सीमानिम्ह मनु, इस्त्राएलया पहाडतयत् अगमवाणी ल्हाना: धा, ‘हे इस्त्राएलया पहाडत, परमप्रभुया वचन न्यँ।

2 परमप्रभु परमेश्वरं थथे धयादी – शत्रुं ला छिमिगु बारे धा:गु दु, “आहा! आ: ला उपि पुलांगु पहाडत झीगु जुल।” ’

3 उकिं अगमवाणी याना: इमित धा, ‘परमप्रभु परमेश्वरं थथे धयादी – इमिसं छिमित फुक्क थासं हमला यात अले लितुलित। अथे जुया: छिपिं मेगु ल्यं दुगु जातितयगु अधीनय् लात, अले छिमि प्यखेरं च्वपिं मनूतयसं छिमित हेस्यात अले छिमित क्वह्यंकल।

4 उकिं हे इस्त्राएलया पहाडत, परमप्रभु परमेश्वरया वचन न्यँ– छिमिगु प्यखेरं च्वपिं जातितयसं लुतय् या:गु व क्वह्यंकूगु पर्वतत व डाँडात, खुसिचा व ब्यासित, दुनाच्वंगु छैत व झिजामिजां दंगु शहरतयत् परमप्रभु परमेश्वरं थथे धयादी –

5 जि, परमप्रभु परमेश्वर न्ववानागु दु – जिगु डाहाया तम्बय् जिं मेगु ल्यनाच्वंगु जातित व एदोमया विरोधय् बांलाक न्ववानागु दु, छाया:सा थ:गु नुगलय् इस्त्राएलया नितिं लय्ता: व घृणा तया: इमिसं जिगु देशयात उकिया घाँय्ख्य: लुतय् याये फयेमा धका: थ:गु अधिकारय् काल।’

6 “उकिं इस्त्राएल देशया बारे अगमवाणी याना: उकिया पहाडत व डाँडात, खुसिचात व ब्यासितयत् धा, ‘जि, परमप्रभु परमेश्वर न्ववानागु दु – छिमित जाति जातितयसं क्वह्यंकूगु दु, अथे जुया: जिं डाहाया तम्बय् न्ववानागु दु।

7 उकिं परमप्रभु परमेश्वरं थथे धयादी – छिमि प्यखेरं च्वंगु जातितयसं नं बदनामी सह याये माली। जिगु ल्हा: ल्हना: जिं थथे धका: पाफये।

8 “ ‘तर हे इस्त्राएलया पहाडत, छिमिसं थ:गु कचात बुइकी, जिगु प्रजा इस्त्राएलया लागि फल सय्की, छाया:सा इपिं याकनं हे छँ लिहां वइ।

9 जित: छिमिगु धन्दा जूगु दु। जिं छिमित दया याये। जिं छिमिगु बुँ पाला: पुसा ह्वेले।

10 जिं अन च्वपिं मनूतयगु ल्या:, फुक्क इस्त्राएलया घरानाया ल्या: अप्वय्काबी। अले नाश जूगु शहरत हाकनं दय्की। अले अन मनूत च्वनी।

11 जिं छिमि मनूतयगु व पशुतयगु ल्या: अप्वय्काबी। इमिगु ल्या: न्हापा स्वया: यक्व दइ। यक्व काय्म्ह्याय्पिं बुइकी। हे इस्त्राएलया पहाडत, न्हापा थें छिमिके जिं

मनूत तये, न्हापा स्वयाः अप्वः जिं छिमित च्वन्हाके। अले छिमिसं जि हे परमप्रभु खः धकाः सी।

12 जिं जिम्ह प्रजा इस्राएलयात छन्थाय् हाकनं तये। इमिसं छन्त अधिकार याइ अले छ इमिगु सर्बय जुइ। छं गुबलें इमि काय् म्हाय्पिन्त लाकायंकी मखु।

13 “ परमप्रभु परमेश्वरं थथे धयादी – मनूतय्सं छ इस्राएलया पहाडया बारे थथे धयाच्वंगु दु, “छ मनूत नइम्ह खः। छं थःगु जातियात सन्तान मदय्काः च्वनेमाःपि याःगु दु।”

14 उकिं छं आबंलि हाकनं गुबलें मनूतयत् नइ मखुत, न थः मनूतयत् सन्तान मदुपि याइ, परमप्रभु परमेश्वरं धयादी।

15 छं हाकनं गुबलें जाति जातितय्गु हेला न्यनेमाली मखु, न छं गुबलें मनूतय्गु हेला फयेमाली, अथवा न छंगु कारणं छिमि मनूत गुबलें लुफि हाइ। परमप्रभु परमेश्वरं धयादी।’ ”

इस्राएलया न्हगु जीवन

16 हाकनं परमप्रभुया थ्व वचन जिथाय् वल,

17 “अय् सीमानिम्ह मनू, इस्राएलया मनूत थःगु देशय् च्वनाच्वंबलय् इमिसं थःगु पहःचहः व ज्यां उकियात अशुद्ध याःगु खः। इमिगु पहःचहः नं जिगु मिखाय् छम्ह मिसा थी मज्यबलयया अशुद्धता थें खः।

18 इमिसं देशय् हि बाः वय्कूगु व थःगु मूर्तितपाखें उकियात अशुद्ध याःगुलि जिं थःगु तं इमिके प्वंका।

19 जिं इमित जाति जातितय्गु दथुइ छ्यालब्याल यानाबिया, इपिं देश देशय् उखेलाः थुखेलाः जुल। इमिगु पहःचहः व ज्याकथं जिं इमित न्याय याना।

20 इपिं उपिं जातितय्गु दथुइ वंबलय् इमिसं जिगु पवित्र नांयात अपवित्र यात, छायाधाःसा मनूतय्सं इमिगु बारे थथे धयाहल, ‘थुपि परमप्रभुया मनूत खः, अथे जूसा नं थुमिसं वय्कःया देश त्वःते माल।’

21 जिं जिगु पवित्र नांया लागि धन्दा कयागु खः, गुकियात इपिं वंगु जाति जातितय्गु दथुइ इस्राएलया घरानां अपवित्र याःगु खः।

22 “उकिं इस्राएलया घरानायात धा, परमप्रभु परमेश्वरं थथे धयादी – हे इस्राएलया घराना, छिमिगु लागि जिं थथे याये त्यनागु मखु, तर छिमिसं छिपि वंगु जाति जातितय्गु दथुइ अशुद्ध याःगु जिगु नांयात रक्षा यायेत जिं थथे याये।

23 जिं जिगु नां गुलि पवित्र खः धकाः क्यने। छिमिसं मेगु जातितयगु दथुइ बदनाम याःगु जिगु नां। जिं थःत छिपिपाखें इमिगु न्ह्यःने पवित्र क्यनेबलय् जाति जातितयसं जि हे परमप्रभु खः धकाः सी, परमप्रभु परमेश्वरं धयादी।

24 “ जिं जाति जातितपाखें छिमित पित हये। फुक्क देशं छिमित मुंके, अले छिमित छिमिगु थःगु हे देशय् लित हये।

25 जिं छिमिके शुद्ध लः छ्वाके, अले छिपिं शुद्ध जुइ। छिमिगु फुक्क अशुद्धतापाखें अले छिमिगु फुक्क मूर्तितपाखें जिं छिमित शुद्ध यानाबी।

26 जिं छिमित छगू न्हगु नुगः बी, अले छिमिगु दुने जिं न्हगु आत्मा तयाबी। छिमिगु म्हं ल्वहंया नुगः लिकयाः जिं छिमित लायागु नुगः बी।☆

27 अले जिगु आज्ञा पालन याकेत व जिगु नियमत बांलाक मानय् याकेत, जिं जिगु आत्मा छिमिके तयाबी

28 जिं छिमि पुर्यातयत् बियागु देशय् छिपिं च्वनी। छिपिं जिगु प्रजा जुइ अले जि छिमि परमेश्वर जुइ।

29 छिमित अशुद्ध याइगु फुक्क खँपाखें जिं छिमित बचय् याये। जिं आज्ञा बी, अले अन्न माक्व दइ, जिं छिमिथाय् हाकनं गुबलें अनिकाल छ्वयाहये मखु।

30 जिं सिमातयगु फलयात व बुँयागु अन्नयात यक्व दय्काबी, थुलि तक कि अनिकालं यानाः जातितयगु दथुइ छिपिं गुबलें मछालेमाली मखु।

31 अबलय् छिमिसं थःगु मभिगु चाला व मभिगु ज्यायात लुमंकी, थःगु पाप व घच्चाइपुगु चलनया कारणं छिमिसं थःपिन्त हे घृणा याइ।☆

32 छिमिगु लागि जिं थ्व फुक्क ज्या यानाच्वंगु मखु धकाः छिमिसं थूगु जितः यः, परमप्रभु परमेश्वरं धयादी। हे इस्राएलया घराना, छिमिगु पहःचहःया कारणं छिपिं लज्या चा अले ख्वाः ह्याउँकी।

33 “ परमप्रभु परमेश्वरं थथे धयादी – जिं छिमित छिमिगु फुक्क पापपाखें शुद्ध यानागु दि जिं छिमिगु शहरय् हाकनं मनूतयत् च्वनेबी, तहसनहस जूगु थाय् हाकनं दय्के।

34 वये वने याइपिनिगु मिखाय् उजाड हे जुयाच्वनेगु पलेसा उजाड जूगु बुँ हाकनं अन्न सय्केत पालीगु जुइ।

35 मनूतयसं धाइ, “थ्व झिजांमिजां दंगु बुँ आः अदनया क्यब थें जुल। उपि उजाड, नाश व ध्वस्त जूगु शहरत आः किल्लात व मनूतयसं जाःगु दु।”

36 अबलय् छिमि प्यखेरं च्वंगु जातितय्सं नाश जूगु शहरतयत् जि परमप्रभुं हाकनं दय्काब्यूगु दु अले उजाड जूगु जमिनयात हाकनं बांलाक सइगु जमिनय् हिलाब्यूगु दु धका: सी। थ्व जि परमप्रभुं धयागु खः, थ्व जिं या हे याये।’

37 “परमप्रभु परमेश्वरं थथे धयादी – इस्राएलया घरानाया बिन्ति जिं स्वीकार याये, अले इमिगु नितिं जिं थ्व ज्या यानाबी। जिं इमि मनूतयत् फैत थें अल्याख यानाबी।

38 जिं इमित यरूशलेमय् क्वःछिनातःगु नखःचखःबलय् बां बीपि फैतयगु बथां ति हे अल्याख दय्काबी। थुकथं तहसनहस जूगु शहरत हाकनं मनूतय्सं जाइ। अबलय् इमिसं जि हे परमप्रभु खः धका: सी।”

37

गंगु क्वैय्या ब्यासि

1 परमप्रभुया शक्ति जिके वल, अले वय्कलं जितः परमप्रभुया आत्मापाखें पित हया: क्वैय् हे क्वैय् दुगु मैदानया दथुइ तयादिल।

2 वय्कलं जितः मैदानया प्यखें यंकादिल। जिं ख्यःया बैय् यक्व क्वैय्त खना, उपि क्वैय्त तसकं गंगु दु।

3 वय्कलं जितः न्यनादिल, “अय् सीमानिम्ह मनु, थुपि क्वैय्त हाकनं म्वाये फइ ला?”

जिं लिसः बिया, “हे परमप्रभु परमेश्वर, थ्व ला छिं हे जक स्यु।”

4 वय्कलं जितः हाकनं धयादिल, “थुपि क्वैय्तयत् अगमवाणी याना: धा, ‘हे गंगु क्वैय्, परमप्रभुयागु वचन न्यै!’

5 थुपि क्वैय्तयत् परमप्रभु परमेश्वरं थथे धयादी – जिं छिमिके सासः* थनाबी, छिपि हाकनं म्वाइ।

6 जिं छिमिके नसा व ला तयाबी, अले छेंगुलि त्वपुयाबी, छिमिके सासः तयाबी, अले छिपि म्वाइ। अले छिमिसं जि हे परमप्रभु खः धका: सी।’ ”

7 उकिं वय्कलं आज्ञा बियादीगु थें जिं अगमवाणी याना। जिं अगमवाणी यानाच्चनाबलय् हे अन घ्वार् सः वल। उपि क्वैय्त थःथवय् प्यपुन।

8 जिं स्वयाच्चनाबलय् हे उपि क्वैचय् नसा व ला खनेदत, अले उपि क्वैय्तयत् छेंगुलि त्वःपुल, तर इमिके सासः मदु।

* 37:5 ३७:५ सासः हिब्रू भाषाय् थुकिया अर्थ फय् वा आत्मा जुइफु।

9 अले वयकलं जितः धयादिल, “फय्यात† अगमवाणी या, अय् सीमानिम्ह मन्, अगमवाणी यानाः थथे धा, ‘परमप्रभु परमेश्वरं थथे धयादी – अय् फय्, प्यखेरं वयाः थुपि स्याःपिन्त सासः थनाब्यु, इपिं म्वायेमा।’ ”

10 उकिं वयकलं जितः आज्ञा बियादीगु थें जिं अगमवाणी याना, अले सासः उपि म्हय् दुहां वन, इपिं म्वात अले इपिं थथःगु तुतिइ दन, इपिं छगू तःधंगु सेना जुल।☆

11 अले वयकलं जितः धयादिल, “अय् सीमानिम्ह मन्, थुपि क्वँय्त इस्राएल्या फुक्क घराना खः। इमिसं धाइगु, ‘झीगु क्वँय्त गनावने धुंकल, अले झीगु आशा मदये धुंकल, झीपिं नाश जूगु दु।’

12 उकिं अगमवाणी यानाः इमित धा, ‘दकलय् तःधंम्ह परमप्रभु परमेश्वरं थथे धयादी – हे जिमि मनूत, जिं छिमिगु चिहानत चाय्काः छिमित अनं लिकायेत्यनागु दु। जिं छिमित इस्राएल देशय् लित हये।

13 अय् जिमि प्रजा, जिं छिमिगु चिहानत चाय्काः छिमित लिकायबलय् छिमिसं जि हे परमप्रभु खः धकाः सी।

14 जिं थःगु आत्मा‡ छिमिके तयाबी, अले छिपिं म्वाइ। जिं छिमित छिमिगु थःगु हे देशय् तये। अले जि परमप्रभुं हे थथे धाःगु दु व पूरा नं याःगु दु धकाः छिमिसं सी, परमप्रभु परमेश्वरं धयादी।’ ”

इस्राएल व यहूदा हाकनं मिलय् जूगु

15 परमप्रभुयागु थ्व वचन जिथाय् वल,

16 “अय् सीमानिम्ह मन्, सिँयागु छपु कथि कयाः उकी ‘यहूदायागु व वलिसें मिलय् जूपि इस्राएलीतय्गु धकाः च्व।’ अले मेगु सिँयागु कथि कयाः उकी ‘योसेफयागु अर्थात एफ्राइम व वलिसें मिलय् जूपि इस्राएलीतय्गु कथि’ धकाः च्व।

17 अले उपि निपुयात छपु हे यानाः स्वानाब्यु। उपि छंगु ल्हातय् छपु हे कथि जुइ।

18 “छिमि मनूतय्सं उकिया अर्थ छु खः धकाः छन्त न्यनीबलय्

19 छं इमित थथे धा, ‘परमप्रभु परमेश्वरं थथे धयादी – जिं योसेफ वलिसें मिलय् जूपि इस्राएलीतय्गु कथि काये, गुगु एफ्राइमया ल्हातय् दु। व कयाः उकी यहूदाया कथि स्वानाबी। थुकथं जिं इमितनापं तयाः छपु हे यानाबी। उपि जिगु ल्हातय् छपु हे जुइ।’

† 37:9 ३७:९फय् फय्या बारे स्वायादिसँ, इज ३७:५ ☆ 37:10 ३७:१० प्रका ११:११ ‡ 37:14 ३७:१४आत्मा आत्माया बारे स्वायादिसँ, इज ३७:५

20 “इमिगु हे मिखाया न्ह्यःने छं च्वःगु उपि कथि ज्वनाच्चँ।

21 अले इमित धा, ‘परमप्रभु परमेश्वरं थथे धयादी – जिं इस्राएलीतय्त इपि वनाः च्वनाच्चंगु जातितपाखें लिकाये। जिं इमित प्यखेंपाखें मुंके, अले इमित थःगु हे देशय् हये।

22 जिं इमित थःगु हे देशय् इस्राएलया पहाड पहाडय् छगू हे जाति दय्के। इपि सकसिगु लागि छम्ह हे जुजु जुइ। इपि हाकनं गुबलें निगू अलग अलग जाति अथवा निगू अलग अलग राज्य जुइ मखु।

23 इमिसं थःम्हं थःत हाकनं गुबलें थःगु घच्चाइपुगु मूर्ति वा इवातात अथवा मेगु छुं नं अपराधपाखें अशुद्ध याइ मखु। छायाःसा जिं इमिगु पापी पहःचहःपाखें इमित बचय् याये, इमित शुद्ध याये। इपि जिगु प्रजा जुइ, जि इमि परमेश्वर जुये।

24 “ ‘जिम्ह दास दाऊद इमि जुजु जुइ, इमि छम्ह हे फैजवाः जुइ। इमिसं जिगु नियम पालन याइ, अले जिगु विधित पालन यानाः वकथं जुइ।☆

25 जिं जिम्ह दास याकूबयात बियागु देशय् इपि च्वनी, अन इमि पुर्यात च्वनाच्चंगु खः। इपि व इमि सन्तानत न्ह्याबलें अन च्वनी। जिम्ह दास दाऊद न्ह्याबलेंया नििति इमि शासक जुइ।

26 जिं इपिलिसें शान्ति व सुरक्षाया बाचा ची, व न्ह्याबलेंया लागि जुइ। जिं इमित थापं याये, जिं इमिगु ल्याः अप्वय्काबी। इमिगु दथुइ जिं थःगु पवित्रथाय् न्ह्याबलेंया लागिं तये।

27 जि च्वनेगु थाय् नं इमिगु हे दथुइ दइ। जि इमि परमेश्वर जुये, इपि जिम्ह प्रजा जुइ।☆

28 जिगु पवित्रथाय् न्ह्याबलेंया लागि इमिगु दथुइ दयाच्चनीबलय् जाति जातितय्सं इस्राएलयात पवित्र याइम्ह जि हे परमप्रभु खः धकाः सी।’ ”

38

गोगया विरोधय् अगमवाणी

1 परमप्रभुयागु थ्व वचन जिथाय् वल,

2 “अय् सीमानिम्ह मनु, मागोग देशया गोग, मेशेक व तूबलयाम्ह मू शासकपाखे थःगु ख्वाः स्वय्काः वयागु विरोधय् अगमवाणी या।☆

3 अले वयात थथे धा, ‘परमप्रभु परमेश्वरं थथे धयादी – हे गोग, मेशेक व तूबलयाम्ह मू शासक, जि छंगु विरोधय् दु।

☆ 37:24 ३७:२४ इज ३४:२४ ☆ 37:27 ३७:२७ लेवी २६:१२; यर ३२:३८; २ कोर ६:१६; प्रका २१:३

☆ 38:2 ३८:२ प्रका २०:८

4 जिं छन्त फनक्क चाःहिकाः साला हये। छंगु म्हुतुइ जिं बल्छी तयाबी। जिं छन्त व छिमि फुक्क सेनायात अर्थात छिमि सलत व सलगइपि, लडाइँया हतियार, तःधंगु चिधंगु ढाल व तरवार घानातःपि छगू तःधंगु सेनायात जिं पित हये।

5 इपिनापं फारस, कूश व पूतयापिं मनूत दइ। उपिं सकसिनं ढाल ज्वनातःगु दइ अले नँयागु तपुलि पुयातःगु दइ।

6 गोमेर नं थः फुक्क सेनानापं व उत्तरया तापाःगु देश बेथ तोगर्मा थः फुक्क सेनानापं वइ। छनापं यक्व देशयापिं मनूत दइ।

7 “ तयार जु! छ व छनापं मिलय् जुइत मूपिं फुक्क सेनायात तयार या अले छ इमि नायः जु।

8 तःन्हू लिपा लडाइँया लागि छिमित सःती। लिपाया दँय् लडाइँपाखें नाश जुयाः हाकनं दयक्कू देशयात छिमिसं हमला याइ, गुगु देशयापिं मनूत यक्व जातितपाखें ताःई तक उजाड जुयाच्चंगु इस्राएलया पहाड पहाडय् मुंगु खः। इमित जाति जातितपाखें हःगु खः, आः इपिं फुक्क याउँक च्वनाच्चंगु दु।

9 छ ला फय् थें हथासं न्हावनी, छ व छंगु फुक्क सेना, अले छनापं दुपिं यक्व जाति जातित सुपँय् थें च्वय् थाहां वनी। छ देशयात त्वपुइगु सुपँय् थें जुइ।

10 “ परमप्रभु परमेश्वरं थथे धयादी – उखुन्हू छुं बिचाःत छंगु नुगलय् वइ, अले छं छगू मभिंगु ग्वसाः ग्वइ।

11 छं थथे धाइ, “पःखाः मदुगु गांत दुगु देशयात जिं हमला याये। पःखाःत, मू ध्वाखा व गजबार मदय्क शहरय् याउँक च्वनाच्चंपि व शंका मयाइपिं जातियात जिं हमला याये।

12 उपिं ध्वस्त जूगु थासय् आः हाकनं जाति जातितपाखें मूपिं मनूत, सा द्रुहं व मेगु सम्पत्ति तयाः देशया मू थासय् हे छें दय्काः च्वनाच्चंगु दु। उपिं बस्तीत व मनूतयूत लुतय् यानाः जिं भज्यंक नाश यानाबी।”

13 शेबा व ददानयापिं मनूत, तशींशियापिं व्यापारीत व लिक्क लिक्क च्वंगु गांयापिं मनूतयसं वयाः छन्त धाइ, “छु! छ लुतय् यायेत वयागु ला? छु! धन-सम्पत्ति लाकाकायेत, लुँ वहः यंकेत, सा द्रुहं व मालसामान यंकेत, थिकय् थिकयगु लुटया सामान मुंकेत छं सेनायात मुंकागु खः ला?”

14 “उकिं अय् सीमानिम्ह मनू, अगमवाणी ल्हानाः गोगयात धा, ‘परमप्रभु परमेश्वरं थथे धयादी – गुगु इलय् जिगु प्रजा याउँक च्वनाच्चनी उगु इलय् छं थ्व खँ मसी ला?

15 छ उत्तर पाखेया तातापाःगु छिमिगु थासं वइ। छ व छनापं सल गयाः यक्व जातियापिं मनूत वइ, अर्थात छगू तःधंगु सेना व छगू बल्लाःगु सेना।

16 गथे सुपौंचं जमिनयात त्वपुइ, अथे हे छं जिगु जाति इस्राएलया देशय् हमला याइ। उकिं हे गोग, लिपा वइगु इलय् जिं थःत छपाखें इमिगु मिखाया न्ह्यःने पवित्र क्यनीबलय् जातितय्सं जितः सीमा धकाः जिं छन्त जिगु देशया विरोधय् हये।

17 “ ‘परमप्रभु परमेश्वरं थथे धयादी – पुलांगु इलय् जिं थः दासत, इस्राएलया अगमवक्तातपाखें धयाःम्ह मनू छ हे, मखु ला? उबलय् जिं छन्त इमिगु विरोधय् हइ धकाः यक्व दँ इमिसं अगमवाणी यात।

18 उखुन्हु थथे जुइ– गोगं इस्राएल देशयात हमला याइबलय् जि तसकं तंचाये, जि, परमप्रभु परमेश्वर न्ववानागु दु।

19 धात्थें इस्राएल देशय् उबलय् तसकं भ्वखाय् ब्वइ धकाः जिं थःगु च्याःगु डाहाया तंम्वय् घोषणा याये।

20 समुद्रयापिं न्यात, आकाशयापिं झंगःत, मैदानयापिं पशुत, जमिनय् थुखे उखे जुइपिं फुक्क प्राणी अले पृथ्वीइ दुपिं फुक्कं मनूत जिगु न्ह्यःने थुरथुर खाइ। पहाडत फातापुली, भीरत कुचा कुचा जुइ, फुक्क पःखाः दुनी।

21 जिं थःगु फुक्क पर्वतय् गोगया विरोधय् छपु तरवार छवये, जि, परमप्रभु परमेश्वर न्ववानागु दु। फुक्क मनूतय्गु तरवार थःथः दाजुकिजाया विरोधय् चले जुइ।

22 जिं महामारी व हिबाःपाखें वयागु न्याय याये। जिं वयाके, वयागु सेनायाके व वलिसें दुगु जाति जातिया भीडयाके तसकं वाफय् वय्काबी, प्वें गाय्काबी, च्यानाच्चंगु गन्धक गाय्काबी।☆

23 थुकथं फुक्क जातितय्त जि तःधंम्ह व पवित्रम्ह खः धकाः क्यने। अबलय् इमिसं जि हे परमप्रभु खः धकाः सी।’ ”

39

गोगया सेनायात स्याःगु

1 “अय् सीमानिम्ह मनू, गोगया विरोधय् थ्व अगमवाणी यानाः धा, ‘परमप्रभु परमेश्वरं थथे धयादी – हे मेशेक व तूबलयाम्ह मू शासक गोग, जि छंगु विरोधय् दु।

2 जिं छन्त फनक्क चाःहिकाः साला हये। जिं छन्त तापाःगु उत्तरंनिसैं हयाः इस्राएलया पहाड पहाडय् लडाईं यायेत छवये।

3 अन जिं छंगु खव ल्हातय् दुगु धनुसयात कय्के, अले छंगु जव ल्हातय् दुगु वाणयात कुर्काबी।

4 इस्राएलया पहाड पहाडय् छ, छंगु फुक्क सेना व छलिसैं मिलय् जूपि फुक्कं सी। जिं छन्त ला नइपिं इंगःत व गुँपशुतयगु आहारा यानाबी।

5 छ चक्कंगु मैदानय् हे ग्वतुली, छायाःसा जि, परमप्रभु परमेश्वरं थ्व घोषणा यानागु खः।

6 जिं मागोग व समुद्रया सिथय् याउँक च्वनाच्चंपिन्के मि छवयाहये, अले इमिसं जि हे परमप्रभु खः धकाः सी।

7 “ जिं थःगु पवित्र नां जिगु प्रजा इस्राएलया दथुइ क्यने। जिं थःगु पवित्र नांयात अपमान याकेबी मखु। अले जात जाति जि परमप्रभु हे इस्राएलया पवित्र परमेश्वर खः धकाः सी।

8 स्व! थ्व घटना जुइतिनि, थथे जू हे जुइ! परमप्रभु परमेश्वरं धयादी। जिं धयागु दिं थ्व हे खः।

9 “ ‘अबलय् इस्राएलया शहर शहरय् च्वनीपिं पिने पिहां वइ अले शत्रुतयगु हतियारत मुंकाः सिं थें च्याकी। तःधंगु चिधंगु ढालत, धनुसत व वाणत, लडाइँया कथित व भालात फुक्क न्हयदँ तक इमिसं सिं थें च्याकी।

10 इमिसं मैदानय् सिं मुनेमाली मखु। इमिसं जंगलय् वनाः सिं पालाः हयेमाली मखु। छायाःसा इमिसं उपि हतियार सिंया निंति छयली। इमिसं थःपिन्त लुतय् याःपिन्त लुतय् याइ। थःत लाकाकाइपिन्त लाका काइ, परमप्रभु परमेश्वरं धयादी।

11 “ ‘उखुन्हू गोगयात जिं इस्राएलय्, समुद्रया पुर्बय् लँजुवाःतयगु बेसीइ छगू चिहान बी। अनं जुयाः वनीपिं लँजुवाःतयत लँ पनी छायाःसा गोग व वया फुक्क सेनायात अन थुनी अले व थाय्यात हामोन-गोगया* न्यासि धाइ।

12 “ ‘देशयात शूद्र यायेत इस्राएलया घरानां इमित न्हयला तक थुनातइ।

13 देशयापिं सकलें मनूत मिलय् जुयाः इमित थुनी। अले जिगु महिमा जुइगु दिं इमिगु निंति छगू लुमनाच्चनीगु दिं जुइ, परमप्रभु परमेश्वरं धयादी।

14 “ ‘न्हयला फुइ धुंकाः ल्यनाच्चंगु सीम्हत मालाः थुनेत मनूत ल्ययाः देशन्यंक छवइ, अले इमिसं देशयात शूद्र याइ।

* 39:11 ३९:११हामोन-गोगया हिब्रू भाषाय् हमोन-गोगया अर्थ गोगया छगू तःधंगु सेनाया पुचः खः।

15 इपि देशया प्यखें वनीबलय गनं मनूया क्वँय् खन धाःसा उकिया लिक्क छगू चिं तइ। थ्व चिं चिहान म्हुइपिन्सं व क्वँय् हामोन-गोगया ब्यासिइ मथुंतले दयाच्चनी।

16 अनयागु शहरयागु नां नं “हामोनाह”† खः। अले थुकथं इमिसं देशयात श्रद्ध याइ।’

17 “अय् सीमानिम्ह मनू, परमप्रभु परमेश्वरं थथे धयादी – फुक्क कथंयापि झंगःपन्छित व फुक्क गुँपशुतयत सःताः धा, ‘प्यखेंनं मुनावा, जिं छगू तःधंगु बलिदान इस्राएलया पहाडय् छिमिगु निति तयार यानाच्चनागु दु। अन छिमिसं ला नइ अले हि त्वनी।☆

18 छिमिसं बल्लाःपिं मनूतयगु ला नइ, अले पृथ्वीयापि शासकतयगु हि त्वनी। थुपि सकलें बाशानयापि ल्हँपिं भ्याःचात, चीधिकःपिं भ्याःचात, दुगुचात व द्रुहंत थें खः।

19 जिं छिमिगु निति तयार यानागु बलिया भव्यलय् दा ननं छिमिगु प्वाः जाइ, हि त्वँत्वं छिपिं काइ।

20 जिगु टेबिलय् सलत व सलगइपिं, बल्लाःपिं मनूत व सिपाईत फुक्क कथंयापि मनूत नयाः छिमिगु प्वाः जाइ, परमप्रभु परमेश्वरं धयादी।’

21 “जात जातिया दथुइ जिं थःगु महिमा क्यने। फुक्क जाति जिं बियागु सजौय व इमिगु घःने लाःगु जिगु इयातगु ल्हाः खनी।

22 उखुन्हुनिसें इस्राएलया घरानां जि हे परमप्रभु इमि परमेश्वर खः धकाः सी।

23 अले जात जातितयसं इस्राएलयापिं मनूतयत इमिगु थःगु पापं यानाः ज्वना यंकूगु खः धकाः सी, छायाधाःसा इमिसं जितः विश्वासघात यात। उकिं जिं इपिपाखें थःगु ख्वाः फस्वय्का, इमित इमि शत्रुतयगु ल्हातय् लःल्हानाबिया, इपि सकलें लडाईलय् सित।

24 जिं इमित इमिगु अशुद्धता व अपराध कथं सजौय बिया, जिं जिगु ख्वाः इपिपाखें फस्वय्का।”

परमेश्वरया मनूत हाकनं थापं जूगु

25 “उकिं परमप्रभु परमेश्वरं थथे धयादी – जिं याकूबया सुख व शान्ति हाकनं लित हयाबी, जिं इस्राएलयापिं फुक्कं मनूतयत माया याये। जिं जिगु पवित्र नांया इज्जतयात रक्षा याये।

† 39:16 ३९:१६हामोनाह हिब्रू भाषाय् “हामोनाह” या अर्थ “सिपाईतय् पुचःत” खः। ☆ 39:17

26 इमित ख्याइपिं सुं मदयाः थःगु देशय् याउँक च्वने धुंकाः इमिसं न्हापायागु लज्या व विश्वासघातया जिम्मा काइ।

27 जिं जात जातितयगु दथुं इमित लित हयेबलय् अले इमित थः शत्रुतयगु देशं मुंकेबलय् यक्व जातितयगु मिखाय् इमिगु दथुइ जिं थःत पवित्र क्यने।

28 अले इमिसं जि परमप्रभु इमि परमेश्वर खः धकाः सी, छायाधाःसा जिं इमित जाति जातितयगु दथुइ ज्वंकाछवसां इपिं मध्ये सुं नं त्वःमफिक जिं हे इमित इमिगु थःगु हे देशय् मुंके।

29 जिं हाकनं गुबलें थःगु ख्वाः इपिंपाखें फस्वय्के मखु, छायाधाःसा जिं थःगु आत्मा इस्राएलया घरानायाके प्वंके, परमप्रभु परमेश्वरं धयादी।”

40

न्हगु देगःया लागा

1 जिमित ज्वनाः बेबिलोनय् यंकूगु निइन्यागूगु दँया* न्हापांगु लाया झिन्हु दुखुन्हु अर्थात बेबिलोनयापिन्सं यरूशलेम त्याकाकाःगु झिप्यगूगु दँ लिपा परमप्रभुया शक्ति जिके वल, अले वयकलं जितः अन यंकादिल।

2 दर्शनय् परमेश्वरं जितः इस्राएल देशय् यंकादिल, अले अन छगू तसकं तःजाःगु पर्वतय् तथादिल। उकिया दच्छिनपाखे जिं शहरय् थें यक्व छें खना।☆

3 वयकलं जितः अन यंकादिल, जिं छम्ह मनूयात अन खना, वयागु ख्वाःपाः कँय्यागु थें च्वं। वयागु ल्हातय् छगू सुतिया खिपः व नापे यायेगु कथि दु, व मू ध्वाखाय् दनाच्वंगु जिं खना।☆

4 वं जितः धाल, “अय् सीमानिम्ह मन्, छंगु मिखां स्व, अले थःगु न्हायपनं न्यँ, जिं छन्त छु छु क्यने उकी ध्यान ब्यु! छायाधाःसा थुकियागु निंति हे जिं छन्त थन हयागु खः। छ थन छु छु खना, व फुक्क इस्राएलया घरानायात धयाब्यु!”

पुर्बयागु मू ध्वाखा

5 देगःया पिने छचाःखेरं पःखाः दुगु जिं खना। व मनूया ल्हातय् नापे यायेगु कथि दु। व नापे यायेगु कथि ३.२ मिटर ताहाकः। वं पःखाः नापे यात, पःखाः ३.२ मिटर तज्जाः व उकिया ब्या ३.२ मिटर दु।☆

* 40:1 ४०:१ २८ अप्रिल ५७३ बी.सी. ☆ 40:2 ४०:२ प्रका २१:१० ☆ 40:3 ४०:३ प्रका ११:१; २१:१५ ☆ 40:5 ४०:५—४२:२० २ इति ३:१-९

6 अनंलि व पुर्बपाखे स्वःगु मू ध्वाखापाखे वन। उकियागु त्वाथः गयाः वं लुखायागु लुखाखलु नापे यात। वं नापे याःगु लुखाखलुया ब्या ३.२ मिटर दु।

7 पिवाःत च्वनीगु क्वथायागु हाकः ३.२ मिटर व ब्या ३.२ मिटर दु। क्वथातयगु दथुइ दथुइ दुगु पःखाःया ब्या २.७ मिटर दु। देगःपाखे स्वःगु दलानया लिक्क दुगु लुखाखलु ३.२ मिटर दु।

8 वं मू ध्वाखाया दलान नापे यात।

9 व ४.२ मिटर तब्या। उकिया लुखाखसित १ मिटर तःफि। लुखाया दलान धाःसा देगःपाखे स्वःगु दु।

10 पुर्बपाखेयागु मू ध्वाखा दुने निखें स्वकू स्वकू पिवाःत च्वनीगु क्वथात दु। उपि स्वकू क्वथात छगू हे नापयागु खः। क्वथातयगु दथुइयागु पःखाःत छगू हे नापयागु खः।

11 अले वं मू ध्वाखाया ब्या नापे यात। व ५.३ मिटर तब्या, व ६.९ मिटर ताहाकः।

12 फुक्क क्वथाय् न्ह्यःनेपाखे ५३ सेन्टिमिटर तज्जाःगु चिचिजाःगु पःखाःत दु। फुक्क क्वथा ३.२ मिटर प्यकू लाः।

13 अनंलि वं मू ध्वाखाछेंया पिनेया ब्या नापे यात। छखे पिवाः कोथाया ल्यूनेया पःखालनिसें मेखे पिवाः कोथाया ल्यूनेया पःखाः तक नापय् यात। थ्व १३.५ मिटर दु।

14 वं मू ध्वाखाया थांत नापय् यात, उपि ३२ मिटर तःजाः। लुखाछें पिने चुकय् तक न्यनावंगु दु, गुकि यानाः स्वखेपाखे चुक दु।

15 मू ध्वाखाछेंया पिनेया दुहां वनेगु थासनिसें दलानया सिथय् तक २७ मिटर दु।

16 मू ध्वाखाया दुनेया लुखाछेंया फुक्क अंगलय् ग्वाखंत दु। पिवाःत च्वनीगु कोथाया अंगलय्, पिवाःत च्वनीगु कोथातयगु दथुइच्वंगु अंगलय् व दलानया अंगलय् ग्वाखंत दु, पिवाः च्वनीगु कोथातयगु दथुइया अंगलय् तायगः सिमाया किपात कियातःगु दु।

पिनेयागु चुक

17 अले वं जितः पिनेयागु चुकय् हल। जिं अन चुकया प्यखेरं छुं क्वथात व ल्वहं लायातःगु छगू बै खना। थ्व ल्वहं लायातःगु फलय् स्विगू क्वथा दु।

18 ल्वहं लायातःगु बै लुखा तक हे थ्यंगु दु। बैया ब्या व लुखाया हाकः उलि उलि हे दु। थ्व दकलय् क्वय्यागु फः खः।

19 अले वं क्वय्यागु लुखाया दुनंनिसें चुकयागु पिने तक नापे यात। व पुर्ब व उत्तरपाखे नं ५३ मिटर दु।

उत्तरयागु मू ध्वाखा

20 उत्तरपाखे स्वःगु पिनेयागु चुकया मू ध्वाखाया हाकः व ब्या वं नापय यात।

21 ध्वाखाछेंया दुने स्वक् पिवाः कोथाया निखेंपाखेंया अले पिवाः कोथाया दथुइयागु अंगःया व दलानया नाप धाःसा पुर्बया मू लुखाया नाप ति हे दु। उकिया हाकः २७ मिटर व ब्या १३.५ मिटर दु।

22 उकिया ग्वाखंत व उकिया दलान अले उकिया ताय्गः सिमाया कियातःगु किपाया नाप नं पुर्बपाखे स्वःगु मू ध्वाखाया नाप ति हे दु। अन वनेत न्हयगू त्वाथः दु। उकिया दलान धाःसा चुलिचू दु।

23 पुर्बया मू ध्वाखाय् दुगु थें उत्तरया मू ध्वाखाया न्हःने दुनेया चुकय वनेगु छगू ध्वाखा दु। वं छगू ध्वाखानिसें मेगु ध्वाखा तक नापे यात। व ५३ मिटर दु।

दच्छिनयागु मू ध्वाखा

24 अले वं जितः दच्छिनपाखे यंकल। जिं दच्छिनपाखे स्वःगु छगू ध्वाखा खना। वं उकिया लुखाखसित व उकिया दलान नापे यात। उपिं नं मेगु थें छगू हे नापयागु खः।

25 लुखाछें व उकिया दलानया प्यखेरं ग्वाखंत दु। उपिं मेमेगु थें हे च्वं। उकिया हाकः २७ मिटर व ब्या नं १३.५ मिटर दु।

26 अन वनेत न्हयगू त्वाथः दु। उकिया दलान धाःसा उकिया चुलिचू दु। पिवाः कोथातयगु दथुइया अंगःया निखेंपाखे ताय्गःमाया किपात दय्कातःगु दु।

27 दुनेयागु चुकय नं दच्छिनपाखे स्वःगु छगू मू ध्वाखा दु। वं ध्व ध्वाखानिसें दच्छिन पाखेयागु पिनेया ध्वाखा तक नापे यात। व ५३ मिटर दु।

दुनेयागु चुकया मू ध्वाखात

28 अले वं जितः दच्छिनयागु मू ध्वाखां दुनेया चुकय हल। वं दच्छिनया मू ध्वाखा नापे यात, उकिया नाप नं मेमेगु मू ध्वाखाया नाप थें च्वं।

29 उकिया क्वथात, पःखाःत व दलान मेमेगु थें छगू हे नापयागु खः। लुखाछें व उकिया दलानया प्यखेरं ग्वाखंत दु। उकिया हाकः २७ मिटर व ब्या १३.५ मिटर दु।

30 (दुनेया चुकया प्यखेरं लुखातयगु दलानत धाःसा १३.५ मिटर तब्या अले २.७ मिटर तज्जाः।)

31 उकिया दलान पिनेया चुकपाखे स्वःगु दु। पिवाः कोथातय्गु दथुइया अंगलय् ताय्गः सिमाया किपा कियातःगु दु। अन वनेत च्यागू त्वाथः दु।

32 अले वं जितः पुर्बपाखेया दुनेया चुकय् हल, अले उकिया लुखा नापे यात। उपि मेगु थें छगू हे नापयागु खः।

33 उकिया क्वथात, पःखाःत व दलान नं मेमेगु थें छगू हे नापयागु खः। लुखाछें व उकिया दलानया प्यखेरं ग्वाखंत दु। व २७ मिटर ताहाकः अले १३.५ मिटर तब्या।

34 उकिया दलान पिनेया चुकपाखे स्वःगु दु। पिवाः कोथातय्गु दथुइया अंगःया निखेंपाखे ताय्गः सिमायागु किपात दय्कातःगु दु। अन वनेत च्यागू त्वाथः दु।

35 अले वं जितः उत्तरया ध्वाखाय् हल, अले व नापे यात। व नं मेमेगु थें छगू हे नापयागु खः।

36 उकिया क्वथात, पःखाःत व दलान उत्थें च्वं। उकिया प्यखेरं ग्वाखंत दु। व २७ मिटर ताहाकः अले १३.५ मिटर तब्या।

37 उकिया दलान पिनेयागु चुकपाखे स्वःगु दु। पिवाः कोथाया दथुइच्चंगु अंगलय् ताय्गः सिमातय्गु किपात छखे छखेपाखे दय्कातःगु दु। अन वनेत च्यागू त्वाथः दु।

बलिदान तयार यायेगु क्वथात

38 फुक्क मू ध्वाखाःया दलानया न्ह्यःने लुखा दुगु क्वथा दु। अन इमिसं होमबलि सिलीगु।

39 होमबलि, शुद्ध जुइगु बलि व दोषबलि स्यायेत दुहां वनेगु लुखाया दलानया निखेंपाखे निगः निगः टेबिल दु।✧

40 उत्तरयागु मू ध्वाखाया दलानया पिने, दलानय् थाहां वनेगु त्वाथःया लिक्क निगू टेबिल दु। अले त्वाथःया मेखेपाखे निगू टेबिल दु।

41 थुकथं दुहां वनेगु लुखाया छखेपाखे प्यंगू टेबिल व मेखेपाखे नं प्यंगू, अन मुक्कं च्यागू टेबिल दु।

42 होमबलिया निती चानातःगु ल्वहंयागु प्यंगू टेबिल दु। छगू छगू टेबिल ८० सेन्टिमिटर ताहाकः, ८० सेन्टिमिटर तब्या व ५३ सेन्टिमिटर तज्जाः। उकिया च्वय् हे होमबलि व मेमेगु बलिदानया निती छयलीगु थलबल तइगु।

✧ 40:39 ४०:३९ लेवी १:१-१७; ४:१-५:१३; ५:१४-६:७

43 अले निगू च्वका दुगु हुकत, छगू छगू हुक ८ सेन्टिमिटर ताहाकः, उपि अंगःया प्यखेरं यख्खानातःगु दु। तेबिलत धाःसा छायेहःगु ला तयेत खः।

पुजाहारीतय्गु क्वथा

44 दुनेया मू ध्वाखाया पिनेपाखे, दुनेया चुकया दुने निकू क्वथा दु। छकू क्वथा उत्तरया मू ध्वाखाया लिक्क दच्छिनपाखे स्वःगु, व मेगु धाःसा दच्छिनया मू ध्वाखाया लिक्क उत्तरपाखे स्वःगु दु।

45 वं जितः धाल, “थ्व दच्छिनपाखे स्वःगु क्वथा देगःया फुक्क ज्याया जिम्मा दुपि पुजाहारीतय्गु निंति खः।

46 अले उत्तरपाखे स्वःगु क्वथा धाःसा वेदीइ व देगल्य् सेवा याइपि पुजाहारीतय्गु निंति खः। थुपि सादोकया कायपि खः, लेवीतय् सन्तान मध्ये उपि जक परमप्रभुया न्ह्यःने सेवा यायेत वय्कःया लिक्क वयेफु।”

दुनेया चुक व देगः

47 अले वं चुक नापे यात। व पेकूलागु खः। व ५३ मिटर ताहाकः व ५३ मिटर तब्या। वेदी धाःसा देगःया न्ह्यःने दु।

48 वं जितः देगःया दलानय् हल, दलानया निखेंपाखेया लुखाखसित वं नापे यात। उपि २.७ मिटर ब्या दु। मू ध्वाखा ७.४ मिटर तब्या अले उकी निखेंपाखे अंगःनापं स्वाकातःगु लुखाखसि १.६-१.६ मिटर तब्या।

49 दलान ११ मिटर ताहाकः, अले व ६.४ मिटर तब्या। उकी थाहां वनेत झिगू त्वाथः दु अले निखेंपाखेया थांया न्ह्यःने लुखाखसित दु।

41

1 अले वं जितः दुने पवित्र थासय् हल। अले उकिया लुखायाखसित नापे यात। उपि खुसिया निखेंपाखेया ब्या ३.२ मिटर ३.२ मिटर दु।

2 लुखाया ब्या ५.३ मिटर दु। लुखाखसिया निखेंपाखेया अंगया ब्या २.७ मिटर २.७ मिटर दु। वं पवित्रथाय् नापे यात। व २१ मिटर ताहाकः अले ११ मिटर तब्या।

3 अले व महा-पवित्र थासय् दुने दुहां वनाः लुखायाखसित नापे यात। छपु छपु थां १-१ मिटर तब्या। लुखा ३.२ मिटर तब्या। लुखाया निखेपाखेंया अंगःत ३.७ मिटर ३.७ मिटर तब्या।

4 अले वं दुनेया महा-पवित्रगु थाय्या हाकः व ब्या नापे यात, व ११ मिटर ११ मिटर दु। अले वं जितः धाल, “थ्व महा-पवित्रगु थाय् खः।”

देगःया पःखाःनापं स्वाःगु क्वथात

5 अले वं देगःया अंगः नापे यात। व ३.२ मिटर तःफि। अले स्वखेपाखे स्वानाच्वंगु क्वथातयगु ब्या २.१ मिटर २.१ मिटर दु।☆

6 उपि क्वथात स्वतँ जाः। उपि छगू छगू तँय स्विगू स्विगू क्वथात दु। देगःया प्यखें पाखेयागु अंगलय् उपि क्वथातयगु निति लिधंसात दय्कातःगु दु, गुकेँ यानाः उपि लिधंसात देगःया अंगलय् दुहां मवनेमा।

7 देगःया स्वखेपाखेया क्वथात गुलि गुलि थाहां वंगु दु उलि उलि तब्या जुयावंगु दु। देगःयात घेरय् यानातःगु क्वथात छगू तँया च्वय् मेगु तँय थपय् जुयावंगु दु। थुकथं क्वथात छगुलि मेगुया घःने वंबलय् झन तब्या जुल। दकलय् क्वय्यागु तंनिसेँ दकलय् च्वय्यागु तँ तक दथुइया तँ जुयाः वनीगु स्वाने दु।

8 अनंलि देगःया प्यखेंपाखे थकयातःगु छगू लिधंसा खना, गुगु क्वथातयगु जग जुल। व ३.२ मिटर ताहाकः।

9 उपि क्वथातयगु पिनेया अंगः २.७ मिटर तःफि। देगःया उपि क्वथात

10 व पुजाहारीतयगु क्वथातयगु दथुइया खुला थाय् देगःया प्यखेरं ११ मिटर दु।

11 खुला थासं उपि क्वथाय् वनीगु निङ्गू लुखात दु, छगू उत्तरपाखे स्वःगु व मेगु धाःसा दच्छिनपाखे स्वःगु दु। उगु खुला थाय्या लिक्कया लिधंसा प्यखेरं २.७ मिटर तब्या।

पच्छिमपाखेया छें

12 देगःया चुकपाखे स्वःगु पच्छिमपाखेया छें ३७ मिटर तब्या। उगु छेंया अंगः प्यखेंपाखे २.७ मिटर तःफि। व ४८ मिटर ताहाकः।

देगःयागु मुक्कं नाप

13 अले वं देगः नापे यात। व ५३ मिटर ताहाकः। देगःया चुक व व छेंनं उकिया अंगःतनापं ५३ मिटर ताहाकः।

14 देगःया पुर्बपाखेया चुक नं, देगःया न्हाःनेयागु कुन्चानापं ५३ मिटर ताहाकः।

15 अले वं देगःया ल्युनेयागु चुकपाखे स्वःगु छें अले उकियागु फुक्क अंगलय् दय्कातःगु छखे छखेपाखेया बार्दलीत नापे यात। उकिया हाकः ५३ मिटर दु।

देगःयागु पूरा खँ

चुकपाखे स्वःगु दलान, पवित्रगु थाय् व महा-पवित्रगु थाय्,

16 अले उपि स्वंग्यागु हे प्यखेरं दुगु लुखाखलुइ, चिब्यागु ग्वाखंत व बार्दलीत, लुखाखलुया दुने व पिनेया फुक्क ज्वलं, सिं हिनातःगु दु।

17 महा-पवित्रगु थासय् दुहां वनेगु लुखाया च्वय्यागु खालि थासय् व तच्चकं पवित्रथाय् व पवित्रगु थाय्या अंगःया प्यखें,

18 कियातःपिं कस्बतय् दथुइ दथुइ कियातःगु ताय्गःमा दु। छम्ह छम्ह कस्बया निपा निपा ख्वाःपाः दु।

19 छपा धाःसा मनूया ख्वाः थें छखेपाखेयागु ताय्गःमापाखे स्वःगु, अले मेगु धाःसा सिंहयागु ख्वाः थें मेखेपाखेयागु ताय्गःमापाखे स्वःगु दु। फुक्क देगःया प्यखेरं उपि थथे हे कियातःगु दु।

20 कस्ब व ताय्गःमा बनिसें पवित्र थासय् दुहां वनीगु ध्वाखाया च्वय् तक पवित्र थाय्या फुक्क अंगलय् कियाः दय्कातःगु दु।

21 पवित्र थाय्या लुखाया चौकोस पेकुंलाः। अले तच्चकं पवित्रगु थाय्या न्ह्यःनेया लुखाया चौकोस नं न्हापायागु थें च्वं।

22 अन १.६ मिटर तज्जाःगु व छखे छखेपाखेयागु ब्या १ मिटर दुगु छगू सिंया वेदी दु। उकिया कुंत, उकिया लिधंसा व पाटात सिंयागु हे दु। उम्ह मनुखं जितः धाल्, “थ्व परमप्रभुया न्ह्यःने तयातःगु टेबिल खः।”

देगःया निगू लुखा

23 पवित्रथाय् व तच्चकं पवित्रगु थासय् निगू निगू लुखा दु।

24 छगू छगू लुखाया निति चाहिके ज्यूगु निपा निपा खापा दु, अर्थात निपा खापा छगू लुखाया निति, निपा खापा मेगु लुखाया निति।

25 पिनेया पवित्र थाय्या लुखा लुखाय् अंगलय् कियातःगु थें हे कस्बत व ताय्गःमात कियातःगु दु। दलानया न्ह्यःने सिंयागु कार्नेस दय्कातःगु दु।

26 दलानया अंगलय् चिब्यागु ग्वाखंया निखेंपाखे ताय्गःमात कियातःगु दु। देगःया प्यखेरं च्वंगु क्वथाय् नं यग्गानाच्वंगु कार्नेसत दु।

42

पुजाहारीतय्गु क्वथा

1 हाकनं वं जितः उत्तरपाखे चाहीकाः पिनेया चुकय् हल। अले देगःया चुक व देगःया उत्तर पाखेयागु पिनेया अंगःया चुलिचू दुगु क्वथाय् हल।

2 उत्तरपाखे स्वःगु लुखा दुगु छें ५३ मिटर ताहाकः अले उकिया ब्या २७ मिटर दु।

3 व छेंया छेपाखे दुनेया चुकया १० मिटर ब्या दुगु चक्कंगु थाय् दु। मेखेपाखे पिनेया चुकया पेटी दु। थ्व छें स्वंगू तल्ला दु अले स्वंगू हे तल्लाय् बार्दली दु।

4 क्वथातयगु न्ह्यःने ५.३ मिटर ब्या दुगु व ५३ मिटर ताहाकःगु दुहां पिहां जुइगु लँ दु। उकिया फुक्क लुखात उत्तरपाखे स्वःगु दु।

5 च्वय्यागु क्वथात चिकु। बार्दलीत दुगुलि उपि क्वथात छेंया दथुइया व क्वय्यागु तल्लाया क्वथात स्वयाः चिकु।

6 स्वंगू तल्लाय् दुगु क्वथा क्वथाय् चुकय् दुगु थें थांत मद्, उकिं क्वय्यागु व दथुइयागु तल्लायागु क्वथात स्वयाः उपि च्वय्यागु क्वथात चिकु।

7 क्वथात व पिनेया चुकनापं वनाच्चंगु अन छगू पिनेया अंगः दु। व क्वथातयगु न्ह्यःनं २७ मिटर तक वंगु दु।

8 पिनेया चुकया लिक्क लिक्क च्वंगु क्वथाया हाकः २७ मिटर दु, पवित्र थाय्या लिक्कया क्वथातय् हाकः धाःसा ५३ मिटर दु।

9 थुपिं क्वथाया क्वय् क्वय् पिनेया चुकय् पिहां वनेत पुर्बपाखे छगू लुखा दु।

10 देगःया दच्छिनपाखे पिनेया चुकया पःखाः जाय्क, देगःया चुकया लिक्क व पिनेया अंगःया अःखः दुगु क्वथात दु।

11 उकिया न्ह्यःने छपु वनेगु लँपु दु। थुपि क्वथात उत्तरयागु क्वथात थें च्वं, उमिगु पिने वनीगु लुखात फुक्क कथंयागु, व उत्तरयागु क्वथात थें उमिगु हाकः व ब्या छगू हे नापयागु खः। उत्तरयागु लुखात थें,

12 दच्छिनयागु क्वथातयगु लुखात नं अथे हे च्वं। क्वथाय् दुहां वनेगु मेगु छगू लुखा दु। थ्व लुखा पुर्बपाखे वंगु पःखाःया नापनापं वनाच्चंगु लँया दुहां वनेथाय् लाः।

13 अले वं जितः धाल, “देगःया चुकपाखे स्वःगु उत्तर व दच्छिनयागु क्वथात धाःसा पुजाहारीया क्वथात खः, अन मनूतयसं छाःगु दकलय् पवित्र भेटीत परमप्रभुया न्ह्यःने वनीपिं पुजाहारीतयसं नयेगु याइ। अन इमिसं दकलय् पवित्र भेटीत, अन्नबलि, शुद्ध जुइगु बलि व दोषबलि तइ, छायाधाःसा व थाय् पवित्र खः।”

14 पुजाहारीत पवित्र थासय् दुहां वनीबलय् इपिं उगु पवित्र थासं पिनेया चुकय् पिहां मवनेमा, तर गुगु वसः फिनाः इमिसं सेवा याइ, उपिं वसः इमिसं अन हे त्वःताः तयेमाः, छायाधाःसा उपिं पवित्र खः। मनूत मुनीगु थासय् इपिं वने न्ह्यः इमिसं मेगु हे वसः फीमाः।”

देगः लागाया नाप

15 वं देगः दुनेया लागा नापे याये धुंकाः, वं जितः पुर्बयागु मू ध्वाखां पिने हल। अले देगःया पिनेया लागा नापे यात।

16 वं उगु नापे याइगु कथिं पुर्बयागु भागयात नापे यात। व २६५ मिटर दु।

17 वं उत्तरया भाग नापे यात। व नं २६५ मिटर दु।

18 वं दच्छिनया भाग नापे यात। व नं २६५ मिटर दु।

19 अले वं फस्वयाः पच्छिम भागय् वनाः व भाग नापे यात। व नं २६५ मिटर दु।

20 थुकथं वं व थाय्या प्यखें पाखेया सिमाना नापे यात। उकिया छचाःखेरं पवित्र थाय्यात साधारण थासं अलग यायेत छगू पःखाः दु। व २६५ मिटर ताहाकः अले २६५ मिटर तब्या।

43

परमप्रभुया महिमा लिहां वःगु

1 हाकनं वं जितः पुर्बपाखे स्वःगु मू लुखाय् हल,

2 अले जिं इस्राएलया परमेश्वरया महिमा पुर्बपाखें वयाच्चंगु खना। वय्कःया सः यक्व लःयागु थें च्वं, वय्कःया महिमां जमिन प्वालप्वाल थित।☆

3 थ्व दर्शन वय्कः शहरयात नाश यायेत झाःबलय् जिं खनागु दर्शन व कबार खुसिया सिथय् जिं खनागु दर्शन थें च्वं, अले जि बँय् भवसुला।☆

4 परमप्रभुया महिमा पुर्बपाखे स्वःगु मू लुखां देगः दुने दुहां वल।

5 आत्मां जितः ल्हनाः दुनेया चुकय् हयादिल, परमप्रभुया महिमां देगः जाल।

6 व मनू जिगु लिक्क दनाच्चंबलय् देगलय् दुनेनं सुं नवानाच्चंगु जिं ताल।

7 वय्कलं जितः धयादिल, “अय् सीमानिम्ह मनू, थ्व ला जिगु सिंहासनया थाय् खः, अले थ्व थाय् जिगु तुति पालीया निंति नं खः। थन जि इस्राएलीतनापं सदां सदां च्वने। इस्राएलया घराना व इमि जुजुपिन्सं थःगु व्यभिचारपाखें व पुजा याइगु थासय्

☆ 43:2 ४३:२-४ इज ९:३; १०:३-४, १८-१९; ११:२२-२३; प्रका १:१५

☆ 43:3 ४३:३ इज १:१; ३:१४-१५;

दुगु थः जुजुपिनिगु जीवन मदुगु मूर्तितपाखें हाकनं गुबलें जिगु पवित्र नांयात अशुद्ध याइ मखु।

8 इमिसं थःगु लुखाखलु जिगु लुखाखलुया लिक्क व थःगु लुखाया थांत जिगु लुखाया थांया न्ह्यःने दयकूबलय् जिगु व इमिगु दथुइ छगू पःखाः तःबलय् इमिगु घच्चाइपुगु व्यवहारपाखें इमिसं जिगु पवित्र नांयात अपवित्र यात। उकिं तंम्वय् जिं इमित नाश याना।

9 आः इमिसं थःगु व्यभिचार व थः जुजुपिनिगु मूर्तित जिगु न्ह्यःनं चीकाःछवयेमा, अले जि इमिगु दथुइ न्ह्याबलें च्वनांच्वने।

10 “अय सीमानिम्ह मनु, इस्राएल्यापिं मनूतय्त थ्व देगःया बारे धा, गुकिं यानाः इपिं थःगु पापया निति मछालेमाः। इमिसं थ्व देगःया नमूनायात बिचाः यायेमा।

11 इमिसं छु छु याःगु खः उकिया निति इपिं लज्या चाःगु दुसा छं इमित देगःया नमूनाया बारे थुइकाब्यु। थुकिया नमूना, थुकिया पिने वनीगु लैपु, ध्वाखा, आकार, विधित व थुकिया फुक्क नियम वयात कनाब्यु। अले इमिगु न्ह्यःने च्व, गुकें यानाः इमिसं थुकिया फुक्क आकार व थुकिया विधित मानय् यायेमा अले थुपिं कथं जुइमा।

12 “देगःया नियम थ्व हे खः, पर्वतया च्वकाया प्यखेरंया लागा तच्चकं पवित्र जुइ। देगःया नियम थ्व हे खः।”

वेदी

13 “वेदीया नाप थथे दु – वेदीया छचाःखेरं धों दु, व ५३ सेन्टिमिटर तज्जाः अले ५३ सेन्टिमिटर तब्या। उकिया छचाःखेरं दुगु बालाया नाप २७ सेन्टिमिटर दु।☆

14 वेदीया जाः थथे दु – धोंया च्वकांनिसें क्वय्यागु फःया च्वका तक १ मिटर तज्जाः अले व फः ५३ सेन्टिमिटर तब्या, क्वय्यागु फःया च्वकांनिसें च्वय्यागु फःया च्वका तक २.१ मिटर तःजाः, फः ५३ सेन्टिमिटर तब्या।

15 वेदीया भुतू २.१ मिटर तज्जाः, पेम्ह सिंहत उकिया पेंगुलि कुन्चाय् च्वय्यापाखे थाहां वःगु दु।

16 भुतू धाःसा ६.४ मिटर ताहाकःगु व ६.४ मिटर ब्या दुगु पेकूलाःगु खः।

17 वेदीया च्वय्यागु फः नं पेकूलाः, उकिया हाकः ७.४ मिटर दु अले उकिया ब्या नं ७.४ मिटर दु। बाला ५३ सेन्टिमिटर तःफि, उकिया प्यखेरं २७ सेन्टिमिटर तःजाःगु धों दु। वेदीया त्वाथःत पुर्बपाखे स्वःगु दु।”

18 अले वं जितः धाल, “अय् सीमानिम्ह मनु, परमप्रभु परमेश्वरं थथे धयादी – वेदी दय्के धुंकाः होमबलि छायेत व वेदीइ हि हाः यायेगु विधि थ्व हे खः।

19 छिमिसं जिगु न्ह्यःने सेवा यायेत वइपि सादोकया परिवारया लेवीतय् सन्तान पुजाहारीतयत् शद्ध जुइगु बलिया नितिं छम्ह द्रहंचा बीमाः, परमप्रभु परमेश्वरं धयादी।

20 वयागु भचा हि कयाः इमिसं वेदीया प्यपुं नेकुलिइ, च्वय्यागु चाकःया पेंगुलि कुन्चात व उकिया प्यखेरं तयाबीमा। थुकथं छिमिसं वेदी शद्ध याइ, वयागु नितिं प्रायश्चित याइ।

21 अनंलि शद्ध जुइगु बलिया द्रहं कयाः पवित्रगु थाय्या पिनेपाखे क्वःछिनातःगु थासय् छिमिसं व मिइ छु।☆

22 “कन्हय् खुन्हु छिमिसं छम्ह खू मदुम्ह दुगुचा शद्ध जुइगु बलिया नितिं छा। छिमिसं द्रहंपाखे वेदी शद्ध याःथें थुकिं नं वेदी शद्ध या।

23 छिमिसं वेदी शद्ध याये धुंकाः बथांयापि मध्ये छम्ह खू मदुम्ह द्रहंचा व छम्ह खू मदुम्ह भ्याःचा छा।

24 छिमिसं इमित परमप्रभुया न्ह्यःने छा। पुजाहारीतय्सं इमिगु म्हय् चि ह्लाः परमप्रभुया न्ह्यःने होमबलिकथं उपि छायेमाः।

25 “छिमिसं न्हयन्हु तक शद्ध जुइगु बलिया नितिं न्हियान्तिथं छम्ह दुगुचा तयार यायेमाः। छिमिसं बथांयाम्ह छम्ह खू मदुम्ह द्रहंचा व छम्ह खू मदुम्ह भ्याःचा छायेगु या।

26 न्हयन्हु तक इमिसं वेदीया नितिं प्रायश्चित यानाः उकियात शद्ध यानाच्वनेमा, थुकथं इमिसं उकियात अर्पण याइ।

27 न्हयन्हु फुइ धुंकाः च्यान्हु दुखुन्हंनिसें पुजाहारीतय्सं वेदीइ छिमिगु होमबलि व मेलबलि छायेगु यायेमाः। अले जिं छिमित स्वीकार याये, परमप्रभु परमेश्वरं धयादी।”☆

44

शासक, लेवीत व पुजाहारीत

1 उम्ह मनुखं जितः देगःया पुर्बपाखेया पिनेया मू ध्वाखाय् यंकल। ध्वाखा तिनातःगु दु।

☆ 43:21 ४३:२१ प्रस २९:१४; लेवी ४:१२,२१; ८:१७; ९:११; १६:२७

☆ 43:27 ४३:२७ प्रस २९:३५-३७

2 परमप्रभुं जितः धयादिल, “थ्व ध्वाखायात तिना हे तयेमाः। व चाय्के मज्यू। सुं नं थ्व ध्वाखां दुहां वने दइ मखु। थ्व ध्वाखा तिना हे तयेमाः छायाःसा परमप्रभु इस्त्राएलयाम्ह परमेश्वर थ्व ध्वाखां दुहां झाःगु दु।

3 शासक थः हे जक परमप्रभुया न्ह्यःने पवित्र भव्य नयेत ध्वाखाया दुने दुहां वने फइ। व लुखाया दलानं दुहां पिहां जुइमा।”

देगलय दुहां वनेगु नियम

4 अनंलि उम्ह मनुखं जितः देगःया न्ह्यःनेपाखे उत्तरयागु मू ध्वाखां देगःया दुनेया चुकय् यंकल। जिं स्वयाबलय् परमप्रभुया देगः वय्कःया महिमां जाःगु खना। जि बँय् भवसुला।

5 परमप्रभुं जितः धयादिल, “अय् सीमानिम्ह मनु, ध्यान ब्यु अले थःगु मिखां स्व! परमप्रभुया देगःया फुक्क विधिया बारे जिं छन्त धयागु फुक्क खँ थःगु न्हाय्पनं न्यौं। सु देगलय् दुहां वने फइ अले सुयात देगलं पितिना छवयेमाः व फुक्क बांलाक स्व!

6 विद्रोही इस्त्राएलया घरानायात थथे धा, ‘परमप्रभु परमेश्वरं थथे धयादी – हे इस्त्राएलया घराना, छिमिगु घच्चाइपुगु ज्या अप्वः जुल।

7 छिमिगु फुक्क घच्चाइपुगु व्यवहार बाहेक छिमिसं मन व म्हय् चिं मतःपिं विदेशीतय् जिगु पवित्र थासय् दुने हयाः छिमिसं नसा, दाः व हि जिगु लागि छाःबलय् उकियात अशुद्ध यात, अले जिगु बाचा त्वाथल।

8 छिमिसं थःपिन्सं जिगु पवित्र ज्वलंया जिम्मा मकासं थःगु हे मनं छिमिसं मेपिन्त जिगु पवित्रगु थासय् मेपिनिगु जिम्माय् बिल।

9 परमप्रभु परमेश्वरं थथे धयादी – मनय् व म्हय् निगुलि चिं मतःपिं विदेशीत व इस्त्राएलीतय्गु दथुइ तन व मन निगुलि खतना मजूपिं विदेशी सुं नं जिगु पवित्र थासय् दुहां वये मज्यू।

लेवीतय् पुजाहारीया ज्या यायेत पंगु

10 “ ‘इस्त्राएलीत मखुगु लैय् वंगु दिननिसें जिपाखें तापाना वंपिं लेवीतय्सं व जितः त्वःताः थःगु मूर्तिया ल्यूल्यु जुया जूपिं लेवीतय्सं थःगु पापया सजाँय फये हे माः।

11 इमिसं जिगु पवित्र थासय् सेवा याये फु। देगःया ध्वाखातय्गु जिम्मा कयाः अन सेवा याये फु। इमिसं मनूतय्गु निंति होमबलि व बलि बीत छायेहपिं पशुत इमिसं स्याये फु। इपिं मनूतय् न्ह्यःने दनाः इमिगु सेवा याये फु।

12 तर उपि लेवीतयसं थःगु हे मूर्तितयगु न्ह्यःने मन्तूतयगु सेवा याःगु, अले इस्त्राएलया घरानायात पापय् कुर्काब्यगु जुयाः इमिसं थःगु पापया सजॉय फये हे माः धकाः जिं थःगु ल्हाः ल्हनाः पाफयागु दु, जि, परमप्रभु परमेश्वर न्ववानागु दु।

13 इपि पुजाहारीत जिगु सेवा यायेत न्ह्यःने वये दइ मखु। इपि जिगु छुं नं पवित्रगु खँ अथवा तच्चक्कं पवित्र भेटीया न्ह्यःने वये दइ मखु। थःम्हं याःगु घच्चाइपुगु ज्यायागु लज्या इमिसं भोगे याये हे माः।

14 अयनं देगलय् यायेमाःगु ल्हने ज्यायागु जिम्मा व अन अप्वः यानाः यायेमाःगु ज्यायागु जिम्मा जिं इमित हे बी।

पुजाहारीत

15 “ ‘तर सादोकया परिवारयापि लेवीतय् सन्तान पुजाहारीतयसं धाःसा इस्त्राएलीत जिपाखें फस्वया वंसां तबि जिगु पवित्र थासय् यायेमाःगु ज्या इमान्दार जुयाः याना हे च्वन। थुपि धाःसा जिगु सेवा यायेत जिगु न्ह्यःने वयेगु यायेमा, अले जिगु न्ह्यःने दाः व हि छायेत वयेगु यायेमा, परमप्रभु परमेश्वरं धयादी।

16 इपि जक जिगु देगलय् दुहां वइ, अले जिगु न्ह्यःने सेवा यायेत जिगु टेबिलया न्ह्यःने वयाः इमिसं जिगु सेवा याइ।

17 “ ‘इपि दुनेया चुकयागु लुखाय् दुहां वनीबलय् इमिसं सूती कापःयागु वसः फीमाः। इमिसं दुनेयागु चुकयागु लुखा लुखाय् वा देगःया दुने सेवा याइबलय् छुं नं ऊनयागु वसः पुने मज्यू।☆

18 इमिसं छेनय् सुतियागु फेटा व जँय् सुतियागु दुनेयागु वसः फीमाः। इमिसं चःति वइगु छुं कथं याःगु वसः फी मज्यू

19 इपि पिनेया चुकय् मन्तूतयथाय् वनीबलय् सेवा याःबलय् फ्यगु वसः त्वयेमाः, अले व वसः पवित्र क्वथाय् तयाः मेगु वसः फी हे माः। मखुसा थ्व पवित्र वसःपाखें चुकय् च्वपि पवित्रतां सी हे माःगु खः।

20 “ ‘इमिसं थःगु छेनय् सँ खाये मज्यू अथवा ताहाक जुइके बी मज्यू, तर इमिसं थःगु सँ चिहाकः यानाः चायेमाः।☆

21 दुनेया चुकय् वनीबलय् सुं नं पुजाहारीं दाखमघ त्वने मज्यू।☆

☆ 44:17 ४४:१७-१८ प्रस २८:३९-४३; लेवी १६:४
४४:२१ लेवी १०:९

☆ 44:20 ४४:२० लेवी २१:५

☆ 44:21

22 सुं न पुजाहारीं भाःत मदये धुंकूम्ह वा भाःत त्वःतूम्ह मिसालिसें ब्याहा याये मज्यु। इमिसं इस्राएलया वंशय् बूम्ह कुमारी मिसामचायात अथवा सुं पुजाहारीतय् भाःत मदये धुंकूम्ह मिसायात जक् ब्याहा याये फइ।☆

23 इमिसं जिगु प्रजायात पवित्र व साधारण छु पाः व स्यनेमाः अले इमित शुद्ध व अशुद्ध छुतय् यायेगु स्यनेमाः।☆

24 “ ‘छुं ल्वापुख्यापु जुइबलय् पुजाहारीतय्सं हे न्यायाधीशं थें ज्या यायेमाः अले जिगु विधिकथं इमिसं मुद्रा फैसला यायेमाः। इमिसं जिगु नियमत व जिगु क्वःछिनातःगु फुक्क नखःचखःयागु विधित पालन यायेमाः। इमिसं जिगु विश्रामबारयात पवित्र तयाति!

25 “ ‘सीम्ह मनूया न्ह्यःने वनाः सुं पुजाहारीं थःत अशुद्ध याये मज्यु। अयनं मां बौ, कायम्ह्यायपि दाजुकिजापि अथवा ब्याहा मजूनपि तता केहेंयागु सीम्हया न्ह्यःने वनाः व अशुद्ध जुइफु।☆

26 शुद्ध जुइ धुंकाः न्हयन्हु तक वं पियाच्चनेमाः।

27 पवित्र थासय् सेवा यायेत पवित्रगु थाय्या दुनेया चुकय् दुहां वनेगु दिं वं थःगु निति शुद्ध जुइगु बलि छायेमाः। परमप्रभु परमेश्वरं धयादी।

28 “ ‘पुजाहारीतय्त पुर्खातय्गु जमिन दइ मखु। इमिगु भागयागु जमिन जि हे खः। छिमिसं इस्राएलय् इमित छुं थःगु जमिन बी मज्यु, छायाधाःसा जि हे इमिगु थःगु जमिनया भाग जुये।☆

29 इमिसं अन्नबलि, शुद्ध जुइगु बलि व दोषबलि नइ। इस्राएलय् परमप्रभुयात देछाय्माःगु फुक्क चिज इमिगु हे जुइ।☆

30 फुक्क न्हापां सःगु फलतय् दकलय् भिंगु न्हापांगु फलत व छिमिगु फुक्क कथंयागु व विशेष क्वसेलि फुक्क पुजाहारीतय्गु हे जुइ। छिमिगु घरानाय् आशिष वयेत न्हायातःगु छुचुंयागु दकलय् न्हापायागु ब्व नं पुजाहारीतय्त हे ब्यु!

31 अर्थे सीम्ह अथवा मेम्ह पशुं स्याःम्ह इंगःपन्छि वा पशुया ला पुजाहारीतय्सं नये मज्यु।’ ”☆

45

जमिन ब्वथःगु

☆ 44:22 ४४:२२ लेवी २१:७,१३-१५ ☆ 44:23 ४४:२३ लेवी १०:१० ☆ 44:25 ४४:२५ लेवी २१:१-४ ☆ 44:28 ४४:२८ गन्ती १८:२० ☆ 44:29 ४४:२९-३० गन्ती १८:८-१९ ☆ 44:31 ४४:३१ लेवी २२:८

1 “ छिमिसं इस्राएलया कुल कुलयात सर्बयकथं देश इनाबीबलय् छिमिसं उकिं परमप्रभुया नितिं १३ किलोमिटर ताहाकःगु व ११ किलोमिटर तब्यागु छगू पवित्रथाय् अलग या। व फुक्क लागा पवित्र जुइ।

2 थ्व लागाया २६५ मिटर ताहाकःगु व २६५ मिटर तब्यागु छगू ब्व पवित्र थाय्या नितिं जुइ। उकिया प्यखेरं २७ मिटर तब्यागु छगू खुला थाय् दयेमा।

3 व हे पवित्र लागाय् १३ किलोमिटर ताहाकःगु व ५.३ किलोमिटर तब्यागु छकु थाय् नापे या। अन पवित्रगु थाय् व तच्चकं पवित्रगु थाय् दइ।

4 थ्व थाय् धाःसा पवित्रगु थासय् परमप्रभुया सेवा याइबलय् परमप्रभुया न्ह्यःने वइपिं पुजाहारीतयगु नितिं देशयागु छगू पवित्रगु ब्व जुइमा। थ्व इमिगु छेंया नितिं जग्गा व पवित्र थाय्या नितिं नं छगू पवित्रगु थाय् जुइ।

5 १३ किलोमिटर ताहाकःगु व ५.३ किलोमिटर तब्यागु छगू लागा देगलय् सेवा याइपिं लेवीतयगु जुइ। उकी हे इपिं च्वनीगु शहरत दइ।

6 “ ‘पवित्र इलाकाया लिक्क छिमिसं शहरया लागि २.७ किलोमिटर तब्यागु व १३ किलोमिटर ताहाकःगु थाय् ब्यु! थ्व फुक्क इस्राएलीतयगु नितिं जुइ।’ ”

शासकया जमिन

7 “ ‘पवित्र इलाका व शहरया फुक्क सिथया जमिन धाःसा शासकयागु जुइ। व पच्छिमपाखें पच्छिमय् हे पुर्बपाखें पुर्बय् हे न्यनावंगु जुइ। कुल कुलया भागत मध्ये छगू नापनापं जुयाः पच्छिम सिमानांनिसें पुर्ब सिमाना तक न्यनावंगु वयागु ब्व जुइ।

8 थ्व धाःसा इस्राएलय् वयागु जमिन जुइ। इस्राएलया राजकुमारतयसं जिगु प्रजायात हाकनं गुबलें अत्याचार याइ मखु, तर इमिसं इस्राएलया घरानायात इमिगु कुल कुलकथं जग्गा जमिन बी।’ ”

शासकतयगु नितिं नियम

9 “ ‘परमप्रभु परमेश्वरं थथे धयादी, हे इस्राएलया शासकत, गात! छिमिसं यक्व हे यात। ल्वापुख्यापु व अत्याचार त्वःताब्यु! खःगु व बांलाःगु ज्या जक या! जिगु प्रजायात पितिनाछवयेगु ज्या बन्द या! परमप्रभु परमेश्वरं धयादी।

10 छिमिसं थिक थिक तौलयागु तात्जु व धः छ्यलेमाः। छिमिगु एपा* व बाथ† नं पाय्छि पाय्छि नापयागु जुइमाः।☆

11 गंगु चिज लनीगु “एपा” व छ्वालगु चिज लनीगु “बाथ” छगू हे नापयागु जुइमाः उपिं नाप “होमेर”‡ कथं थुकथं यायेमाः—

“ १ होमेर = १० एपा = १० बाथ।

12 ओजनया तौल थथे जुइमाः

२० गेरा = एक शेकेल§।

६० शेकेल = एक मीना।

विशेष भेटी व नखःचखः

13 “ छिमिसं थःगु भेटी थुकथं छायेगु या —

छवःया छगू एपाया खुब्बय छब्ब

तछवःया छगू एपाया खुब्बय छब्ब

14 जैतूनया चिकंया १/१०० भाग।

(बाथया ल्याखं लनिबलय् थथे जुइ —

झिगू बाथ = छगू होमेर = छगू कोर।)

15 “ फै इस्राएलया ख्यःयापि निसःम्ह फैपाखें छम्ह।

“ छिमिसं अन्नबलि, होमबलि व मेलबलिया नितिं पशुत अन्न व चिकं हइ, अले व छिमिगु नितिं प्रायश्चित जुइ, परमप्रभु परमेश्वरं धयादी।☆

16 इस्राएलया शासकयात देशयापि फुक्क मनूतय्सं थ्व कोस्यालि बीमाः।

17 थीथी नखःचखः, अमइया नखः, विश्रामबारत व इस्राएलया घरानाया फुक्क क्वछिनातःगु नखःचखःबलय् छायेत होमबलि, अन्नबलि व त्वँसाबलि तयार यायेगु ज्या शासकयागु हे जुइ। इस्राएलया घरानाया नितिं प्रायश्चित यायेत माःगु शुद्ध जुइगु बलि, अन्नबलि, होमबलि व मेलबलि वं हे तयार यानाबीमाः।

* 45:10 ४५:१०छगू एपा थथे धयागु न्याफा ति खः † 45:10 ४५:१०-१४एपा व बाथ थुपि पदय् पुलांगु हिब्रू नापतौलया बोरे धयातःगु दु, पुलांगु इलय् इमिसं गंगु पदार्थया निति “एपा” छ्यली अले छ्वालगुया निति “बाथ” छ्यली, “एपा” व बाथया साइज उर्थे खः, मेगु “होमेर” धकाः धाइगु मेगु तौल थुपि निगुया झिब्बय छब्ब दइ, सामान लने माल धाःसा इमिसं “शेकेल” छ्यली, छगू शेकेलय् नीगु गेरा दइ, अले छगू मिनाय् नीगु “शेकेल” दइ, इमिसं छ्यलीगु छुं दाना कायेत कोर धाःगु तौल नं छ्यली थ्व छगू “होमेर” ति हे दइ। ☆ 45:10 ४५:१०-१२ लेवी ११:३६ ‡ 45:11 ४५:११ होमेर छगू होमेर धयागु निसः किलोग्राम ति खः § 45:12 ४५:१२ शेकेल छगू शेकेल धयागु ११.५ ग्राम ति खः। ☆ 45:15 ४५:१५ लेवी १:३-१७; २:१-१६; ३:१-१७

18 “ ‘परमप्रभु परमेश्वरं थथे धयादी — न्हापांगु लाया न्हापांगु दिनय् छिमिसं छम्ह खू मदुम्ह द्र्हंचा कया: पवित्र थाय्यात शुद्ध यायेगु या।

19 पुजाहारीं शुद्ध जुइगु बलिया भचा हि कया: देगःया लुखाया चौकोस, वेदीया च्वय्यागु चाकःया पेगुलि कुन्चाय् कुन्चाय् व दुनेया चुकया लुखाया थां थामय् तयेमा:।

20 सुनानं बिचा: मयासें अथवा मसीकं मचायेकं पाप या:गु दुसा, लाया न्हय्न्हु दुखुन्हु छिमिसं अथे हे यायेगु या। थुकथं देगःया निति छिमिसं प्रायश्चित्त यायेगु या।

21 “ ‘न्हापांगु लायागु झिप्यन्हु दुखुन्हु छिमिसं न्हय्न्हु तक छुत्काराया नखः हनेमा:। थुबलय् छिपि सकसिनं सोडा मतःगु मरि जक नयेगु यायेमा:। ☆

22 उखुन्हु राजकुमारं थःगु निति व देशयापि फुक्क मनूतय्गु निति शुद्ध जुइगु बलिया निति छम्ह द्र्हं बीमा:।

23 थ्व नखःया न्हय्न्हु तक परमप्रभुया निति होमबलिया निति न्हियान्हिथं व न्हय्म्ह खू मदुपि द्र्हं व न्हय्म्ह खू मदुपि भ्या:चा अले शुद्ध जुइगु बलिया निति न्हियान्हिथं छम्ह छम्ह दुगुचा छायेमा:।

24 छम्ह छम्ह द्र्हं व भ्या:चानापं वं छगू एपा अन्नबलिकथं छवचुं छायेमा:, छगू छगू एपा* नापं छगू हीन† चिकं छायेमा:।

25 “ ‘न्हय्गूगु लाया झिन्त्यान्हु दुखुन्हुनिसें कया: न्हय्न्हु तक वं शुद्ध जुइगु बलि, होमबलि, अन्नबलि व चिकं थुकथं हे तयार यायेगु यायेमा:।’ ” ☆

46

1 “ ‘परमप्रभु परमेश्वरं थथे धयादी — दुनेया चुकया पुर्बपाखेया मू ध्वाखा वाया खुन्हु तक तिनातयेमा:। विश्रामबार व अमइया दिं जक व चाला च्वनेमा:। ☆

2 शासक पिनेनं ध्वाखाया दलान जुया: वयेमा: अले ध्वाखाया थांया लिक्क व दनेमा:। पुजाहारीतय्सं शासकयागु होमबलि व मेलबलि छायेमा:। अले व लुखाखलुइ आराधना याना: पिने पिहां वनेमा: ध्वाखा धा:सा बहनी तक मतीमा:।

3 विश्रामबार व अमइ खुन्हु देशयापि मनूतय्सं व हे ध्वाखाया खापाय् परमप्रभुया न्ह्यःने आराधना यायेमा:।

☆ 45:21 ४५:२१ प्रस १२:१-२०; गन्ती २८:१६-२५

* 45:24 ४५:२४ छगू एपा थथे धयागु न्याफा ति

ख:। † 45:24 ४५:२४ छगू हीन थथे धयागु ३.८ लिटर

☆ 45:25 ४५:२५ लेवी २३:३३-३६; गन्ती

२९:१२-२८ ☆ 46:1 ४६:१-३, ८ इज ४४:१-३

4 विश्रामबार खुन्हु शासकं परमप्रभुया निंति छायेमाःगु होमबलि थथे जुइमाः-
खुम्ह खू मदुपि चीधिकःपि भ्याःचात व छम्ह खू मदुम्ह भ्याःचा।

5 छम्ह छम्ह भ्याःचानापं छाइगु अन्नबलि छगू छगू एपा जुइमाः अले
चीधिकःपि भ्याःचातनापं छाइगु अन्नबलि थःत गुलि बी मास्ति वः उलि छायेमाः।
व बाहेक छगू छगू एपा* नापं छगू हीन चिकं छायेमाः।

6 अमइ खुन्हु वं छम्ह द्रुहंचा, खुम्ह चीधिकःपि भ्याःचा व छम्ह भ्याःचा
छायेमाः। उपि दक्व खू मदुपि जुइमाः।

7 वं छम्ह द्रुहंनापं छगू एपा व छम्ह छम्ह भ्याःचानापं छगू छगू एपा अन्नबलि
छायेमाः। खुम्ह चीधिकःपि भ्याःचातनापं छाइगु अन्नबलि थःत गुलि बी मास्ति
वः। उलि नापं छगू छगू एपाया निंति छगू छगू हीन चिकं तनाः छायेमाः।

8 शासक दुहां वइबलय् व मू ध्वाखाया दलान जुयाः दुहां वयेमाः अले व हे लै
जुयाः पिहां वनेमाः।

9 “क्वःछिनातःगु नखःचखःया दिनय् मनूत परमप्रभुया न्ह्यःने वइबलय्
उत्तरया मू ध्वाखां आराधना यायेत दुने दुहां वनीम्ह मनू दच्छिनया मू ध्वाखां
पिहां वनेमाः। दच्छिनया मू ध्वाखां दुहां वनीम्ह मनू धाःसा उत्तरया मू ध्वाखां
पिहां वनेमाः। दुने दुहां वःगु ध्वाखां सुं नं पिहां मवनेमाः। तर तप्यंक पिहां वनेमाः।

10 इपि दुहां वइबलय् इमिगु दथुइ च्वनाः शासक वयेमाः अले शासक पिहां
वनीबलय् इपिनापं हे पिहां वनेमाः।

11 “नखःचखः व नखःचखःया क्वःछिनातःगु दिनय् अन्नबलि धाःसा छगू
एपा छम्ह द्रुहंचानापं, छगू एपा छम्ह भ्याःचानापं, व चीधिकःम्ह भ्याःचानापं थःत
गुलि बी मास्ति वः उलि छायेमाः। छगू छगू एपानापं छगू छगू हीन चिकं छायेमाः।

12 “शासकं परमप्रभुयात थःयसैं होमबलि वा मेलबलि छाइबलय् वयागु निंति
पुर्बपाखे स्वःगु मू ध्वाखा चायकाबीमाः। वं थःगु होमबलि व मेलबलि विश्रामबार
खुन्हु छाःगु थें हे छायेमाः। व पिहां वने धुंकाः खापा तीमाः।

13 “छिमिसं परमप्रभुया निंति दच्छि दुम्ह छम्ह भ्याःचा न्हियान्हिथं होमबलि
यानाः छा। छिमिसं थथे सुथ पतिकं या।

14 वनापं सुथ पतिकं अन्नबलि एपाया खुब्बय् छब्ब† व छुचुंनापं ल्वाकछ्यायेत
हीनया स्वब्बय् छब्ब‡ चिकं बीमाः। परमप्रभुयात थ्व अन्नबलि छायेगु न्ह्याबलेंयागु

* 46:5 ४६:५ छगू एपा थथे धयागु न्याफा ति खः † 46:14 ४६:१४ एपाया खुब्बय् छब्ब थथे धयागु
२.७ किलोग्राम खः ‡ 46:14 ४६:१४ हीनया स्वब्बय् छब्ब थथे धयागु १.३ लिटर खः

विधि खः।

15 थुकथं सुथ पतिकं मदिवक्क होमबलि यानाः भ्याःचा, अन्नबलि व चिकं छायेमाः।

16 “ परमप्रभु परमेश्वरं थथे धयादी – शासकं थः सुं छम्ह काय्यात थःगु सर्बयपाखें दान बिल धाःसा व दान वया सन्तानयागु नं जुइमाः। व वयागु सर्बययागु छगू ब्व जुइ।

17 तर वं थज्याःगु दान दासत मध्ये छम्हयूसित बिल धाःसा, दासत्वपाखें मुक्त जुइगु दैँ तक जक वयागु जुइमा। अनंलि हाकनं व शासकयागु हे जुइ। वयागु सर्बय थः कायपिनिगु जक जुइ, व इमिगु हे जुइ।☆

18 शासकं मनूतय्त थःगु जग्गा जमिनं पितिनाछवयाः इमिगु सर्बय लाकाकाये मज्यू। वं थःगु हे जग्गा जमिनं छुं ब्व थः कायपिन्त सर्बय कथं बीमाः थुकथं जिम्ह सं मनूयात वयागु थःगु जग्गा जमिनपाखें अलग याइ मखु।’ ”

देगःया भुतू क्वथा

19 अले उम्ह मनुखं जितः मू ध्वाखाया छखेपाखेयागु लुखां उत्तरपाखे स्वःगु पवित्र क्वथाय् हल, गुगु क्वथा पुजाहारीतयगु लागि अलग तयातःगु खः। अले पच्छिमयागु छगू कुन्चाय् जितः छगूथाय् क्यन।

20 “थ्व थाय् पुजाहारीतयसं दोषबलि व शुद्ध जुइगु बलियागु ला दयकीगु व अन्नबलि छाःगु छुचुनं मरि दयकीगु थाय् खः। थथे पुजाहारीतयगु थासय् याये हे माः। मखुसा थ्व पवित्र नसा चुकय् यंकीगुलि अन च्वंपिन्त पवित्रतां सी हे माःगु खः।”

21 अनंलि वं जितः पिनेया चुकय् यंकाः चुकया पेगुलि कुन्चाय् चाःहिकल। जिं फुक्क कुन्चाय् छगू चिधंगु चुक खना।

22 जिं फुक्क कुन्चाय् छगू भुतू क्वथा खना। थुपि भुतू क्वथात छगू हे नापयागु खः, २१ मिटर ताहाकः व १६ मिटर तब्या।

23 प्यंगू भुतू क्वथाया प्यखेंपाखे ल्वहंया फः दु। उपिं फःया क्वय् प्यखेरं भुतू दयकातःगु दु।

24 वं जितः धाल, “थ्व देगलय् सेवा याइपिन्सं मनूतयसं छायेहःगु बलित दयकीगु भुतू क्वथात खः।”

§ 46:17 ४६:१७ हिब्रू भाषाय् न्ययगू दैँ, थ्व नेय्दुँ पतिकं हनी। नेय्गू दैँ दासत व चिज स्वतन्त्र जुइ, जमिन न्हापा सुयागु खः वयात थःयत्थें लितबीमाः। थुकिया बारे छि लेवी २५:८-५५ पदय् बालाक स्वयादीफु।

☆ 46:17 ४६:१७ लेवी २५:८-५५

47

देगःपाखें न्ह्यानाच्चंगु खुसि

1 हाकनं वं जितः देगःया मू ध्वाखाय् लितहल। जिं देगःया ध्वाखाखलुया क्वय् लः तिकितिकि वयाः पुर्बपाखे वनाच्चंगु खना। देगःया मू ध्वाखा पुर्बपाखे स्वःगु दु। लः देगःया दच्छिनं, वेदीया दच्छिनपाखें क्वय् तिकितिकि वयाच्चंगु दु।✧

2 अले वं जितः उत्तरया मू ध्वाखां पिने हल, अले पिनें पिनें चाःहिकाः पुर्बपाखे स्वःगु ध्वाखाया पिने हल। पुर्बपाखे स्वःगु ध्वाखाया दच्छिनपाखें लः तिकितिकि वयाः न्ह्यानाच्चंगु दु।

3 व नापय् याइगु खिपः ल्हातय् ज्वनाः पुर्बपाखे वन, अले वं ५३० मिटर नापय् यात। वं जितः खुसिया उखेपाखे ब्वना यंकल, लः गौचा तक वः।

4 वं मेगु ५३० मिटर नापय् यानाः जितः लखं ब्वना यंकल, लः पुलि तक वः। वं मेगु ५३० मिटर नापय् यात, अले जितः लखं ब्वना यंकल, लः जै तक वः।

5 वं मेगु ५३० मिटर नापय् यात, तर आः लः थाहां वयाः जिं छी मफइगु खुसि जुल। व लाल कायेजीक तज्जाःगु दु, व सुं छी मफइगु खुसि जूगु दु।

6 वं जितः धाल, “अय् सीमानिम्ह मनु, छं थ्व फुक्क बांलाक स्व!”

अले वं हाकनं जितः खुसिया सिथय् यंकल।

7 अन थयंबलय् जिं खुसिया निखें यक्व सिमात खना।

8 वं जितः धाल, “थ्व लः पुर्बया लागापाखे न्ह्याइ, अनं क्वय् अराबा जुयाः मृत समुद्रपाखे न्ह्याइ अले मृत समुद्रय् मिलय् जुइ। अले मृत समुद्रया लः साइ।

9 व खुसि न्ह्याःगु थासय् यक्व थीथी कथंयापि जीवजन्तुत च्वनी। अन यक्व न्या दइ, छायाःसा थ्व लः गन गन वनी अनयागु लः साइ। उकिं थ्व खुसि गन गन थ्यनी, अन न्ह्याम्हं नं म्वाइ।✧

10 मृत सागरया सिथ सिथ न्या लाइपि दनाच्चनी। एन-गदीनिसें एन-एलैम तक जाः हलिगु थाय् दइ। अन भूमध्यसागरय् थें थीथी कथंयापि यक्व न्यात दइ।

11 तर उकिया ध्वप व ध्याचा ध्याचा जुयाच्चंगु थाय्यागु लः साइ मखु, तर अनयागु लःयात चिया लागिं तया तइ।

12 खुसिया सिथय् निखेंपाखे थीथी कथंयागु फलयागु सिमात बुया वइ। उमिगु हः सुकूगनावनी मखु। उमिगु फल गुबलें फुइ मखु। उमिसं फुक्क लाय् हे फल बी,

छाय्धाःसा उमित प्याकिगु लः पवित्र थासं न्ह्याइगु खः। उमिगु फल नयेत व उमिगु हः ल्वय् लाय्केत जुइ।”☆

इस्त्राएलया सिमाना

13 परमप्रभु परमेश्वरं थथे धयादी, “इस्त्राएलया झिनिगू कुलयात सर्बयया लागि छिमिसं देश इनाबीबलय् देशया सिमाना थथे जुइ। योसेफया लागि निगू भाग जुइ।

14 छिमिसं इमित बराबर यानाः इनाब्यु। थ्व छिमि पुरखातय्त बी धकाः ल्हाः ल्हनाः पाफयागुलि थ्व देश छिमिगु सर्बय जुइ।

15 “देशया सिमाना थ्व हे जुइ –

“उत्तरपाखे भूमध्ये सागरनिसें हेतलोनया लँ जुयाः लेबो-हमात जुयाः सदादया ब्यासि,

16 अले बेरोतह व सिब्रैम तक (थ्व दमस्कस व हमातया सिमानाया दथुइ दु) थ्व सिमाना थ्यनी। व हौरानया सिमानाया लिक्क दुगु हासेरहात्तीकन तक हे थ्यनी।

17 उत्तरया सिमाना समुद्रनिसें हसर-एनान तक थ्यनी। दमस्कस व हमातया इलाकात उकिया उत्तरय् लाइ।

18 “पुर्बपाखेयागु सिमाना धाःसा हौरान व दमस्कसया दथुइ, गिलाद व इस्त्राएल देशया दथुं यर्दन खुसिया लिक्क लिक्क जुयाः वंगु दु। अले व सिमाना मृत समुद्र व तामार तक हे वंगु दु। थ्व पुर्बया सिमाना जुइ।

19 “दच्छिन पाखेयागु सिमाना तामारनिसें मेरीबा कादेशया बुंगाःचा तक अले मिश्रया बगःया लिक्क लिक्क जुयाः भूमध्यसागर तक थ्यनी। थ्व दच्छिनया सिमाना जुइ।

20 “पच्छिम पाखेयागु सिमाना भूमध्यसागर जुइ, लेबो-हमातया लिक्क च्वंगु सिथ तक। थ्व पच्छिमया सिमाना जुइ।

21 “थ्व देश छिमिसं थःगु निति इस्त्राएलया कुल कुलकथं इनाब्यु।

22 छिमिसं थ्व देश न्ह्याबलेया सर्बयकथं थःगु हे निति व छिपिनापं च्वनाच्चपिं, काय्न्ह्याय् दुपिं विदेशीतय्गु निति नं इनाब्यु। छिमिसं इमित इस्त्राएलय् हे बूपिं इस्त्राएलीत थें तायकि। छिपिनापं हे इस्त्राएलया कुलतय्गु दथुइ इमित सर्बय दयेमाः।

23 गुम्ह परदेशी गुगु कुलनापं च्वनी, वनापं हे छिमिसं वयागु सर्बय बीमाः” परमप्रभु परमेश्वरं धयादी।

48

जमिन ब्व:थ:गु

1 “इस्त्राएलया कुलतयगु धल: व इमिसं का:गु फुक्क लागाया धल: थथे दु। उत्तरयागु सिमानाय् दानयात छब्ब दइ। व हेतलोनया लँ जुया: लेबो-हमातय् वनी। हसर-एनान व हमातया लिक्सं च्वंगु दमस्कसया उत्तरयागु सिमाना धा:सा उकिया सिमानाया पुर्बनिसें पच्छिमपाखे छब्ब जुइ।

2 “दानया सिमानाया लिक्कसं, पुर्बनिसें पच्छिमया सिमाना तक आशेरयागु छब्ब जुइ।

3 “आशेरयागु सिमानाया लिक्कसं, पुर्बनिसें पच्छिमया सिमाना तक नप्तालीयागु छब्ब जुइ।

4 “नप्तालीया सिमानाया लिक्कसं, पुर्बनिसें पच्छिम तक मनश्शेयागु छब्ब जुइ।

5 “मनश्शेया सिमानाया लिक्कसं, पुर्बनिसें पच्छिम तक एफ्राइमयागु छब्ब जुइ।

6 “एफ्राइमया सिमाना लिक्कसं, पुर्बनिसें पच्छिम तक रूबेनयागु छब्ब जुइ।

7 “रूबेनया सिमानाया लिक्कसं, पुर्बनिसें पच्छिमपाखे तक यहूदायागु छब्ब जुइ।

पुजाहारीत, लेवीत व देग:या इलाका

8 “पुर्बनिसें पच्छिमपाखे तक यहूदाया सिमाना लिक्कसं छिमिसं अलग या:गु छगू विशेष भाग कोसेलिकथं छिमिसं बीमा:। उकिया ब्या १३ किलोमिटर जुइ, उकिया हाक: पुर्बनिसें पच्छिम तक मेमेगु कुलयात ब्यूगु भाग ति हे जुइ। पवित्र देग: उकिया दथुइ जुइ।

9 “छिमिसं परमप्रभुयात छायेमा:गु भाग १३ किलोमिटर ताहाक:गु व ५.३ किलोमिटर तब्यागु जुइ।

10 थ्व पुजाहारीतयगु निंति छगू पवित्र ब्व जुइ। उकिया ताहाक:गु उत्तरनिसें दच्छिन तक ५.३ किलोमिटर, उकिया ब्या पुर्बनिसें पच्छिम तक १३ किलोमिटर जुइ। परमप्रभुया पवित्रथाय् धा:सा उकिया दथुइ जुइ।

11 व अर्पण या:पि पुजाहारीतयगु निंति जुइ अर्थात सादोकीत। इमिसं विश्वास यायेबह:पि जुया: जिगु सेवा यात। इस्त्राएलीत मखुगु लँय् वंबलय् लेवीत नं मखुगु लँय् वं थें सादोकीत मखुगु लँय् मवं।

12 देशयागु पवित्र भागं, लेवीतयगु लागा थियाच्चंगु तसकं पवित्रगु ब्व इमिगु निंति छगू विशेष कोसेलि जुइ।

13 “थ्व पुजाहारीतयगु निति छगू पवित्र ब्व जुइ। उकिया ताहाकःगु उत्तरनिसें दच्छिम तक ५.३ किलोमिटर, उकिया ब्या पुर्बनिसें पच्छिम तक १३ किलोमिटर जुइ। परमप्रभुया पवित्रथाय् धाःसा उकिया दथुइ जुइ।

14 इमिसं व मी मज्यू अले हिलाबुला याये मज्यू। थ्व देशयागु दकलय् भिंगु जग्गा खः, थ्व सुयातं बी मज्यू, छायाःसा थ्व परमप्रभुया निति पवित्र खः।

15 “ल्यं दुगु २.७ किलोमिटर तब्यागु व १३ किलोमिटर ताहाकःगु जमिन धाःसा शहरया साधारण ज्याया लागि, च्वनेगु थाय् व पशुत ज्वयेगु थाय्या लागि जुइ। उकिया दथुइ शहर दइ।

16 व जग्गाया हाकः व ब्या थथे जुइ, थ्व प्यखेपाखे २.४ किलोमिटर दुगु प्यक् लाःगु शहर जुइ।

17 शहरया चकंगु घाँय्ख्यः फुक्क चाकःछिं नापय् याइबलय् छगू छगूपाखे १३५ मिटर दुगु जुइ।

18 शहरया पिने बुँज्या याइगु थाय् दइ, व पुर्बपाखे ५.३ किलोमिटर व पच्छिमपाखे ५.३ किलोमिटर नापयागु जुइ। अन छु सल व शहरय् ज्या याइपिनिगु लागि नयेत खः।

19 इस्राएलया फुक्क कुलं वःपिं शहरयापि ज्यामितय्सं थ्व जमिनय् बुँज्या याइ।

20 व फुक्क भाग प्यखेरं हे १३ किलोमिटर दुगु प्यक् लाःगु जुइ। शहरयागु जग्गानापं उगु पवित्र भाग विशेष कोसेलिकथं अलग ति।

शासक व पवित्र थाय्या लागाया सिमाना

21 “पवित्र देश व शहरय् ल्यंदुपि पुर्बनिसें पच्छिम तकया लागा इस्राएलयाम्ह शासकयागु जुइ। उपिं लागा इस्राएलया सिमाना जुयाः पुर्ब व पच्छिमपाखे १३.३ किलोमिटर तब्या जुइ। थुपि निगुलि इलाका कुलतयगु इलाका ति हे ताहाकः जुइ थुपि शासकयागु जुइ। गुकि पवित्र देशया पवित्र देगःयात दथुइ लाकाबी।

22 शासकया लागाया दथुइ लेवीतयगु जमिन व शहरयागु जमिन दइ। शासकया लागा धाःसा यहदाया सिमाना व बेन्यामीनया सिमानाया दथुइ लाइ।

ल्यं दुगु इस्राएली कुलतयगु लागा

23 “ल्यं दुगु कुलतयगु निति पुर्बनिसें पच्छिम तकयागु छब्व बेन्यामीनयागु।

24 “बेन्यामीनया सिमानाया लिक्कसं पुर्बनिसें पच्छिम तकयागु छब्व शिमियोनयागु।

25 “शिमियोनया सिमानाया लिक्कसं पुर्बनिसें पच्छिम तक छव्व इस्साखारयागु।

26 “इस्साखारया सिमानाया लिक्कसं पुर्बनिसें पच्छिम तकयागु छव्व जबूलूनयागु।

27 “जबूलूनया सिमानाया लिक्कसं पुर्बनिसें पच्छिम तकयागु छव्व गादयागु।

28 “गादया दच्छिन सिमाना तामारनिसें मेरीबा कादेशया लः तक थ्यनी अले अनं व मिश्रया खुसिचाया लिक्क लिक्क जुयाः थ्व भूमध्यसागर तक थ्यनी।

29 “छिमिसं इस्राएलया कुल कुलयात सर्बयकथं इनाबीमाःगु देश थ्व हे खः, थुपि हे इमिगु व्व खः,” परमप्रभु परमेश्वरं धयादी।

शहरया ध्वाखात

30 “शहरं पिहां वनेगु थाय्त थुपि हे जुइ, २.४ किलोमिटर ताहाकःगु उत्तरया भागय्☆

31 स्वंगू ध्वाखात दइ। शहरया ध्वाखाया नां इस्राएलया कुल कुलया नां थें हे जुइ। उत्तर पाखेया स्वंगू ध्वाखात रूबेनया ध्वाखा, यहदाया ध्वाखा अले लेवीया ध्वाखा जुइ।

32 “पुर्बपाखे, २.४ किलोमिटर ताहाकःगु पुर्बया भागय् स्वंगू ध्वाखा दइ, योसेफया ध्वाखा, बेन्यामीनया ध्वाखा व दानया ध्वाखा।

33 “२.४ किलोमिटर ताहाकःगु दच्छिनया भागय् स्वंगू ध्वाखा दइ, शिमियोनया ध्वाखा, इस्साखारया ध्वाखा व जबूलूनया ध्वाखा।

34 “२.४ किलोमिटर ताहाकःगु पच्छिमपाखे स्वंगू ध्वाखा दइ, गादया ध्वाखा, आशेरया ध्वाखा व नप्तालीया ध्वाखा।

35 “शहरयागु प्यखें पाखेयागु घेरा ९.६ किलोमिटर दइ।

“उखुन्हुनिसें शहरया नां ‘परमप्रभु अन दी’ जुइ।”

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7